

# JOON

## Ciig Beer Naa Agweed Joone

### Rob Ke Nying Kitaab

Ciig Beer naa agweed Joone anyoadhe yihro kejea Jeacuu e naa lubo gihn abeehde e nud “ge adoohng ne dhaano utaahngo kedea ngo abeehdo tiehd ke won” (1:14). Wa kaa agweede yi kitaab, Ciig Beer gihn agweed Joone beere yaa kwaan ngo yiih gene yiiho kejea Jeacuu e naa Ngad Boadh nyoge kedea e naa Waahd Juog kedea ge agweed thiow beere boadh wahy yoad gene yoado ke nyinge (20:31).

Joon athubo yi warga ke rob ke nying ka anud Jeacuue coon ke Juog Wuur ne nyoadh ngo kejea ngo padh dhaano utaahngo maa now abea ngo beehda Juog. Giih me gaahy nyoge maa atiihy Jeacuue kedea giih mooge maa apuohnye ge agweed Joone. Ngole 14-17 ge rubo kaa nying puohny Jeacuu yihr jo oohr giihe maano e cahng ke thoo. Batién thone kedea cahre, e Jeacuu ree anyoadhe yihr jo oohr.

Kaa Acaan Luube

Lum umodho 1:1-18

Joon Ngad Luogwahy kedea jo waahdh Jeacuu giih umodho 1:19-51

Tiihy Jeacuu kiin nyoge 2:1-12:50

Nihn dhecaahn yi Jeruucalem kedea buude 13:1-19:42

Cahro kedea nyoadh rog gihr Jeacuu Ruohdh 20:1-31

Nyoadh rog keehdo yi Gaalili 21:1-25

*Lubo Adoohng Ne Dhaano*

<sup>1</sup> Coon umodho e piny poohd kuu acag, Lubo abeehde e nud e ngaa moogo ke rode: Lubo anaa bang Juog kedea ngo Juog.\* <sup>2</sup> Lubo anaa bang Juog kuu umodho coon e piny poohd kuu acag.

<sup>3</sup> Juog giih nyepinye cang ge acag kaa Lubo. Be gihn maa acage e keede e Lubo tooro yi ngo. <sup>4</sup> Ngaan nud ke rode e ne cub kuowo yihro. Kuowo gihn nu ke rode e ne meehg won ngahy Juog. <sup>5</sup> Daahr meeny yi muudho abea wonge be rom muudhe ke bihjo.

<sup>6</sup> Juog wuohd gihre aohre, dhaano me nyinge Joon. <sup>7</sup> Ngaa maa abeehno e beehda cuud me rubo ke nying daahr beere nyoge cang wuohdo gihn akahle lihng gene lihngo uyiih gene ngo. <sup>8</sup> Padh Joon ke ngude e naa daahr maaj me meehg won ngahy Juog. Joon beehda cuud me rubo ke nying daahr. <sup>9</sup> Daahr ni e naa daahr me ne cohg. Ngo beehn wiih piny bang nyoge beere Juog ngahy gene ngahyo.

<sup>10</sup> Lubo e beehda ngaa moogo ke rode abeehdo tiehd ke nyoge wiih piny kan. Abea keehd maa anahge en naa ameehg Juoge cag wiih piny, e yaa wiih piny ngo kuu abeehn gene ne ngeyo wa kaano nahge Lubo. <sup>11</sup> Ngo abeehn bang yaa paar gen, abea ngo kuu abeehn gene ne loro. <sup>12</sup> Abea yaa alor ngo kedea uyiih gene giih arobe ge ameehge doohng ne nyethen Juog. <sup>13</sup> Ge kuu adoohng ne nyethen Juog ke dhe yoohn nyoohdo, abea ke nying gihn ayiih gene.

<sup>14</sup> † Lubo adoohng ne dhaano kedea ngo abeehdo tiehd

---

1:1 1:1-2 Jon 17:5; Pihp 2:6; 1Jon 1:1-2; Any 19:13-16 \* 1:1 1:1 Lubo: Lubo kihde beehda kihd Juog. 1:3 1:3-4 1:9-10; 5:26; 1Kor 8:6; Klo 1:16-17; Judea 1:2; Any 3:14 1:6 1:6 Mat 3:1 1:8 1:8 1:20 1:9 1:9-10 8:12; 17:25; 1Jon 2:8 1:12 1:12 1Jon 3:1; Gal 3:26; 4:5 1:13 1:13 3:3, 5-6; 1Pii 1:23; 1Jon 3:9 † 1:14 1:14 Gal 4:4; Pihp 2:7; 1Tim 3:16; Judea 2:14; 1Jon 4:2 Moar wiihe ngo aniido: Mat 17:2; Jon 2:11; 1Jon 1:1-3

ke won. Amahr muuny Juog kede a adiehj yoad bang Juog ge giih me ne yihre. Kaa amoar Juoge wiihe ne ngaa me duohng ngo aniido. Moar wihj gihn acub Wahne yihr Waahd Acielo.

<sup>15</sup> Joon beehda cuud maa arubo ke nyinge yihr nyoge e ukwaago kobe, “Ngaa ni e ne na ruba ke nyinge ge na koohba, ‘Dhaano nud muu ubuodh batiena. Ngaa me wiih tiihye ne maalo rih tiihya bang gihn ngo anudo ke coon e a poohd tooro kede a e a poohd kuu anyuol.’ ”

<sup>16</sup> Noono umuoje won naa aciel acielo kaa amahr muuny Juog giih ne yihre. <sup>17</sup> Loohnge ge acub Juoge yihr Moaje ne cohg wudh nyoge. Abea gihn maa adiehr beehda thon Jeacuu Kriihjto e naa muuny Juog ne meehg won cidh Paar Juog. <sup>18</sup> Bekihd ngaa maa akuong wonge ke keehl rih Juog. Ngaa ameehg ngo ngeyo beehda Waahde ge Aciel cog e beehda Juog kede a ge beehdo ke Wahn.

*Joon Ngad Luogwahy Ree Arobe*  
(*Mat 3:1-12; Mak 1:1-8; Luk 3:1-18*)

<sup>19</sup> Apahn yaa Judea ge beed geen Jeruucalem cahng man yaa lam giih kweehr kede a yaa kony yaa lam ge aohr gene bang Joon. Naa abeehn gene bang Joon e ngo apeehny gene kob gene, “Wad wan! Teed rihi yihr wan. Yih naa ngaa?” <sup>20</sup> Kaano e Joon lum gen abeehre e gihn maa akane tooro kobe, “Padh an naa Ngad Boadh nyoge ge anaa akob Juoge kejea ngo ubeehn.”

<sup>21</sup> Maa adog gene ngo ke peehnyo, “Abea yih naa ngaa ne cohg? Ka moogo e yih beehda agamloohngjuog naa arub Moaje ke nyinge yi kitaab Juog, wale yih beehda Eliija ge akob naa ubeehn?”

---

1:15 1:15 1:24-27, 30; 5:31-34, 36      1:17 1:17 7:19      1:18 1:18 6:46; 14:8-9;  
Mat 11:27; 1Tim 6:16; 1Jon 4:12      1:19 1:19-27 5:33      1:20 1:20 3:28      1:21  
1:21 Mat 2:14; Jon 6:14

Maa abeehr Joone ngo kobe, “Bekihde! A padh agamloohngjuog kede a padh Eliija.”

<sup>22</sup> Kob gene, “Kea rob rihi yih wan beere wa caa ne rob ngo yih yaa aohr wan. Teed rihi yih wan unghay tiihyi.”

<sup>23</sup> Maa abeehr Joone ngo e rob lum anaa arob Yicaaye ngad agamloohngjuog naa akoohbe kea, “Nud ke duol me kwaag yi ukang,

‘Gwiir yooh yih Ruohdh ne cohg cohg.’ ”

<sup>24</sup> Anahg akuud yaa lum Juog me cuohn ne Paarijea ge naa aohr yaa ni. <sup>25</sup> Noono maa apeehny gene Joon kob gene, “Nea yih padh Ngad Boadh nyoge kede a upadhi Eliija wale agamloohngjuog naa arub Moaje ke nyinge yi kitaab Juoge e luogwahy cubi yih nyoge kaa nying gihn?”

<sup>26</sup> Maa abeehr Joone ngo kea, “Luogwahy mara ge cuba yihru kan, beehda luogwahy mar piih now, abea nud ke dhaano me ne kiino abea kwihyu. <sup>27</sup> Ngaan nu e nuu ulog beehno ke batiena. Abea ngo unahg ngaa me duohng riha gihn me a be rom goony thool giih wuoy tiene.”

<sup>28</sup> Luub ni ge arob Joone maano e ge anaa yi paan cuohn ne Bathany loo naam Joohrdoan. Anahg kaano e ne na muoj Joone wudh nyoge ke piih ne cub luogwahy yih gen.

### *Gihr Remo Naa Acub Juoge*

<sup>29</sup> Ruuwow e Joon niid Jeacuu e beehn bange maa arube kea, “Ngaan nu beehn nu e naa gihr remo naa acub Juoge me nahg ne luog adhemuohm yaa wiil piny oogo. <sup>30</sup> E naa ngaa anaa aruba ke nyinge ge na koohba kaa, ‘Dhaano nud muu ubuodh batiena. Ngaa me tiihye wiihe ne maalo rih tiihya bang gihn ngo abeehdo e nud ke coon e a poohd kuu anyuol!’ <sup>31</sup> A ke nguda ngaa ubuodh batiena ngo kwihya

---

1:25 1:25-26 1:33; Mat 21:25      1:27 1:27 1:15; Tiihy 13:25      1:28 1:28  
10:40; Mat 3:13      1:29 1:29 1:36; 1Pii 1:19; 1Jon 2:2; Any 5:6      1:30 1:30  
1:15

nea ngo unahg ngaa me ngihde. Abea a apiih ne muoj wudh nyoge ke piih Juog bang unahy Judea ngaan ngo.”

<sup>32-33</sup> Kaano e Joon arubo ke nying gihn aniide ke wonge kea, “Ngo akwihya kejea ngo unahg ngaa me ngihde. Abea Juog ngaa aohr an ne muoj wudh nyoge ke piih arubo yihra kea, ‘Wahy Juog uniidi e luung piny wa aweehr ne beehn ne piih wiid dhaano e nuu unahg ngaa muu umuoj wudh nyoge ke Wahy Juog.’ <sup>34</sup> † Adiehr muon, Wahy Juog aniida e luung piny ke yoohn Maalo wa aweehr maa upiie wiid ngo. Kedeo ngo teeda teedo yihru kejea ngaan apiie wiie e naa waahd Juog e Ngad Boadh nyoge.”

### *Jo Waahdh Jeacuu Giih Umodho*

<sup>35</sup> Ruuwow moogo ke batiene gihn nu e Joon anaa ka cuungo ke nyoge ariow kiin jo waahdhe. <sup>36</sup> Naa aniide Jeacuu e ukahnho ke buud gen, e ake rubo kea, “Ngaan ca niidu e naa gihr remo naa acub Juoge ne Ngad Boadh nyoge.”

<sup>37</sup> Jo waahdh giih ni ariow naa alihng gene gihn arob Joone, e batiene Jeacuu abudh gene buodho. <sup>38</sup> Naa alog Jeacuu wonge, e niid nyoge ariow me buodh batiene, maa apeehye kea, “Gihn e ne daahdu?”

Maa abeehr gene ngo kob gene, “Ngad puohny yi beed kee?”

<sup>39</sup> Maa abeehre ngo kobe, “Beehnu ubeeh niidu kaa ngo.”

Maa acidh gene keehde kedeo uniid gene ka beede kedeo uriid gene bange cahng nu uwahdhe kethiehno.

<sup>40</sup> Dhaano acielo kiin yaa ariow anahg Andrya ge umiie Cimoane. <sup>41</sup> Noono uguoe aay ne cej umen. Naa ayoade

---

1:32-33 1:32 Mat 3:16 † 1:34 1:34 Waahd Juog: 1:49; 5:18-23; 10:36; 11:27; 20:31; Mat 3:17; 27:54; Tihiy 9:20 1:36 1:36 1:29 1:40 1:40-42 Mat 4:18-20 1:41 1:41 4:25

ngo e arobe yihr ngo kea, “Ngaan akwany Juoge ne Ngad Boadh nyoge ayoad wane.” <sup>42</sup> Noono ukahle ngo bang Jeacuu.

Maa amaany Jeacuue bang ngo keraahyo maa arube yihre kea, “Yih Cimoane waahd Joon, awaahn ni, nyingi unahg Ceapaj.” Lum yea beehda leelo neehn Piihter.

*Jeacuu Pihlih Maa Nathaneel Ge Acuohne*

<sup>43</sup> Ruuwow keehdo e Jeacuu wiihe apare ne ci yi piny Gaalili. Maa ayoad Pihlih kedea urube yihr ngo kea, “Mahd rih batiena.”

<sup>44</sup> Pihlih anahg ngad geen Bedhceada ka beed Andrya kedea Piihtere. <sup>45</sup> Naa ayoad Pihlihbe Nathaneel, e kobe yihr ngo kea, “Ngaan akwany Juoge ne Ngad Boadh nyoge naa agweehd Moaje ke nyinge yi kitaab Juog kedea ge agweehd agamloohngjuoge ke nyinge ngo beehda Jeacuu waahd Jocebe e ngad geen Naajaread.”

<sup>46</sup> Maa apeehy Nathaneele, “Ne gihn me kony nyoge, me beehn oogo ke yoohn Naajaread ne?”

Kob Pihlihbe, “Beehn uniidi ngo.”

<sup>47</sup> Naa aniid Jeacuue Nathaneel ubeehno e rubo kea, “Ngaan e naa ngad Yijarael me ne cohg ge be rubo ke toohd.”

<sup>48</sup> Maa apeehy Nathaneele kea, “Angeyi ke ne diih kejea a kwaad ngaa me wa gihn nu?”

Maa abeehr Jeacuue ngo yihre kobe, “Yih aniida e yih apiih yi tubo thar dhuuro maano e Pihlih yih poohd keá naa acuohne.”

<sup>49</sup> Kob Nathaneele, “Ngad puohny! Yih beehda Waahd Juog. Yih beehda ruohdh yaa Yijarael.”

<sup>50</sup> Maa abeehr Jeacuue ngo kea, “Yih ayiiho ke nying gihn aruba kaa yih aniida yi tubo thar dhuuro. Giih mooge

me doonge maa ayoohm man ge uniidi.”<sup>51</sup> Maa arube yihr gen kea, “Gihn daahda ke robo yihru ngo beehda athiir me ne cohg. Maalo ree uyabe kedea uniidu an. A ge beehda dhe yoohn cidh Paar Maalo.”

## 2

### *Jeacuu Piih Aloge Ne Koongo*

<sup>1</sup> Yi dahg nihn e kaahny anaa ke robo yi geen Kana ge yi piny Gaalili ni. Miih Jeacuu anudo thiw yu yi rob kaahny gih nu, <sup>2</sup> Jeacuu maa jo waahdhe ge acuohn yi kaahny thiw. <sup>3</sup> Naa abeehn koonge ne thumo e miih Jeacuu ake rubo yihr waahde kea, “Kuong giuh gen athum.”

<sup>4</sup> Kob Jeacuue, “Gihn e naa akahli nyinga yi giuh! Cahng tiihya yea ngo poohd kuu abeehno.”

<sup>5</sup> Maa arub men yihr yaa tiuh giuh anaa acub piny ne paahng kuong kea, “Kwaad gihn rob waahda yihru, yugo ngo.”

<sup>6</sup> Yaa Judea yihr gen na naa dhe yoohn luog cing kedea roohd cam ne wuor Juog. Ke nying gih nu, e daahy\* abiihjbeciel giuh luog rog ge anudo kaano. <sup>7</sup> Maa arob Jeacuue ngo yihr yaa tiuh giuh ni kea, “Paahngu yidh daahy ke piih.” Maa apaahng gene daahy cang ne leb leb.

<sup>8</sup> Batiene e Jeacuu acahng rob yihr gen kea, “Tuomu piih yi dag, ucubu gen yihr ukiihy duohng.”

Maa akaab gene piih ukahl gene gen yihr ukiihj. <sup>9</sup> Piih giuh alog Jeacuue ne koongo amaadhe. Abee kaa abeehn koohng nu kii ngo, ngo akwihye. (Anahg yaa atuom piih, ge ne ngahy dhe yoohn kaa abeehn koonge kii ngo.)

---

2:1 2:1-11 4:46      2:4 2:4 7:6, 30; 8:20; 12:23; 13:1; 17:1; Luk 22:53      2:6  
2:6 Mak 7:3-4      \* 2:6 2:6 Daahy ge kuu acwaahj kaa lahbo. Beehda leelo  
e ne yea koany utienge ne dag. Daahy mooge kaab jealuune dhaano aduuno  
kedea mooge kaab jealuune dhaano aduuno wonge apaar.

Noono ubeehn ukiijhe ucuohne ngad paajo urube yihr ngo kea, <sup>10</sup> “Yihdh kahnye giijh yug cang, wong koongo e ne kuong ke cubo yihr weehle umodho, batiene e koongo maa acoom ke cubo yihr gen. Abea mari wong koongo apoohd e kani kano uwahdh pinye wa gihn?”

<sup>11</sup> Gihn ni e naa gihn me teeg mar umodho me gaahy nyoge maa ayug Jeacuue. Ngo ayuge Kana ge nii Gaalili. E naa kaa anyoadh Jeacuue kaa amoar Juoge wiije ne ngaa me duohng. Gihn nu e jo waahdhe ngo ayiijh gene ne ngaa me dhiil gene kaa gaahno.

<sup>12</sup> Batiene gihn nu, e Jeacuu ke men maa wuud wahn kedea jo waahdhe ge a'aay ne ci geen Kaparnaam ne nahg nihn me noog yea.

*Yaa Ngiew Ge Ariem Jeacuue Oogo Yi Laaro Gihr Wod Juog  
(Mat 21:12, 13; Mak 11:15-17; Luk 19:45, 46)*

<sup>13</sup> Naa adoohng kar Yaan Amono cahng e Jeacuu abeehn ne aay ucidhe Jeruucalem. <sup>14</sup> Yi laaro gihr wod Juog e yuud nyoge ge ngeew dhahg kedea roohme maa jien oogo kedea yaa waar ngiijhny ge apiijh buud tharbeaje giijh gen, ne waar ngiijhny. <sup>15</sup> Noono ucwaahye thool ne keedo kedea uthube ke kool dhahg maa roohme oogo yi laaro maa ayoade tharbeaje giijh yaa waar ngiijhny ujwange gen piny kedea uyiere ngiijhny ke bang piny. <sup>16</sup> Maa aciere ngo yihr yaa ngeew jien oogo kea, “Kaabu giijh ni ukedhu gen oogo! Laaro gihr Wod Wura e ne logu ne kar cuug.”

<sup>17</sup> Gihn ni abeehn jo waahdhe ne paro wa kaa anaa agweede yi kitaab Juog naa,  
“Gihn adeehja gihn me beer ke nying laaro gihr wod Juog  
yi cwihnya,



umeehg nyoge nahg an.”

<sup>18</sup> Noono ubeehn yaa Judea, ge apahn Jeruucalem, upeehny gene Jeacuu kob gene, “Gihn noono romi ke yugo ne nyoadh ngo kejea yihri nud teeo me romi yug gihn atiihyi awaahn kan?”

<sup>19</sup> Maa abeehr Jeacuue ngo yihr gen kea, “Nea Wod Juog gihn toaru ke piny, e ngo dogaa kaa geero ucuunge batien nihn adahg.”

<sup>20</sup> Maa acahg yaa Judea ngo ke beehro yihre kob gene, “Wod Juog gihn ageer yi run jiehariow wonge abiihjbeciel kare tooro ugeeri ngo yi nihn adahg!” <sup>21</sup> Abea Jeacuu ge arube, kuu anahg Wod Juog e naa arube ke nyinge, beehda kuohme e naa arobe. <sup>22</sup> Batiene kaa acahr Jeacuue e ngo abeehn jo waahdhe ne paro kejea ne nahg gihn me na robe robo. Kaano e gihn agweed yi kitaab Juog kedea giikh na robe ge abeehn gene ne yiho.

### *Jeacuu Ne Jeruucalem*

<sup>23</sup> Ge anahg Jeacuue geen Jeruucalem, yi nihn Yaan Amono, e giikh me teeg me thoohdh me gaahy nyoge ge ayuge kedea ubeehn nyoge me thoohdhe uyiih gene ngo, ne ngaa me gaahn gene ke nying giikh nu. <sup>24</sup> Abea Jeacuu ke kur mare nyoge keá gaahno. Ge keá gaahno bang gihn par dhaano utaaahngo ngo ngahye. <sup>25</sup> Noono e kuu adaahd dhaano me rubo yihre ke nying nyoge mooge. Jeacuu ke ngude gihn nii cwihny dhaano ngo beehde ngahye.

## 3

<sup>1</sup> \* Anaa anudo ke Ujudea me duohng me nyinge Nikoadiihmuj. Ngo anahg ngad akuud yaa lum Juog me

---

2:18 2:18 2:11 2:19 2:19 Mat 26:61; 27:40; Tiihy 6:14 2:21 2:21 1Kor 6:19 2:22 2:22 1:45; 12:16; 14:26; Luk 24:6-8, 27 2:23 2:23 2:11; 6:29; 7:31; 8:30; 9:38; 10:42; 11:45; 12:42; 20:29, 31; 16:9 \* 3:1 3:1 Nikoadiihmuj; 7:50; 19:39

cuohn ne Paarijea. <sup>2</sup> Cahng man, e abeehn ka beed Jeacuue yi diehr waahr maa arube yihr Jeacuu, “Ngad puohny, ngo ngahy wane kejea Juog e naa aohr yihn. Bang gihn giuh tihiyi ge gaahy nyoge, ge be ne romi ke tihiyo nea be ne nahg Juog e naa aohr yihn.”

<sup>3</sup> Maa abeehr Jeacuue ngo yihre kea, “Athiir gihn daahda ke robo yihri e gen. Nea padh ngaa me cahg ke nyuolo keehdo e dhe yooh tooro yihre me yiuh Juoge ngo ne ngade.”

<sup>4</sup> Maa apeehey Nikoadiihmuje kea, “Dhaano ucahg ke nyuolo ke ne diih? Kare tooro me cahge ke duog yea men beere dog kaa nyuolo!”

<sup>5</sup> Maa abeehr Jeacuue ngo kobe, “Athiir gihn roba yihri beehda: ngaa me kuong Juoge ke maa ne ngade tooro nea ngaan ngo kuu acahg kaa nyuolo ke dhe yoohn luogwahy ke piuh kedea Wahy Juog. <sup>6</sup> Jo anyuol won ge naa acub wahy yihro. Abea Wahy Juog e naa acub kuowo yihr wahyo. <sup>7</sup> Yih keá gaahy yi gihn roba kejea wu cang, wu cahg kaa anyuolo keehdo. <sup>8</sup> Ka caahdh yame kii ngo ngahda ngo uneehno yihri. Awaahn ni e wiiehe log ke kun, batiene e wiiehe doge kaa log kun moogo. Abea yih ke ngudi kun beehne kii ngo kwihyi kedea kun cea yea ngo kwihyi. Ngo wa gihn thiow yihr ngaan acub Wahy Juoge kuow wahy yihre.”

<sup>9</sup> Maa apeehey Nikoadiihmuje kea, “Gihn nu ree yuge ke ne diih?”

<sup>10</sup> Maa abeehr Jeacuue ngo kea, “Yih beehda ngad puohny yaa Yijarael me duohng, yihdh giuh ni ge be romi ke ngeyo ke ne diih? <sup>11</sup> Gihn daahda ke robo yihri ngo beehda athiir. Wa rubo kaa nying gihn me ngahj maa aniid wane ke nying wan. Abea kihd dhaano acielo keewu

maa ayiih lum arob wane tooro. <sup>12</sup> Nea giuh roba yihru ke nying giuh tiuhy rog gen wiuh piny ge be yiuhu, unahg giuh roba ke nying giuh tiuhy rog gen paar Maalo ge nu uyiihu ne? <sup>13</sup> Bekihd ngaa maa akuong ci Maalo Paar Juog nea padh an, ge Juog naa adoohng ne dhaano utaahngo, e naa ngaa abeehno ke yoohn Paar Maalo. <sup>14</sup> Moaje ge anaa yi ukang, demaro maa athaahdh wa thuohl ngo anaa atuohye dhe tala utihnge ngo maalo ne thiehdh nyoge. Ke dhe yoohn nu thiow, a ge adoohng ne dhaano utaahngo a udhiil ke tihng maalo wiuh yaadh maa ariihw ne boadh nyoge. <sup>15</sup> A utihng maalo beere kwaad ngaa yiuh luma, dhe yoohn boadh wahy me guge tooro yoade yoado.

<sup>16</sup> “Juog yaa wiuh piny ge anhyaare wa ka nhyaar wuro nyethene. E naa giuh abeehn Juoge uoohre waahde wiuh piny, beere kwaad ngaa yiuh lum waahde ngo be dog thoo bang giuh boadh wahy me guge tooro ngo yoade yoado. <sup>17</sup> Juog waahde keá oohr wiuh piny ne kihm nyoge ke giuh me raaj, abea ngo aohre beere nyoge boadhe boadho. <sup>18</sup> Ngaa ayiih lum Waahd, e ngaan nu be kihm. Abea ngaa akweer ke yiuh lum Waahd, e ngaan nu ke kihmo bang giuh lum Juog keá ayiiho. <sup>19</sup> Wa kaano e naa ka kihm Juoge nyoge kii ngo, ne ngey yaa rog gen naa awuohj kedeaa yaa rog gen tooro awuohj. Daahr ge beehda adiehj Juog yoad ke bang Juog kedeaa ngo abeehn wiuh piny. Nyoge adiehj Juog ngo angey gene. Abea keehd maano e ge nhyaar giuh anyoohne ukweer gene kaa adiehj beehd ke bang Juog. <sup>20</sup> Kwaad ngaa koag ke yug giuh anyoohne, adiehj rob ke nying Juog be nhyare kedeaa adiehj nu be kuonge ke yiho. Be yihe bang giuh ngo utudo kejea anyoohne

---

3:12 3:12 12:32; 14:1-3; 17:5      3:13 3:13 Rom 10:6      3:14 3:14 Jon 8:28;  
 12:32-34; 18:32      3:15 3:15 20:31      3:16 3:16 3:36; 5:24; Rom 8:32; 1Jon  
 3:1; 4:9-10; 5:11, 13      3:17 3:17 12:47      3:18 3:18 5:22      3:19 3:19 8:12  
 3:20 3:20 Epi 5:11-13

giihe ge beehn adiehj nu ke ne nyoadho yihr nyoge. <sup>21</sup> Kwaad ngaa tiihy gihn maa akob Juoge kea ngo gihn maa adiehr, e tiihye beehn Juoge ke ne niido. Beehn Juoge ke ne niido bang gihn, gihn atiihye nyoadh ngo kejea Juog wuore wuoro.”

*Joon Arubo Ke Nying Jeacuu*

<sup>22</sup> Batiene e Jeacuu kedea jo waahdhe ge a'aay ne cidho ke bang piny Judea. Ge abeehdo kun nu ke nihn me nud keree, maano e ge muoj wudh nyoge ke piih luogwahy. <sup>23</sup> Joon thioh ngo anaa ne muoj wudh nyoge ke piih ne cub luogwahy. Wudh nyoge amuoje ke ka me cuohn ne Anon ge cahng ke Calim. Ka maa athoohdh piihe yea e naa kaa awaahd nyoge bang Joon beere ge ke muojo ke luogwahy. <sup>24</sup> (Gihn nu ree ayuge maano e Joon poohd kuu akedh yi thijin.) <sup>25</sup> Gihn nu, e jo waahdh Joon mooge ge ake thubo ke peehm ke Ujudea ke nying dhog yiehdh luog rog ne wuor Juog. <sup>26</sup> Kaano maa abeehn gene bang Joon urub gene e ge anahg tiele kejea, “Ngad puohny! Ngaan anaa bangi loo naam Joohrdoan, ge ne rubi ke nyinge, ngo ayoad wane e ngo muoj wudh nyoge ke piih luogwahy kedea nyoge me thoohdh ge non bange.”

<sup>27</sup> Maa abeehr Joone ngo yihr gen kea, “Nea padh Juog e naa arob ngo, e kwaad gihn me wa gihn nu be rom dhaano utaahnge ke tiihyo e keede ubeehn nyoge unon gene bange. <sup>28</sup> Keehd wun, e gihn na roba ngo ngahyu ge na koohba kaa, ‘A padh Ngad Boadh nyoge. A beehda ngaa maa aohr Juoge wong maalo nyum Ngad Boadh nyoge.’ <sup>29</sup> A neehn gom athiehg. Nyaakon nyuom beehda gihr athiehg. Abea gom athiehg cwihnye umihno kare noono

---

3:21 3:21 1Jon 2:4      3:22 3:22 4:1-2      3:24 3:24 Mat 4:12; 14:3      3:26  
 3:26 1:29-34      3:27 3:27 19:11; 1Kor 4:7; Judea 5:4      3:28 3:28 1:20; Mat  
 11:10      3:29 3:29 Mat 9:15

nea yea buud athiehg. E ne neehn mara, cwihnya med keraahyo gihn me kaal wiihe tooro nea Jeacuu nyinge uwiihj. <sup>30</sup> Cwihnya med keehd me jwag jo waahdhe rog gen udoohng gene thoohdh kedeajo waahdha ge udoohng noog.

<sup>31</sup> “Nгаа ne wiih piny kan, rubo kaa nying giijh yug rog gen wiih piny. Abea ngaan abeehno ke yoohn Paar Maalo ge duohng ukaale wudh nyoge cang <sup>32</sup> ngo rubo kaa nying gihn aniide kedeajo gihn alihnge. Abea poohd e ngaa maa yiih lume tooro. <sup>33</sup> Kwaad ngaa yiih lume nyoadh ngo kejea lum Juog ayoade naa adiehr. <sup>34</sup> Ngaan aohr Juoge, rob lum arob Juoge yihre bang gihn Wahy Juog acub yihre utoor gihn me daag. <sup>35</sup> Juog Wuro, Waahde anhyaare keter kedeajo uyoade giijh nyepinye cang ucube gen yi cinge. <sup>36</sup> Kwaad ngaa yiih lum Waahd Juog, yihre ne kuowo me be gug. Ngaa kweer ke lum Waahd Juog e cwihny Juog urahnyo ree, yihre utooro kuowo me be gug.”

## 4

### *Jeacuu Urubo Keehd Dhaar Camaarya*

<sup>1</sup> Akuud yaa lum Juog me cuohn ne Paarijea ngo alihng gene kejea Jeacuu wiih Joon ayoohme yi woj piih wudh nyoge ne cub luogwahy yihre gen. <sup>2</sup> (Na nahg jo waahdh Jeacuu ge na muoj wudh nyoge, abea padh Jeacuu.) <sup>3</sup> Ge anaa alihng Jeacuue lum nu e a'aay oogo Judea udoe Gaalili <sup>4</sup> maano e cor yea piny Camaarya.

<sup>5</sup> Yi Camaarya e ngo atoohg geew me nyinge Ciihcar. Geen ngo cahng ke puohdho gihn anaa acub Jeakobe yihre Jocebe waahde. <sup>6</sup> Yi puohdh nu naa abuulo me maadh me cuohn ne Abuun Jeakob. Jeacuu naa agoohg yi waahdh, e

---

3:31 3:31 8:23; 15:19; 1Jon 4:5      3:32 3:32 3:11      3:35 3:35 5:20; 10:17;  
13:3; 14:10; 17:2; Mat 11:27; 28:18      3:36 3:36 3:16      4:1 4:1-2 3:22      4:4  
4:4 4:9; Luk 9:52; 17:11, 16; Tiijh 8:4-25

ngo apiih ne yuohmo wiih abuulo maano e cahng nii diehr wihj.

<sup>7</sup> Kaano e dhaar Camaarya ake beehno ne tuom ke piih. Maa arub Jeacuue yihre kobe, “Muoja ke piih me mahdha.” <sup>8</sup> (Jo waahdh Jeacuu ge anaa yi geew ne ngiew ke cam.)

<sup>9</sup> Maa abeehr dhaar ni ngo yihre kea, “Yih beehda Ujudea kedea a beehda ngad Camaarya, a peehnyi ke piih maadh ke ne diih?” (Bang gihn Camaarya maa Judea giih nyepinye be laahw gene ke rog gen.)

<sup>10</sup> Kob Jeacuue, “Muuny gihn cub Juoge ngo kwihyi kedea ngaan kwahyo yihri ke piih kwihyi. Nea giih nu ge ni ngahyo, e ne nahg yihn e ne kwahy ke piih kedea yih ne muoja ke piih me cub kuowo yihri.”

<sup>11</sup> Kob dhaare, “Ruohdh! Wa gihn me tuomi piih keehde tooro kedea yi abuulo thuudh! Kee noono e nuu uyoadi piih cub kuowo? Anahg Jeakob kuow wan e naa awii abuun ni piny yihr wan. E ke ngude ke nyethene kedea dhahge maa diehge ge na mahdh kii yea. <sup>12</sup> Ka moogo e apari kejea yih ne duohng rih Jeakob kuow wan ne!”

<sup>13</sup> Maa abeehr Jeacuue ngo kea, “Kwaad ngaa maadh piih ni, ngo cahg riowe kaa naah keehdo. <sup>14</sup> Abea ngaa maadh piih cuba, ngo be cahg riowe ke naah. Piih cuba ge udoohng wa aloohn piih yi kuohme. Aloohlo me muoj ngo ke piih cub kuowo kedea umuoje ngo tiehd keehd dhe yoohn kuowo me guge tooro.”

<sup>15</sup> Kob dhaar ni, “Ruohdh muoj an ke kwaad piihi noono. Muoj an beere a be cahg riowe ke naah kedea ubahnge an be beehn kan ne tuom ke piih keehdo.”

<sup>16</sup> Kob Jeacuue, “Cidhi ne cuohn cuori kedea ubeehnu tiehd keehde.”

<sup>17</sup> Maa abeehr dhaare ngo kea, “A beehdo e yihra tooro dhecuow.” Kob Jeacuue, “Lumi athiir ge arobi ngo kejea yihri tooro dhecuow. <sup>18</sup> Yihri anaa cuow abiihj maa anyuom yihn kedea ngaan beehdi keehde awaahn ni padh cuori maa anyuom yihn. Lubo maa adiehr e naa arobi yihra.”

<sup>19</sup> Maa aduog dhaare ngo yihre kea, “Angeya arumo kejea yih beehda agamloohngjuog. <sup>20</sup> Ge kuow wan, wa yaa Camaarya, Juog na wuor gene ke wiih good ca ge neehn ke kan kedea e naa ka poohde e ngo wuor wane wuoro yea, abea wu yaa Judea kobu nahge ke Jeruucalem e ne cidh wane yea ne wuor Juog?”

<sup>21</sup> Kob Jeacuue, “Nyaakaahy! Lihng gihn roba yihri naa athiir. Nud ke cahng muu ubahngge nyoge Juog Wuor buu ucahg gene ke wuoro wiih good gihn robi wale yi Jeruucalem. <sup>22</sup> Wu yaa Camaarya, Juog kwihyu kedea gihn wuor Juog ke nyinge kwihyu. Abea mar wan, wa Judea Juog e ne wuor wane, ke nying gihn nu e naa gihn aay dhe yoohn boadh nyoge ke bang wan. <sup>23</sup> Cahng arob ngo aguo wahnho. Cahng meehg Wahy Juoge nyoge wuor Juog, wa ka nahge Juog Aciehg. Yaa umeehg Wahy Juoge wuor Juog ge naa yaa adaahd Juoge uwuor gene en. <sup>24</sup> Juog e naa ngaa cub kuowo kedea Juog rom nyoge kaa wuoro wa ka nahge Juog Aciehg nea ge amuoj Wahy Juoge ke kuowo me nyaahn me meehge gen wuor Juog.”

<sup>25</sup> Maa akoohb dhaare kea, “Ngo ngahya kejea Ngad Boadh nyoge ngo ubeehn. Kedea nea ngo abeehno, e giih nyepinye cang ge urobe yihr wan.”

<sup>26</sup> Kob Jeacuue, “Beehda an e naa Ngad Boadh nyoge. A ge rubo ke yihn!” <sup>27</sup> Nye kaano e naa kaa aduu jo waahdh

Jeacuue ke yoohn geew. Naa aniid gene Jeacuu urubo ke dhaago e ge acwaahng. Abea ngaa maa apeechny dhaar ni tooro kiin gen kejea, “Yih daahd gihn bang Jeacuu?” Thiow ngaa maa apeechny Jeacuu tooro kea, “Yih rob gihn ke dhaar ni?”

<sup>28</sup> Kaano e dhaar nu dag piih gihre awiie ke wiih abuulo udoe geew maa arube yihr nyoge kea, <sup>29</sup> “Beehnu ne niid ngaa arob giin reje naa atiihya oogo cang. Ka moogo e ngo unahg Ngad Boadh nyoge.” <sup>30</sup> Maa a'aa nyoge ne ci ne maany Jeacuu.

<sup>31</sup> Abea maano e jo waahdh Jeacuu ge nii ne lug ngo kejea cahme kob gene, “Cedhree! Ngad Puohny tum gihn me thiin ke camo.”

<sup>32</sup> Maa abeehre ngo yihr gen kobe, “A acahmo, abea gihn acama ngo kwihyu.”

<sup>33</sup> Kaano e jo waahdhe ge athubo ke rob ke kiin gen kob gene, “Ka moogo e ngaa maa akahl cam yihre nud!”

<sup>34</sup> Kob Jeacuue yihr gen kea, “Cam mara beehda tiihy gihr ngaa aohr an uwahdhe ka ukeehla tiihy ngo guge. <sup>35</sup> Ngahda na ke teedo naa, ‘Adoohng dwahde abiihj ukaj uleela?’ Abea beeh teeda ngo yihru kejea yaa ayiih luma ge ne room ke beel me kaj. Maanyu kaa adoohng uleele kii ngo yi puohdho. Uleela wiihe adoohng kwaar ngo daahd ukaye. <sup>36</sup> Ngaan kay ngo ke koogo. Kaano e ngaa apuro kede a ngaa akahyo cwihny gen umihno cang. <sup>37</sup> E naa kaa abeehn gihn ne caal naa, ‘Ngaan moogo ngo ngad puur abea ngaa moogo e naa ngad kaj.’ <sup>38</sup> Wu aohra ne kaj yi puohdho me padh wun naa apuur ngo. Nyoge mooge ge naa apuro kede a ubeehnu ne yoad gihn me beer yi tiihy gen.”

---

4:29 4:29 Mat 12:23 4:34 4:34 6:38; 8:28; 12:49-50; 14:31; 15:10; 17:4  
4:35 4:35 Mat 9:37; Any 14:14-20



<sup>39</sup> Abea kiin yaa Camaarya nyoge me thoohdh lum Jeacuu ayiih gene bang gihn akob dhaage kea, “Kwaad giikh atiihya cang ge arobe yihra.” <sup>40</sup> Gihn nu e yaa Camaarya ge abeehn bang Jeacuu maa arob gene ngo yihre kejea beehde keehd gen. Maa abeehd Jeacuue keehd gen ke kar nihn ariow. <sup>41</sup> Naa alihng gene giikh arob Jeacuue e nyoge mooge thioiw me thoohdh lum ngo ayiih gene.

<sup>42</sup> Noono maa akoohb gene yihr dhaar ni kejea, “Awaahn ni lume ayiih wane, padh ke nying gihn arobi yihr wan, abea bang gihn wa keed wan lume alihng wane. Ngo angey wane ne cohg kejea e naa Ngad Boadh yaa wiikh piny.”

#### *WaaHD Apahno Athiehdh Jeacuue*

<sup>43</sup> Naa anahg Jeacuue nihn ariow e adoog kuu utiene ne ci Gaalili. <sup>44</sup> Beehde e gihn maa anaa arob Jeacuue kea, “Ngad agamloohngjuog be kuong yaa paar gene ke yiiho kejea ngo agamloohngjuog.” <sup>45</sup> Naa awahnhe Gaalili e ngo alor beer mee. Yaa alor ngo beehd yaa aduuo ke yoohn Jeruucalem kaa aniid gene giikh anaa atiihy Jeacuue yihdh nihn Yaan Amono.

<sup>46</sup> Kaano e Jeacuu abeehn ne ci Kana, yi Gaalili, geen anaa aloge piikh ne koongo yea. Apahno gihr akuumo, me waaHde tuu yi geen Kaparnaam, anaa anudo. <sup>47</sup> Naa alihnge bang Jeacuu kejea ngo abeehno ke yoohn Judea e ngo acidh bang Jeacuu. Acidho ne kway wong ngo beere caa Kaparnaam ne thiehdh waaHde ge cahng ke thoo.

<sup>48</sup> Maa arub Jeacuue yihr gen kea, “Nea padh gihn me gaahy nyoge me teeg e ne niidu ke nyingu, e wu be kuong yiiho.” <sup>49</sup> Kob apahne, “Ruohdh! Beeh cidho ke yihn piow piow e waaHda wonge poohd nud.”

<sup>50</sup> Maa arob Jeacuue ngo yihre kea, “Cidhi. Waahdi ubodh.”

Nyin lum Jeacuue ayiie kedea uthube ke dog paare. <sup>51</sup> Yi yooh e ake roohmo keehd yaa tiijj giie maa ateed gene ngo yihre kob gene, “Waahdi ngo adoohng ne ngaa maa abodh.” <sup>52</sup> Maa apeeध्ये gen kejea weehne e naa angweehn atwaany waahde. Kob gene, “Atwaany abeehn ne ngweehno yi laahng cahng.”

<sup>53</sup> Maa abeehn apahne ne ngey ngo kejea beehda nye kaa anaa arub Jeacuue yihre kea, “Waahdi ubodh.” Noono e en maa jo paare ge adoohng ne nyoge maa ayiioh.

<sup>54</sup> Gihn nu e naa riown giij gaahy nyoge naa atiihy Jeacuue yi piny Gaalili naa aduue ke yoohn Judea.

## 5

### *Jeacuue Ngaa Maa Abab Piny Athiehdhe Dieng Paahl*

<sup>1</sup> Ke batien gihn nu, e Jeacuue abeehn ne ci Jeruucalem bang gihn yaa Judea yihr gen anaa yaay me ge dhiil ci Jeruucalem ke nyinge. <sup>2</sup> Abea buud ka cuohn ne Ciihb Gead\* nud ke paahl. Buud paahl atieg piny ke pehme abiihj kedea uyoah kaano ucuohne ne Paahl gih Bedhjadha ke dhog Judea. <sup>3</sup> Amahr nyoge maa atwaany ge abudo ke bang thaahdh pehme. Nyoge maa acoor kedea ngoohde kedea nyoge maa abaahl. Ge akoar piih paahl utihng gene rog gen. [ <sup>4</sup> Bang gihn wuohnjuog na kwaay cidho yi paahl ne ciehr yihdh piih. Nea ge acier, e ngad atwaany ge kuong mono yihdh piih umodho e kwaad atwaany anaa ree ngo uaay.]<sup>†</sup> <sup>5</sup> Dhaano maa abeehd e

---

4:53 4:53 2:23    4:54 4:54 2:11    \* 5:2 5:2 Ciihb Gead: Ngo beehda dhe roog gihr geen Jeruucalem e ne cuohn wa maano. Jeruucalem beehde e ngo acier piny ke roog. Acuohn wa gihn bang gihn kaano e nahg paahl me yea ne piih.    † 5:4 5:4 Luub 3-4 ge kuu anaa yihdh wargae

atwaany ke kar run dhaano aduuno wonge apaar wonge abiihjbedahg anaa anudo buud paahl. <sup>6</sup> Jeacuu naa aniide nyin kedeaa naa angeye ngo kejea abeehdo piny ke twaany ke run me thoohdh, e ngo acidho bang ngo. Noono maa apeehnye ngo kea, “Cwihnyi ne bange uthiehdh yihn ne?”

<sup>7</sup> Maa abeehr nyine ngo kobe, “Ruohdh, yihra tooro dhaano me tihng an ne kedh yihdh piih kaano tihng piihe rog gen. Noono e thuba kaa a tum cidho yihdh piih, e a guo ngaa mooge kaa yoohmo unahge e ne kuong cidho yihdh piih.”

<sup>8</sup> Kob Jeacuu yihre, “Yedh maalo ukaabi belo gihri ucaahdhi.” <sup>9</sup> Wong kaano e nyin ree ayoade e athiehdh. Noono ukaabe belo gihre uthube thubo ke waahdh.

Gihn ni ree ayuge ke cahng Cabadh ge beehda cahng yuohmo gihr Judea <sup>10</sup> maa abeehn ruohdh Judea giih Jeruucalem urub gene yihr ngaan athiehdh kob gene, “Loohnge mooge ge beehde e yihdh ge adhahli bang gihn belo gihri kaahni kaahno cahng yuohmo.”

<sup>11</sup> Maa abeehre ngo yihre gen kea, “Ngaa athiehdh an, e naa arob ngo yihra kejea kaaba belo gihra.”

<sup>12</sup> Maa adog gene piehj, “Beehda ngaa e naa arob ngo yihre kejea kaabi belo gihri uci paajo?”

<sup>13</sup> Abea ngaan athiehdh en akwihye, bang gihn nyoge ge athoohdho ke raahyo noono e Jeacuu arwaahnyo yihre kiin nyoge.

<sup>14</sup> Cahng nu e ngaan athiehdh ayoade Jeacuu yi Laaro gihr Wod Juog maa arube yihre ngo kea, “Awaahn ni, yih adooing ne ngaa maa athiehdh. Wii yug giih adhemuohm beere gihn me raaj me kaal wiih man be pahdh wihi.” <sup>15</sup>

---

5:8 5:8-9 Mat 9:6-7 5:9 5:9 5:16, 18; 7:21-22; 9:14; Mak 2:27-28 5:13  
 5:13 6:15; 11:54; 12:36; Mat 8:18; 13:36 5:14 5:14 Mat 9:2; Jeam 5:16 5:15  
 5:15 9:11

Kaano e ngo ake aay maa acea ne teed ngo yih ruohdh yaa Judea kejea beehda Jeacuu e naa athiehdh en.

<sup>16</sup> Noono arumo, uthub ruohdh yaa Judea ke tiehng ngo ater ke nying gihn athiehdhe dhaano cahng Cabadh.

<sup>17</sup> Maa abeehr Jeacuu ngo yih ruohdh Judea ne jaahy gihn arob gene kea, “Juog Wura, uwahdhe yi caang rubo awaahn ni, ngo beehde e utiihyo e naa gihn tiihya thiw.”

<sup>18</sup> † Ke nying lum nu, e yaa Judea ge athubo ke daahd dhe yooch me nahg gene Jeacuu. Ge daahd unahg gene ngo, padh ke nying gihn atiihye cahng Cabadh, abea ke nying gihn arome wiihe ke Juog naa acuohne ngo ne wahn.

### *Gihn Nweehd Wuro Keehd Waahd*

<sup>19</sup> Maa abeehr Jeacuu ngo yih gen kobe, “A rob athiir yihru. A ge adoohng ne dhaano utaahngo ni, gihn me roma tiihyo a keeda tooro. A yug kwaad gihn niida ge tiihy Wura bang gihn kwaad gihn tiihy Wuro e naa gihn tiihy Waahde thiw. <sup>20</sup> Bang gihn Wuro Waahde anhyaare kede a unyo adhe kwaad gi ih tiihye yih r Waahde. Adiehr kede a wu ugaahy bang gihn gi ih me teeg me yooch muu ni ge unyo adhe yih r Waahde. <sup>21</sup> Wa kwaad ka beehn Wure utahnge yaa athow kede a ucube kuowo me ne cohng yih r gen, ke dhe yooch nu thiw e Waahd, kuowo me ne cohng ucube yih r ngaa me daahde. <sup>22</sup> Thiw Wura ngaa me cahge ke kihme tooro, bang gihn kihm nyoge awiie yi cing Waahde, <sup>23</sup> beere nyoge cang Waahd dhiil gene kaa wuoro wa kwaad ka wuor gene Wuro. Nea ngaa be wuor Waahd e Juog Wuur ge aohr Waahde ni, ngo be wuore thiw.

---

† 5:18 5:18 Me nahg gene: Mat 14:5; Jon 7:1, 25; 8:37, 40; 11:53 Wahn kede a Waahd: 1:34; 3:35; 8:16-19; 10:17-18, 29-38; 14:8-11, 20, 28; 15:9-10; 16:27-28; 17 5:19 5:19 1:34 5:20 5:20 3:35 5:21 5:21 Rom 4:17; Epi 2:5; Jon 11:25 5:22 5:22 3:18; 5:27, 30; 9:39; 12:47-48; Tiihy 10:42; 1Jon 2:28 5:23 5:23 Pihp 2:10-11

*Cahng Lug Ge Ubeehn Waahd Juoge Ukihme Nyoge*

<sup>24</sup> “Adiehr e ne roba yihru, ngaa lihng luma kedea uyihe lum Juog ngaa aohr an, e ngaan nu yihre ne kuowo me ne cohg kedea buu ukihm cahng lug. Buu ukihm cahng lug bang gihn thoo aloge ngahye udoohnge yi yoohn kuowo me ne cohg. <sup>25</sup> Athiir e ne roba yihru, cahng arob ge ulihng duona ngo abeehno awaahn ni. Yaa ulihng duona utiihy gene gihn ateeda yihr gen, ge nuu uyoahd kuowo me ne cohg. <sup>26</sup> Me neehn ka nahge Juog e ne cub kuowo me ne cohg yihr nyoge, ke dhe yoohn nu thiow e Juog Waahde ameehge cub kuowo me ne cohg yihr nyoge, <sup>27</sup> kedea tee ne kihm nyoge acube yihra a ge adoohng ne dhaano utaahngo ne boadh nyoge ke nying gihn nahga Waahd Juog.

<sup>28</sup> “Wu keá gaahy yi gihn daahda ke teedo yihru awaahn ni, bang gihn nud ke cahng muu ubeehn yaa athow ge beed yihdh leehde giih gen ulihng gene duona ke kar gen cang, <sup>29</sup> kedea upahr gene oogo yihdh leehde. Jo ayug giih me beeye ge ucahr kedea uyoahd gene kuowo me ne cohg. Abea jo ayug giih me reje ge ucahr kedea ge ukihm.

*Athiir Gihn Rob Ke Nying Jeacuu*

<sup>30</sup> “A be rom yug nyepinye ke teeg mara a keeda kedea nyoge ge kihma kaa dhe yoohn arob Juoge yihra. E naa gihn ngahya lug noono bang gihn a be tiihy gihn daahd aduuna abea a tiihy gihn daahd ngaa aohr an.

<sup>31</sup> “Nea a rubo yihru kaa nying mar nguda keede, e gihn roba ngo be kuong ke yiho wa gihn maa athiir.

<sup>32</sup> “Abea Juog Wura e naa arob gihn ngahya ke nyinge kedea ngahya kejea gihn teeda ke nyinge ngo beehda

---

5:24 5:24 3:16; 5:22; 6:35; 8:51; 10:28; 11:25-26; 14:6; 17:2; 20:31; 1Jon 2:25;  
3:14 5:25 5:25 11:43; Mak 5:41; Luk 7:14 5:26 5:26 1:4 5:29 5:29  
11:24 5:30 5:30 4:34 5:31 5:31-32 5:36

athiiir. <sup>33</sup> Joon e naa ngaa anaa aoohr dhog yihre kedea maa abeehn Joone urobe gihn maa athiir ke nyinga yihru.

<sup>34</sup> Gihn rob dhaan utaahnge ke nyinga padh en ne daahd ne nyoadh ngo kejea a beehda ngaa. A rubo kaa nying gihn arob Joone ke nyinga beere Juog wu boadhe boadho.

<sup>35</sup> Giih atiihy Joone ne kedh nyoge bang Juog ge anaa ake liel wa gihl lamba maa a'ahb kedea ubeehdu ke nye nihn me noog e cwihnyu med ke nying tiihye e liel wa maay lamba ge anaa anhyaaru.

<sup>36</sup> “Abea gihn tiihya nyoadh adiehr me ne cohg ke nyinga, ke dhe yooh me yoohm dhe yoohn mar Joon naa arobe ke nyinga. Giih tiihya beehda Wura e naa acub gen yihra ne tiihyo kedea ge ne rubo ke nyinga maa ge ne nyoadh ngo kejea beehda Wura e naa aoohr an. <sup>37</sup> Thiow Wura ke ngude ge aoohr an ngo urubo ke loohnge me nyoadh athiir ke nyinga. Keehd me bahnge duone kuu alihngu kedea kuohme kuu aniidu e gihn maa anyoadhe nud ke nyinga. <sup>38</sup> Kedea wu akweer ke meehg luub Wura beehdo yi cwihnyu bang gihn luma a ngaa aoohre ngo be yiihu. <sup>39</sup> Wu abuohtj ke cej yihdh giih anaa agweed cuohnu kuu e nuu uyoadu dhe yoohn kuowo me ne cohg. Abea ukwihyu ngo kejea giih agweed ge rubo kaa nyinga. <sup>40</sup> Kedea wu poohd ukweer ke beehn banga beere wu ukwahnyo ke luube noono e kuowo me ne cohg yoadu yoado.

<sup>41</sup> “Padh leej gihl nyoge e ne daahda bang uleej gene an. <sup>42</sup> Wu beehda kwaad nyoge me ngahya ne cohg: Wu nyoge me be nhyaar Juog. <sup>43</sup> A abeehno, bang gihn Juog e naa aoohr an ne rob ke nyinge maa akweeru bang gihn aparu kejea padh e naa aoohr an. Abea nea dhaano beehn

---

5:33 5:33-34 1:15, 19, 34 5:36 5:36 10:25, 38; 14:10-11; 15:24, 27 5:37  
5:37 1:34 5:38 5:38 16:9 5:39 5:39 Luk 24:27, 44; Tiihy 13:27; 17:11;  
2Tim 3:15-16; 1Pii 1:10-11 5:41 5:41 7:18

bangu ke kar wiihe e kuu aohr Juoge e lume yiihu yiiho. <sup>44</sup> Cwihnyu umihno nea wu piih ne leej rogu. Abea wu be daahd utiihyu ke dhe yoooh me mihn cwihny Juoge rogu uleeye wun. Angahya ne cohg kejea wu akweer ke yiih luma.

<sup>45</sup> “Wudhu keá paru kejea a ucidh ne luom wun yihr Wura. Padh an e nuu uluohmo, abea ngaa uluom wun beehda Moaje ge gaahnu, e nuu uluom wun. <sup>46</sup> Nea giih agweed Moaje ge nuu yiiho, e luma nuu yiihu bang gihn giih agweed Moaje ge agweed kaa nyinga. <sup>47</sup> Abea ge bahnge giih agweede kuu ayiihu, e gihn teeda uyiihu kaa naa diih?”

## 6

*Nyoge Alihbe Abiihj Ge Ayaahnge Jeacuu Kaa Amune Me Noog*

*(Mat 14:13-21; Mak 6:30-44; Luk 9:10-17)*

<sup>1</sup> Cahng man ke batién giih nu e Jeacuu abeehn ne ci loo naam duohng gihr Gaalili.\* <sup>2</sup> Akuud nyoge me thoohdh ge beehdo e ge na buodh batiene bang gihn giih me gaahy nyoge me thoohdh naa athiehdhe nyoge maa ayuge ke tee Juog ge aniid gene. <sup>3</sup> † Noono e Jeacuu maa jo waahdhe ge ayedh wiih good upiih gene ne puohny nyoge. <sup>4</sup> Yaan Amono gihr yaa Judea ngo anaa adoohng cahng.

<sup>5</sup> Naa amaahny Jeacuu, e niid amahr nyoge me beehn ka nea yea. Maa arube yihr Pihlihb kobe, “Kee e nuu ungeewo amune yea yihr yaa ni?” <sup>6</sup> Pihlihb apeeध्ये wa gihn nu bang gihn adaahd utume ngo. Gihre naa adaahde ke tiihyo ngo abeehde e ngo ngahye.

---

5:44 5:44 5:41 5:46 5:46 Luk 24:27; Jon 6:14; Tiihy 3:22; 7:37 5:47  
 5:47 Luk 16:29-31 \* 6:1 6:1 Wale naam duohng gihr Tiberya neehn ka ne  
 cuohne. 6:2 6:2 Mat 6:25; Jon 2:23 † 6:3 6:3 Good: Mat 5:1; 15:29; Mak  
 3:13; 6:46; Luk 22:39 6:4 6:4 2:13

<sup>7</sup> Maa abeehr Pihlihbe ngo yihre kobe, “Beere e dhaano acielo uyihdo ke nye goan amono e ngo daahd kar ngiihny tiijh cahng acielo me cub yihr nyoge jiehabiihje ariow ge ne rom ngeew amune.”

<sup>8</sup> † Ngad oohr acielo me nyinge Andrya ge umiih Cimoane Piihter ni, ayedh maalo urube yihr Jeacuu kea, <sup>9</sup> “Nyedhoohg nud kan me yihre naa amune abiihj kedeja rej ariow cog. Abea rog gen upaahng gene ke ne diih yihr yaa ni thoohdh?”

<sup>10</sup> Maa arub Jeacuue kea, “Robu ngo yihr yaa nu upiih gene piny cang.” (Anahg ka me yea ne lum). Noono upiih nyoge cang. Cuow anudo ge anahg kar alihbe abiihj. <sup>11</sup> Maa akaab Jeacuue amune, umuohye koohr Juog kedeja ucube gen ne paahngo yihr nyoge. Thiow rej ge akaabe umuohye koohr Juog ucube gen ne paahngo yihr nyoge.

<sup>12</sup> Naa athum nyoge ke cam cang, e Jeacuu arubo yihr jo waahdhe kea, “Congu goan amune giijh adoohng cang utoor mooge me doohng piny ne rahnyo.” <sup>13</sup> Noono ucong gene goan amune giijh adoohng kedeja upaahng gene diide apaar wonge ariow.

<sup>14</sup> Naa aniid nyoge giijh me gaahy nyoge naa atiihye, e ge athubo ke rob kob gene, “Adiehr ngaan beehda Ngad Boadh nyoge naa akob Moaje kejea ngo ubeehn wiijh piny.” <sup>15</sup> Batien kaa amodh Jeacuue ngo kejea yaa ni ge daahd uroony gene ngo ne ruohdh wa ka daahd gene, e ree aloaye oogo ucea wiijh good.

*Kaa Acaahdh Jeacuue Ke Wudh Piih  
(Mat 14:22-33; Mak 6:45-52)*

<sup>16</sup> Ke wong thiehn, e jo waahdhe ge aci wiijh naam duohng <sup>17</sup> kedeja upaahr gene yi baabuur ne dog naam

---

† 6:8 6:8 Andria: 1:40; 12:22; Mat 4:18; Mak 13:3 6:11 6:11 21:9, 13 6:14  
6:14 Jon 1:21; 2:11; 5:46; 7:40; Tiijh 3:22-23 6:15 6:15 5:13; 18:36



duohng ke ngolo beere ge caa Kaparnaam. Jeacuu anaa atooro bang gen keehd maa ayuudh pinye. <sup>18</sup> Yi yuudh piny e deeh yamo me teeg ree anaa atihnge kaa athewo yi naam duohng. <sup>19</sup> Ge anaa akiiw gene baabuur ke kar meale adahg wale angween, e Jeacuu ree angule ke buud baabuur gihn nahg gene yea, uniid gene ngo e ucaahdho ke wudh piih utud gene. <sup>20</sup> Abea Jeacuu akoohbo yih gen kea, “Beehda an! Wu keá tud.” <sup>21</sup> Noono e cwihny gen anaa bange ubeehn Jeacuue bang gen yi baabuur. Kedeá kaano piow piow e baabuur aguo wahn dhē waadh kaa anaa adaahd gene ke cwihny gen.

*Nyoge Ge daahd Kar Jeacuu*

<sup>22</sup> Ge anaa ayaahng Jeacuue nyoge aliihbe abiihj, e ge anaa aniid yaahy acielo cog kaano acahm gene yea kedeá ngo angahy gene kejea Jeacuu kuu anaa a'aay keehd jo waahdhe. <sup>23</sup> Ruuwow e baabuure mooge ge anudo kaa anaa amuhj Jeacuue koohr Juog ge ayaahng nyoge kaa amune. Ge anaa abeehno kaa yohn Tiberya. <sup>24</sup> Naa angey nyoge ngo kejea Jeacuu kedeá jo waahdhe ge tooro kaa anahg gene yea, e ge ayedh yihdh baabuure giij ci Kaparnaam ne daahd Jeacuu.

*Jeacuu E Naa Amon Kuowo*

<sup>25</sup> Naa ayoad nyoge Jeacuu loo naam duohng kaa abeehn gene yea, e ge apeehyo kob gene, “Ngad puohny! Yih awahn kan ke ne diih?”

<sup>26</sup> Maa abeehr Jeacuue ngo kea, “A rob athiir yihru: A be daahdu kaa nying giij me gaahy nyoge naa atiihya ge niidu ke nyingu ni ne nyoadh ngo kejea a beehda Ngad Boadh nyoge, abea ke nying amono naa acamu kedeá uyahngu. <sup>27</sup> Wu keá tiihyo cog ke nyinga abea tiihyu keraahyo ne yiij luma ge cub kuowo me ne cohg yihru.

E naa cam gihn ucuba yihru, a ge adoohng ne dhaano utaahngo, bang gihn Juog Wuur e naa akoohbo kejea tiihya beer.”

<sup>28</sup> Maa arub gene yihr ngo kob gene, “Gihn e nuu urom wane ke tiihyo nea wa daahd uyug wane gihn daahd Juoge?”

<sup>29</sup> Maa abeehr Jeacuue ngo yihr gen, “Gihn daahd Juoge utiihyu ngo beehda uyiihu luma a ge aoohr Juoge.”

<sup>30</sup> Batiene e ge arubo yihr ngo kob gene, “Kea noono tiihy gihn me gaahy nyoge uniid wane ngo beere lumi yiih wane yiiho. <sup>31</sup> Ge kuow wan naa acoon ge anaa amuoj Moaje ke cam me cuohn ne maana yi ukang wa kaa anaa agweede yi kitaab,

‘Cam acube yihr gen ke yoohn Paar Maalo.’ ”

<sup>32</sup> Kob Jeacuue yihr gen kea, “Arob adiehr yihru. Cam gihn acub Moaje yihru padh cam me Moaje e naa acub ngo, abeehno kaa yoohn Paar Maalo. Wura e naa ngaa cub cam me ne cohg yihru ke yoohn Paar Maalo. <sup>33</sup> A ge abeehno ke yoohn Paar Maalo kedea a ge cub kuowo me ne cohg yihr nyoge wiih piny kan ni, a naa amono gihn acub Juoge.”

<sup>34</sup> Maa apeehy gene, “Ruohdh! Kwaay amono gihn nu kaa cubo yihr wan ke cahng cahngo.”

<sup>35</sup> Maa akob Jeacuue ngo yihr gen kea, “A naa cam ge cub kuowo me ne cohg yihr nyoge ni. Ngaa beehn banga kedea uyiihe luma e ngo be kuong kahje ke naah kedea be nahg riowe thiow. <sup>36</sup> Abea a rob athiir yihru kejea keehd maa aniidu an, e luma poohd be yiihu. <sup>37</sup> Kwaad ngaa acub Wura yihra ngo beehn banga udoohnge ne ngad batiena. Kedea ngaa adoohng ne ngad batiena

---

6:29 6:29 2:23      6:31 6:31 Jon 6:49      6:33 6:33 6:41, 51      6:34 6:34  
 4:15; Mat 6:11      6:35 6:35 4:13-14; 6:48-58; 7:37      6:36 6:36 16:9; 20:29  
 6:37 6:37 17:2, 24

ngo be kuonga ke riem oogo batiena. <sup>38</sup> Bang gihn a abeehn wiih piny kan ne yug gihn daahd Juoge ngaa aoohr an, abea a kuu abeehn ne yug mara me daahda. <sup>39</sup> E naa gihn daahd ngaa aoohr an kejea yaa acube yihra ge keá meehga aay oogo batiena kedea meehga gen cahro cahng lug uyoaad gene kuow me guge tooro. <sup>40</sup> Gihn daahd Wura beehda ubeehn kwaad dhaano unghaye ngo kejea a beehda Waahd Juog kedea uyiihe luma. Kaano arumo e kuowo me ne cohg ke cubo yihre kedea meehga ngo cahro yi gug nihn.”

<sup>41</sup> Yaa Judea ge athubo ke ngoan ke piny ke nying gihn arob Jeacuue kea, “A naa amono gihn abeehno ke yoohn Maalo.” <sup>42</sup> Maa akoohb gene, “Nghada nyin beehda Jeacuu ge waahd Jocebe ni? Wahn kedea men wa ge ngahyo. Ngo rom rob ke naa diih kea e beehn kaa yoohn Maalo Paar Juog?”

<sup>43</sup> Maa abeehr Jeacuue ngo yihr gen kea, “Cuungu! Wu keá ngoan ke kiin nu. <sup>44</sup> Ngaa me beehn banga tooro nea padh Wura ge aoohr an ni, e naa akahl ngo banga kedea ngo umeehga cahro cahng gug piny. <sup>45</sup> Agweed yihdh kitaabe giig agamloohngjuog naa,  
‘Beehda Juog e ne puohny kwaad dhaano utaahngo  
kedea kwaad ngaa lihngo  
kedea ukwaye Juog e ngaan nu beehn banga.’

<sup>46</sup> Bekihd dhaano maa aniid Juog Wuur nea padh ngaa abeehno ke bang Juog. Beehda a cog, e naa aniid Juog.

<sup>47</sup> Beehda gihn maa athiir e ne roba yihru, kwaad ngaa ayiih luma yihre ne kuowo me ne cohg. <sup>48</sup> A naa amono gihr kuowo me ne cohg. <sup>49</sup> Ge kuowu amono cuohn naa maana anaa acam gene yi ukang kedea uthow gene.

---

6:38 6:38 4:34; Mat 26:39      6:39 6:39 10:28; 17:12; 18:9      6:40 6:40 5:24;  
6:44, 54; 11:24      6:42 6:42 Mat 13:55      6:46 6:46 1:18      6:48 6:48-50  
6:35; Any 2:17      6:49 6:49 6:31

<sup>50</sup> Abea amono gihn ruba ke nyinge ni, e naa amono gihn abeehn ke yoohn Paar Maalo kede a e naa kwaad amono me nea acam dhaane, e yihre naa kuowo me ne cohg me ngo be thow. <sup>51</sup> A ke nguda a naa amono gihn abeehno ke yoohn Paar Maalo ge cub kuowo me ne cohg! Ngaa cam amono gihn nu e ubeehdo e be thow. Amono gihn ucuba beehda kuohma e ne cuba beere kuowo me ne cohg nud yihr nyoge wiih piny.”

<sup>52</sup> Noono e yaa Judea cwihny gen arahnyo ke nying gihn arob Jeacuue uthub gene ke peehm ke kiin gen kob gene, “Ngaan kuohme ucube ne camo yihro ke ne diih?”

<sup>53</sup> Kob Jeacuue yihr gen, “A rob athiir yihru: nea padh kuohma a ge adoohng ne dhaano utaahngo e ne camu kede a umaadhu rema, e kuowo me ne cohg tooro yihru.

<sup>54</sup> Ngaa cam kuohma kede a umaadhe rema e ne yihre ne kuowo me ne cohg kede a ngo umeehga cahro cahng gug piny. <sup>55</sup> Ke nying gihn nu, kuohma e naa cam me ne cohg kede a rema e naa gihn me maadh me ne cohg. <sup>56</sup> Kwaad ngaa cam kuohma kede a umaadhe rema, e ngaan nu a anweehd keehde. <sup>57</sup> Juog ge cub kuowo yihr nyoge ni, e naa aohr an kede a e naa acub kuowo yihra. Ke dhe yoohn nu acielo nu nea ngaa cam kuohma e kuowo me ne cohg cuba cubo yihre. <sup>58</sup> Gihn ni e naa amono gihn abeehno ke yoohn Paar Maalo. Ngo be room kaa amono gihn acam ge kuowu kede a uthow gene keehd maa acam gene ngo. Abea kwaad ngaa abeehdo e cam amono gihn cuba, yihre unaa kuowo me be gug.” <sup>59</sup> Giih ni ge arob Jeacuue e upuohnyo yi wod amaad yi paan cuohn ne Kaparnaam.

### *Jo Buodh Batien Jeacuu Me thoohdh Ge Agoohd Oogo*

<sup>60</sup> Yaa buodh batién Jeacuu me thoohdh gihn ni alihng gene kedeá urub gene kejea, “Giih robe yihdh gen teeg keter. Ngaa noono rom gen ke yiiho.”

<sup>61</sup> Keehd ngaa maa arob ngo yihre tooro, e ngo abeehn Jeacuue ne ngeyo kejea yaa ni ge ngoan kaa nying giih apuohnye. Noono urube yihr gen kea, “Gihn ni cwihnyu araanye ne? <sup>62</sup> Nea a ge adoohng ne dhaano utaahngo niidu niido e a adog kara ge ne beeda coon, e wu urob gihn? <sup>63</sup> Wahy Juog e ne cub kuowo, abea kuowo me cub teeg dhaan utaahnge tooro. Luube giih aroba yihru ni, ge ne meehg wun yoad Wahy Juog ge cub kuowo yihru. <sup>64</sup> Abee keehd maano, e nyoge mooge kiinu ge poohd be yiih.” (Beehd e ngo ngahy Jeacuue ke coon e yaa ukweer ke yiih lume kedeá ngaa uluom ngo.) <sup>65</sup> Maa abare maalo ke rob kea, “Ke nying gihn nu, e naa gihn aruba yihru kaa ngaa me beehn banga tooro nea padh Wura e ne meehg ngo beehn banga.”

<sup>66</sup> Ke wong cahng nu e yaa abuodh ngo me thoohdh ge ado yihdh miehy gen kedeá ubahnge batiene kuu acahg gene ke buodho.

<sup>67</sup> Noono e jo waahdhe kar ge apaar wonge ariow ge apeehnye peehnyo kobe, “Wu daahd uaayu thiow?”

<sup>68</sup> Maa abeehr Cimoan Piihtere ngo yihre kobe, “Ruo-hdh ngaa e ne cidh wane bange? Abee yih ne cub kuowo me ne cohg yihr nyoge? <sup>69</sup> Kedeá ngo ayiih wane awaahn ni kejea yih naa ngaa aohr Juoge ge Ngad Boadh nyoge.”

<sup>70</sup> Maa abeehr Jeacuue ngo kea, “Ngahda a naa akwany wun ke karu cang ge apaar wonge ariow ni? Abee dhaano acielo nud kiin nu me ree naa atiihb ukeehg?”

<sup>71</sup> Jeacuu anaa arubo kaa nying Juudo ge waahd Cimoane

---

6:62 6:62 Tiihy 1:9-11    6:63 6:63 3:5-8; 2Kor 3:6    6:64 6:64 13:11; 16:9

6:67 6:67-69 Mat 16:15-20; Mak 1:24    6:71 6:71 12:4

Yijkaariod. Bang gihn Juudo e naa ngaa ubeehn ne luom ngo keehd me anahge kiin jo waahdhe ge akwanye ge apaar wonge ariow ni.

## 7

<sup>1</sup> Ke batiene, e Jeacuu abeehn ne aay ucea Gaalili. Bang gihn cwihnye atooro beehd kiin yaa Judea ke nying gihn jo doong Judea giin beed geen nu ge daahd ngo ke naah. <sup>2</sup> Abea ge anaa adoohng Yaan Amuoj pinye cahng, e beehd nyoge yihdh abuwe cang ni <sup>3</sup> e wuud wahn arubo yihre kob gene, “Aayi oogo kan ucii Judea, bang ubeehn jo waahdhi uniid gene giin me teeg me gaahy nyoge ge tiihyi ni. <sup>4</sup> Ngaa noono mahn nyoge ubahnge gihn tiihyi be ngej nea ngo daahd ubeehn nyinge uwiihje? Me neehn kaano yugi giin me gaahy nyoge e kea meehg gen niido yihr nyoge cang.” <sup>5</sup> (Keehd wuud wahn e giin tiihy Jeacuae ge kuu ayiil gene.)

<sup>6</sup> Kob Jeacuae yihr gen, “Cahnga poohd kuu abeehno. Abea maru nihn ge uroomo yihru cang. <sup>7</sup> Yaa wiil piny gihn me maan gene wun ke nyinge ngo tooro. Abea a naa amaan gene bang gihn kwaaya ke rob yihr gen kejea ge tiihy giin me reje. <sup>8</sup> Cidhu yi yaay, abea mara cahng ucidha yi yaay ngo poohd kuu abeehno.” <sup>9</sup> Gihn ni ngo ateede kede a udoohnge ne beehdo yi Gaalili ke nihn me noog.

### *Jeacuu Ne Kar Yaan Amuoj Piny*

<sup>10</sup> Abea ge anaa a'aay wuud wahne ne ci yi yaay, e ngo abeehn ne cidho. Abea naa acidhe e caahdh e ree be nyoadhe beere ngaa me ngey ngo tooro. <sup>11</sup> Jo doong yaa Judea ge abuhj ke caahyo e ge daahd Jeacuu ke bang yi yaay maa apeehy gene kob gene, “Ngaan ngo naa kee?”

<sup>12</sup> Nyoge me thoohdh ge ake peehmo ke piny ke kiin gen kob nyoge mooge, “Ngo ngaa me beer.”

Maa nyoge mooge kob gene, “Ngo ngaa me dwaahng nyoge.” <sup>13</sup> Abea ngaa maa arubo e duone atihnge maalo ke nyinge tooro, bang gihn ge atud ke nying ruohdh Judea.

### *Jeacuu Apuohnyo Cahng Yaay*

<sup>14</sup> Ge anahge yi diehr nihn yaay arumo, e Jeacuu abeehn ne ci yi laaro gihr Wod Juog uthube ke puohny kaano. <sup>15</sup> Jo doong yaa Judea ge abeehn ne gaahy ke raahyo yi dhe yoohn puohny gihre ne puohnye nyoge maa akoohb gene, “Kwaad ngaan kuu akuong ke puohnyo. Giih puohnye ni ge ayoade ke kee, abea ngo kuu acidh yi madharaaja!”

<sup>16</sup> E ngo abeehr Jeacuue kea, “Gihn puohnya padh gihn me a naa apar ngo. Puohny abeehno ke bang Juog ge aohr an ni. <sup>17</sup> Ngaa daahd utiihye gihr Juog e ngo unghahye kejea gihn puohnya beehn ke bang Juog wale ngo beehda gihn maa apara a keeda. <sup>18</sup> Kwaad ngaa rob luub muue keede kwaad ngaan nu daahd leej ke nying ngud mare. Abea kwaad ngaa daahd uleeye ngaan aohr ngo, e ngaan nu e ne rob athiir kedea padh ngaa me rubo ke toohd. <sup>19</sup> Moaje ke ngude wu amuoje ke loohnge abea poohd e ngaa maa atiihyo keehd loohnge giih nu kiinu tooro. A daahdu ke naah kaa nying gihn?”

<sup>20</sup> Maa abeehr nyoge ngo kob gene, “Yih amuohl kedea rihi naa atiihb ukeehg. Jo aweehne ge ne daahd yihn ke naah?”

<sup>21</sup> Maa abeehr Jeacuue ngo yih gen, “Gihr nyepiny acielo me gaahy nyoge ngo atiihya maa agaahyu keter. <sup>22</sup> Nyedhoohy beehd e ge thoamu thoamo cahng Cabadh

---

7:13 7:13 9:22      7:15 7:15 Mat 13:54; Luk 2:47      7:16 7:16 12:49; 14:10

7:18 7:18 5:41; 8:50; 12:43      7:19 7:19 1:17; Tiihy 7:53; Rom 2:17-24      7:20

7:20 8:48      7:21 7:21-23 5:9

neehn kaa arob Moaje kejea thoamu nyethiin cuow. Abea keehd maano, e kuu anaa anahg Moaje e naa ngaa ateed ngo yihru umodho kejea thoamu nyethiin cuowo. Anahg ge kuowu ge naa athob thoam rog nyedhoohg gen. <sup>23</sup> Nea nyethen thoamu thoamo cahng Cabadh e gihn e naa araany cwihnyu riha ke nying gihn athiehdha dhaano maa abab piny cahng Cabadh? <sup>24</sup> Wiiu kihm nyoge ke dhe yoohn loohnge mooge abea kihmu nyoge kaa loohng Juog.”

*Rob Gihn Arob Ke Nying Ngad Boadh Nyoge*

<sup>25</sup> Kaano e nyoge mooge maa yaa Jeruucalem ge athubo ke piehj kob gene, “Ngahda nyin e naa ngaan daahd jo doong Judea ke naah? <sup>26</sup> Maahnyu e ne ca rubo nyum nyoge kedea gihn me rob jo doong yaa Judea ke nyinge tooro. Ne cohg ngo ngahy gene kejea e naa Ngad Boadh nyoge <sup>27</sup> Abea ge ubeehn Ngad Boadh nyoge, e ngaa muu unghy kun abeehne kii ngo utooro. Abea ngaan, kun beehne kii ngo, ngo ngahyo cang.”

<sup>28</sup> Noono ge apuohny Jeacuue puohnyo yi laaro gihr Wod Juog, e puohnyo e ukwaago keraahyo kea, “Aparu kuu unghy ne cohg kedea kun abeehna kii ngo, ngo ngahy. A kuu abeehn wiih piny kan kaa dhe yoohn tee mara. Ngaan aohr an ngo ngaa me rob athiir kedea ngaan nu gihn me nweehd wun keehde tooro. <sup>29</sup> Abea a beehda anweehd keehde, bang gihn a abeehn ke bange kedea e naa aohr an.”

<sup>30</sup> Ke nying gihn nu e jo doong yaa Judea ge adaahd umag gene Jeacuu abea ngaa maa atihng cinge maalo ree tooro bang gihn cahng umag gene ngo, ngo poohd kuu abeehno. <sup>31</sup> Abea nyoge me thoohdh kiin yaa akuud ge

---

7:23 7:23 5:9      7:24 7:24 8:15      7:25 7:25 5:18      7:26 7:26 4:25; 18:20  
 7:27 7:27 9:29      7:28 7:28-29 8:55; 17:8, 21, 25      7:30 7:30 2:4; 7:44  
 7:31 7:31 2:23



yiiho ke lume kedea ukoohb gene, “Nea Kriihjto ubeehn wudhu aparu kejea yihre unaa giikh me gaahy nyoge me kaal muu ngaan ne?”

<sup>32</sup> Paarijea mooge ngo abeehn gene ne lihngo e nyoge ge urubo ke nying Jeacuu, noono e gen kedea jo doong yaa lam maa acaakere giikh koar Wod Juog ge aohr gene ne mag Jeacuu.

<sup>33</sup> Gihn nu e Jeacuu arubo yihr gen kea, “A ubeehdo ke wun ke nihn me noog mee kedea a uaay ne dog bang ngaan aohr an. <sup>34</sup> A udaahdu abea a buu uyoadu bang gihn wu buu uwahn ka nahga yea.”

<sup>35</sup> Maa arub yaa Judea ke kiin gen kob gene, “Kee ge daahde ci yea ni, ge bahnge ngo be yoado ni? Ngo ucaa wudh geedh Griihge ge beed jo paaro upuohnye gen ne? <sup>36</sup> Arobe kea, ‘A udaahdu abea a buu yoadu,’ kedea, ‘Ka nahga yea wu buu uwahn yea?’ Ngo daahd gihn ke robo yihro?”

<sup>37</sup> Yi cahng thum yaay kedea e naa cahng duohng yi yaay, cahng rub gene ke nying piikh me beehn oogo kii Wod Juog ne boadh nyoge e Jeacuu ayedh maalo urube e duone atihnge maalo kobe, “Nea ngaa maa anahg riowe, e kea beehne banga umuoja ngo ke piikh me maadhe. <sup>38</sup> Wa kaa anaa agweede yi kitaab Juog kejea a nuu unahg naam me yea ne piikh me boadh wahy nyoge mooge.” <sup>39</sup> Ge arub Jeacuue ke nying piikh e gihre anahg rob ke nying Wahy Juog ge uyoad yaa ayiih lume. Ge arob Jeacuue gihn nu e Wahy Juog poohd kuu anaa acub bang gihn Jeacuu apoohdo e kuu aci Maalo Paar Juog kaa umoar wiihe yea.

### *Peehm Kejea Jeacuu Padh Ngad Boadh Nyoge*

<sup>40</sup> Ge alihng nyoge mooge kiin yaa akuude lum ni e ge arubo kob gene, “Ngaan beehda agamloohngjuog me ne cohg.”

<sup>41</sup> Nyoge mooge kob gene, “Ngo beehda Kriihjto.” Abea nyoge mooge kob gene, “Kriihjto ngo akuong beehno ke yoohn Gaalili ne? <sup>42</sup> Ngahda anaa agweed yi kitaab Juog kejea, Kriihjto ubeehn oogo kii dhe wod paar Deabid ge anahg ruohdh ne? Kede a unyuol yi geen Bedhlehme ge anaa abeed Deabide ne?” <sup>43</sup> Kaano e nyoge luub gen apaah ke nying Jeacuu. <sup>44</sup> Nyoge mooge ge daahd umag gene ngo abea ngaa maa ajag cinge rih ngo tooro.

*Ruohdh Yaa Judea Kuu Ayiiho Ke Lum Jeacuu*

<sup>45</sup> Batiene e acaakere giin koar Wod Juog ge abeehn ne doo caahn bang jo doong yaa lam kede a Paarijea. Gihn nu e ge apeechny gene kejea, “Gihn ge bahnge ngo kuu amagu ukahlu ngo ni?”

<sup>46</sup> Maa abeehr acaakere ngo, “Ngaa maa akuong rob wa kwaad mar nyin nu tooro.”

<sup>47</sup> Maa apeechny Paarijea, “Rogu ameehgu dwaahngo yihre thiow? <sup>48</sup> Ne ruohdh Judea wale Paarijea maa akuongu ke yoado e ayiiho ke lum Jeacuu ne? <sup>49</sup> Gahng! Abea beehda nyoge me kwihy loohnge ge naa ayiih lume. Nea wa maano kea beehn Juoge lame gen uyo ad gene gihn me raaj.” <sup>50</sup> Nikoadiihmuj ngad Paarijea ge naa acidho bang Jeacuu coon, arubo yihr nyoge mooge kea, <sup>51</sup> “Yi loohng gihro ngo padh kare ukihm dhaano e ngo kuu akuong ke peechny kede a ungye gihn atiihye.”

<sup>52</sup> Maa angier gene ngo ukoohb gene, “Beer! Ngahda yih beehda ngad Gaalili ne? Kwaan kitaab Juog gihn agweed, nea ngo uyo ad kejea agamloohngjuog maa akuong

beehno ke yoohn Gaalili nud?” <sup>53</sup> Noono maa a'aay gene e ngaa man caa paare.

## 8

### *Dhaago Maa Amag Ke Dhecuow*

<sup>1</sup> Abea mar Jeacuu ngo abeehn ne ci wiih good me cuohn ne Ulihbe. <sup>2</sup> Yi ruung piny ke nyango e Jeacuu aduu yi laaro gihr Wod Juog. Kaano e nyoge me thoohdh rog ge acong gene buude kedea uthube ke puohny gen. <sup>3</sup> Nye wong kaano e yaa loohng Juog kedea Paarijea dhaago maa amag ke dhecuow abeehn gene ne kahlo kedea umeehg gene ngo cuung nyum gen. <sup>4</sup> Urub gene yihr Jeacuu kob gene, “Ngad puohny, dhaar ni ngo amag ke dhecuow. <sup>5</sup> Abea loohng Moaje arubo yihro kejea kwaad ngaa yug awuohj me wa gihn nu e ngo ke bahno ke leele uthowe. Gihn e ne robi ke nyinge?” <sup>6</sup> Ge apeehyo wa maano bang ne waale beere e urubo ke rob me raaj nyum nyoge, me meehg ngo mago yihr gen.

Abea Jeacuu wiihe akuule piny e ugweehdo yi ngoom ke lweede. <sup>7</sup> Abea naa apoohde e ge bar maalo ke piehj e wiihe atihnge maalo maa arube yihr gen kea, “Ngaa ree tooro adhemuohm kiinu kare nud unahge en e ne kuong leen umodho ke baahlo ne nahg dhaar ni.” <sup>8</sup> Maa adoge piny ne gweed yi ngoom.

<sup>9</sup> Naa alihng gene rob gihn ni, e ge athubo ke aay naa acielo acielo. Yaa doonge ge naa akuong aay umodho. Noono udoohng Jeacuue kare keede maa dhaago gihn apoohdo e ucuungo kaano. <sup>10</sup> Maa atihng Jeacuue wonge maalo upeehnye dhaar ni kea, “Jo akoohbo kejea yih ayug awuohj, ge ne kee?”

<sup>11</sup> Maa abeehr dhaar ni ngo kobe, “Ngaa maa adoohng me kihm an tooro Ruohdh.”

Maa akoohb Jeacuue kea, “A thioiw yih be kihma keehd maa atiihyi adhemuohm. Abea cidhi kedea giih adhemuohm ge keá cahg ke yugo keehdo.”

*Adiehr E Naa Gihn Rob Jeacuue*

<sup>12</sup> Maa adog Jeacuue rob yih Paarijea kea, “A naa ngaa meehg nyoge ngahy Juog wa gih maaj ge meeny yi muudho unghy dhaane ka cea yea. Ngaa buodh batiena yihre unaa kuowo kedea kaa cea yea ngo unghy.”

<sup>13</sup> Maa arob Paarijea ngo yihre kob gene, “Wa yih rubo kaa nyingi abea dhaano tooro me koohbo kejea giih robi ke nyingi ge athere. Nea neehn maano e giih robi ngaa me rom gen ke yiiho tooro.”

<sup>14</sup> E ngo abeehr Jeacuue yih gen kobe, “Bekihdel Keehd me toor ngaa me rob ngo kejea giih roba ke nyinga ge athere, ge athere bang gihn a ne ngahy kun abeehna kii yea kedea kun caa yea. <sup>15</sup> Nyoge ge kihmu kaa dhe yohn ukihm mar dhaano utaahngo, abea a be kihmo ke dhaano kejea ngo ayug awuohj. <sup>16</sup> Abea nea dhaano maa ayug awuohj kihma kihmo e ngo kihma kaa dhe yooh me ne cohg. A ne kihmo ke dhe yooh me ne cohg bang gihn padh a keeda a ne kihmo abea Wura ngaa aohr an nud ke an. <sup>17</sup> Nud keehd luube maa agweed yi loohnge giihu kejea nea nyoge ariow ge arob lubo acielo ke nying nyepiny, e lum gen ngo adiehr. <sup>18</sup> A rob gihn maa adiehr ke nyinga kedea Wura ge aohr an ni e ne rob athiir ke nyinga.”

<sup>19</sup> Maa apeechny gene ngo kob gene, “Wuru naa kee?”

---

8:11 8:11 5:14      8:12 8:12 1:5, 9-10; 3:19; 9:4-5; 11:9-10; 12:35-36, 46; Mat 5:14; Luk 2:32; 2Kor 4:4, 6; Epi 5:8-14; 1Jon 1:5-7; 2:8; 3:14      8:13 8:13 5:31-32  
8:14 8:14 3:2; 7:28-29, 33-36; 8:21-22, 42; 13:1, 33; 16:5, 10, 28; 17:8; 20:17  
8:15 8:15 7:24      8:18 8:18 5:36; 1Jon 5:9      8:19 8:19 5:18; 16:3

Maa abeehr Jeacuue ngo yihr gen kobe, “A kwihyu kede a Wura kwihyu? Nea a ne ngahyu e Wura nuu angahyu thiow.” <sup>20</sup> Luube gihih ni ge arobe e puohny nyoge yi laaro gihr Wod Juog, buud kaa acub caanduug gihih thoohr nyoge ngiihny cub ke nying Wod Juog yea. Ngaa maa amag ngo tooro bang gihih padh e naa cahng akob Juoge kejea ngo umag yea.

*Wu Be Rom Beehn Ka Caa Yea*

<sup>21</sup> Maa adog Jeacuue rob yihr gen kea, “A uaay abea wu uthow kaa anyoohne rogu ke nying gihih bahnge gihih anyoohne be wiiu. Wu buu uwahdh ka naa yea.”

<sup>22</sup> Ke nying gihih ni e ruohdh yaa Judea ge athubo ke rob ke rog gen, “Ree unahge naah wale gihih? Gihih ge koohbe kejea ka cea yea wo buu rom wahn yea?”

<sup>23</sup> Maa abeehr Jeacuue ngo yihr gen kea, “Wu beehda yaa wihih piny kan abea a abeehno kaa yoohn Paar Maalo. Wu yaa wihih piny kan abea a padh ngad wihih piny kan. <sup>24</sup> E naa gihih aroba ngo yihru kejea wu uthow kaa anyoohne rogu nea wu buu uyiiho kejea A Juog wa ka na roba ngo yihru.”

<sup>25</sup> E ngo abeehn gene ne peehnyo kob gene, “Yih naa ngaa?”

Maa abeehr Jeacuue ngo kea, “A Juog wa ka na roba ngo yihru coon. <sup>26</sup> Yihra ne gihih me thoohdh me roma ke robo ke nyingu kede a gihih me thoohdh me roma wun ke kihmo ke nying gen. Abea gihih nu ge be roma tiihyo ke kar wihih bang gihih arob adiehj gihih alihnga bang ngaa aohr an yihr yaa wihih piny kan.”

<sup>27</sup> Yaa alihng gihih arobe ngo kuu angey gene kejea ngo rubo kaa nying Juog Wuur. <sup>28</sup> Noono e ngo arobe yihr

gen, “A ge Ngad Boadh nyoge, cahng ugur an maalo rih yaadh maa ariihw e nuu ungeyu ngo kejea a Juog wa ka na roba yihru. Kaano e nu unгаху ngo kejea a be tiihyo kaa tee mara a keeda bang gihn gihn roba beehda gihn arob Juog Wuure yihra kejea roba ngo yihru. <sup>29</sup> Kede a wura ngaa aohr an nud tiehd keehd an. A keá wii kara keeda, ngo nud keehd an ke nying nihn bang gihn gihn tiihya ngo nyaare nyaaro.” <sup>30</sup> Ge arobe gihi ni, e nyoge me thoohd ge abeehn ne yiho yi lume.

### *Kuowo Me Yea Tooro Bahng*

<sup>31</sup> Kob Jeacuue yihr yaa ayiih lume kea, “Nea wu bar maalo ke tiij keehd luube gihi nu apuohnya yihru nu, e wu beehda jo batiena me ne cohg. <sup>32</sup> Noono e gihi beeye naa anyoadh Juoge ge beehnu ke ne ngeyo kede a gihi nu beeye ge nuu ulony wun oogo yi bahng.”

<sup>33</sup> Maa abeehr gene ngo kob gene, “Wa naa yaa Juog ne cohg bang gihn wa kwaay Abraahm kede a be ngaa maa akuong doohng ne baahng. Gihn ge rubi kejea wa ulony oogo yi bahng?”

<sup>34</sup> Maa arob Jeacuue ngo yihr gen kea, “A rob athiir yihru! Ngaa koag ke yug adhemuohm ngo beehda baahng adhemuohm. <sup>35</sup> Paajo be doohng yi cing ubaahng ne maa, bang gihn beehda waahd ngad paajo e ne wii paajo yi cinge. <sup>36</sup> Nea waahd ngad paajo e naa aluny wun oogo yi bahng, e wu adoohng ne nyoge me tooro yi bahng ne cohg. <sup>37</sup> Ngo ngahya kejea wu yaa Judea wu beehda kwaay Abraahm. Abea keehd maano e wu daahd unahgu an bang gihn cwihnyu tooro utiihyu ke dhe yoohn apuohnya yihru. <sup>38</sup> A rob gihn aniida ge anuda buud Wura

kedea wu tiihyu gihn alihngu bang weehgu na anahgu yaa agamloohngjuog.”

*Kwaay Abraahm Maa Akweer Ke Lum Juog*

<sup>39</sup> Maa abeehr gene ngo yihr Jeacuu kob gene, “Abraahm beehda kuow wan.”

Maa aduog Jeacuue ngo kea, “Nea wu ne nahg kwaaye ne cohg, e wu ne ke beehdo ke beehd Abraahme kede a utiihyu giih ne tiihye. Abea awaahn ni wu daahd unahgu an. A ge rub yihru ke nying giih arob Juoge yihru. <sup>40</sup> Gihn atiihya beehda gihn ateeda giih alihnga bang Juog yihru. Noonoo e ne daahdu an ke naah. <sup>41</sup> Gihn me kuu akuong Abraahme ke tiihyo. Wu tiihy kwaad giih na tiihy ge weehgu yaa na tiihyo yihr atiihb ukeehg.”

Maa abeehr gene ngo kob gene, “Ngaa maa anyuol e tuong kiin wan tooro. Yihr wan ne wur wan acielo cog ge beehda Juog ke ngude ni.”

<sup>42</sup> Kob Jeacuue yihr gen kea, “Nea Juog ne nahg wuru ne cohg, e a nuu nhyaaro bang gihn a beehn kaa dhe yoohn bang Juog ke ngude kede a man kan. A kuu abeehno kaa dhe yoohn mara keeda, abea Wura e naa aoohr an. <sup>43</sup> Gihn e bahnge gihn roba yea be deadu ni? Yea be deadu bang gihn wu akweer ke lihng luma. <sup>44</sup> Wu beehda nyethea atiihb ukeehg wuru kede a wu daahd utiihyu giih tiihy weehgu. Atiihb ukeehg gihre beehda nahg nyoge kede a gihn maa adiehr me robe tooro bang gihn gihre maa adiehr tooro. Nea atiihb ukeehg urubo, e rubo kaa luub toohd bang gihn rob toohd e naa gihn ngahye. Ngo ngad toohd kede a toohd yoad ke bange. <sup>45</sup> Abea mara a rob gihn maa adiehr e naa gihn bahnge luma be yiihu. <sup>46</sup> Ngaa kiin nu e ne rom rob riha kea a ngad adhemuohm? Nea a urubo

yihru kaa athiir e gihn e bahnge ngo be yiihu ni? <sup>47</sup> Ngaa beehn ke yoohn bang Juog nhyaar lum teed Juoge abea wu ge kuu abeehno ke yoohn bang Juog lum Juog be yiihu.”

*Rob Ke Nying Jeacuu Kedeo Moqje*

<sup>48</sup> Maa apeechny gene Jeacuu kob gene, “Ngahda beehda adiehr e ne rob wane nea wa ukoohbo kejea yih beehda ngad Camaarya kedea rihi ne atiihb ukeehg?”

<sup>49</sup> Maa abeehr Jeacuue ngo kea, “Atiihb ukeehg me ne riha tooro. Gihn nud Wura wiihe moara moaro abea wun, wiiha be moaru. <sup>50</sup> Cwihnya tooro meehg nyoge moar wiiha ke nying ngud mara. Abea ngaa me daahd nyoge umoar gene wiiha ngo nud kedea ngaan nu e ne rob gihn maa adiehr ke nyinga. <sup>51</sup> A rob athiir yihru, ngaa yiih luma e ngo be kuong thoo.”

<sup>52</sup> Maa aduog gene ngo yih Jeacuu kob gene, “Awaahn ni ngo angey wane kejea rihi ne atiihb ukeehg! Abraahm athow kedea yaa gamloohngjuog ge athow kedea yih poohd urubo kejea nea ngaa yiih lumi e ngo be kuong thoo! <sup>53</sup> Yih ne duohng rih Abraahm kuow wan ge athow ne? Abraahm athow kedea yaa agamloohngjuog ge athow. Wiihi apari kejea yih naa ngaa?”

<sup>54</sup> Maa abeehr Jeacuue ngo kea, “Nea a ne nahg ngaa me moar wiiha a keeda, e gihr nying moar wihj gihn nu ne tooro. Wura ge cuohnu ne Juog gihru ni, e naa Wura ge moar wiiha. <sup>55</sup> Keehd maan kwihyu en, e ngo beehda ngaa me ngo ngahya. Nea a urubo kejea ngo kwihya, e a beehda ngad toohd wa wun. Ngo beehda ngaa me ngahya kedea luube ge ne tiihya ke gen. <sup>56</sup> Abraahm ge beehda wuru ni cwihnye anaa amihno ge angahye cahng ubeehna wiih piny kan. Cahng ngo aniide kedea umihn cwihnye.”



<sup>57</sup> Maa aduog gene wiih lubo yihre kob gene, “Runi puud kuu awahdh yi jiehariow wonge apaar abea yih urubo kejea Abraahm aniidi ne?”

<sup>58</sup> Kob Jeacuue yihr gen, “Beehda gihn maa adiehr e ne roba yihru. Ge apoohd Abraahme kuu anyuol e a anudo ke Juog neehn Juog.”

<sup>59</sup> Ke nying lum nu arobe e ge athubo ke kwany leele ne bahn ngo. Abea Jeacuu ree aloaye oogo yi laaro gihr Wod Juog.

## 9

### *Jeacuu Ngaa Maa Acoor Athiehdhe*

<sup>1</sup> Ge anaa acaahdh Jeacuue caahdho tiehd keehd jo waahdhe ni, e dhaano maa anyuol e acoor aniide niido.

<sup>2</sup> Maa apeechny jo waahdhe ngo kob gene, “Ngad puohny beehda adhemuohm gihr ngaa e naa ameehg ngo nyuolo e acoor? Beehda adhemuohme giihe wale adhemuohme giih atiihy ge wahne?” <sup>3</sup> Maa abeehr Jeacuue ngo kea, “Padh ke nying adhemuohme giihe wale adhemuohme giih ge wahn ge naa ameehg ngo nyuolo e wonge acoor. Abea ngo acoor beere ka tiihy tee Juoge kii ngo ke niido.

<sup>4</sup> Wo cang, laaro giih aohr an ke nying gen ke tiihyo. Laaro ge ke tiihyo e wong cahng nud bang gihn nea piny ayuudho e ngaa me rom tiihj tooro. <sup>5</sup> A naa daahr gihn meeny piny cang yihr nyoge ka poohde e a nud wiih piny kan.”

<sup>6</sup> Ge athume ke robe noon ni, e laaw angoale piny unweene lahbo ugwaahye ngo yi wong ngaan acoor, <sup>7</sup> kedea urube yihr ngo kea, “Cidhi uluogi wongi yi Paahl

gihr Ciloam.”\* Maa abeehn ngaane ucidhe kedea uluoge wonge maa uduue e piny uneehno yihre.

<sup>8</sup> Kaano e waahd gen kedea kwaad jo na niid ngo coon e ukwahyo, ge athubo ke piehj kob gene, “Ngahda e naa ngaan na piih piny kan ne kwaj e gihn ne?” <sup>9</sup> Nyoge mooge kob gene, “Beehda en.”

Kedea nyoge mooge kob gene, “Padh en abea beehda ngaa me room keehde.” Gihn nu e nyin ke ngude arubo kea, “Beehda an ge na kwahyo ni.”

<sup>10</sup> Noono e ge ake rubo yihre, “Gihn e naa ayab wongi uniidi nyepinye?”

<sup>11</sup> Maa abeehre ngo kea, “Ngaan cuohn ne Jeacuu e naa anween lahbo ke laaw dhee ugwaahye ngo yi wonga maa arube yihra kea, ‘Cidhi wiih Paahl gihr Ciloam kedea uluogi wongi.’ Gihn nu, naa acidha uluoga wonga e wonga ree ayabe yabo uniida nyepinye.”

<sup>12</sup> Maa apeehy gene, “Ngaan ngo naa kee?”

Maa abeehre ngo kea, “Kaa acea yea ngo kwihya.”

### *Paarijea Ngaan Wonge Ayab Apeehy Gene*

<sup>13</sup> Kaano e arob gene kejea beehn nyine cidhe ke gen bang Paarijea. <sup>14</sup> Ngo anahg cahng Cabadh ge anaa abeehn Jeacuu unweene lahbo ne yab wong nyin.

<sup>15</sup> Noono e Paarijea nyin adog gene ke peehnyo ke dhe yoohn ayab wonge kii ngo. Maa arobe ngo yihr gen kea, “Lahbo e naa agwaahye yi wonga uluoga wonga kedea piny uneehno yihra awaahn ni.”

<sup>16</sup> Kob yaaj mooge kiin Paarijea, “Ngaan atiihy gihn, padh Juog e naa aohre, bang gihn atiihye cahng Cabadh.”

---

\* 9:7 9:7 Ciloam: Lum yea ‘oohr’. 9:8 9:8 Tiijy 3:10 9:14 9:14 5:9  
9:16 9:16 7:43; 9:33; 10:19

Abea nyoge mooge kob gene, “Ngad adhemuohm giih me gaahy nyoge ge be rome ke tiihyo.” Kaano e luub gen awaahj upaah yihdh gene.

<sup>17</sup> Noono e Paarijea ngaan acoor adog gene ke peehnyo kob gene, “Kobi yih athiehdhe uniidi nyepinye. Nea yihr mari e ngo beehda ngaa me ngihde?”

Maa abeehre ngo kea, “Ngo beehda ngad agam-loohngjuog.”

<sup>18</sup> Ruohdh yaa Judea apoohd e be yiih gene kejea ngaan ni abeehdo e wonge anaa acoor kedea wonge ayahbo, noono maa acuohn gene wahn kedea men. <sup>19</sup> Maa apeehny gene gen kob gene, “Gihn beehda waahdu ne? Kobu ngo anyuol e ngo acoor, abea wonge abeehn ne yahbo ke ne diih?”

<sup>20</sup> Maa abeehr ge wahne ngo kob gene, “Adiehr muon, ngo beehda waahd wan abea ngo beehda adiehr thiow kejea anyuol e wonge acoor. <sup>21</sup> Abea gihn ayab wonge ngo kwihy wane? Ngo beehda ngaa me duohng. Peehnyu ngo ke ngaa ayab wonge. Kare nud yihre ubeehre lumu.” <sup>22</sup> Gihn ni arob gene ke nying gihn ge atud yihr Ruohdh yaa Judea. Ngo beehda gihn maa agweehg Ruohdh yaa Judea coon kejea ngaa yiih ngo kea Jeacuu beehda Ngad Boadh nyoge, e ngaan nu riem oogo yi wod amaad gihr Judea, <sup>23</sup> e naa gihn arub ge wahne kob gene, “Ngo ngaa me duohng peehnyu ngo.”

<sup>24</sup> Noono maa acahg gene nyin wonge anaa acoor ke cuohno keehdo urub gene yihr ngo kob gene, “Kuohng rihi nyum Juog. Ngahy wane kejea ngaa athiehdh yihn ngo ngad adhemuohm!”

<sup>25</sup> Noono e ngo abeehr nyine kea, “Kwihya me nahge ngad adhemuohm wale padh ngad adhemuohm. Abea

gihr nyepiny acielo e ne ngahya: a anaa acoor kedea piny uneehnu yihra awaahn ni.”

<sup>26</sup> Batiene e ngo apeechny gene keehdo, “Gihn ne cohg e naa ayuge rihi ge ayahb wongi ni?”

<sup>27</sup> Maa abeehre ngo yihr gen kea, “Ngo aroba yihru kedea wu be daahd uyiihu gihn aroba. Gihn ge daahdu ngo ke lihngo keehdo? Ka moogo e wu daahd udoohngu ne yaa waahdhe!”

<sup>28</sup> Noono uyeney gene ngo kob gene, “Yih naa ngad waahdhe abea wa beehda yaa waahdh Moaje. Moaje kuow wan ge acub loohnge yihr wan. <sup>29</sup> Ngahy wane kejea Juog arubo yihr Moaje. Abea ngaan nu keehd paan abeehne kii ngo kwihy wane.”

<sup>30</sup> Maa abeehre ngo yihr gen kobe, “Gihn ge adogu wiiha ke lyaahbo ni! Wonga athiehdhe abea paan abeehne ke yoochn yi ngo, kwihyu ne! <sup>31</sup> Beehda gihn me ngahj kejea Juog, gihn kway yaa adhemuohme ngo be cube yihr gen. Juog muoj yaa wuor en kedea utiihy gene gihn daahd Juoge. <sup>32</sup> Kuu umodho coon ge anaa acag piny ni ngaa e naa akuong ke lihngo kejea wong ngaa maa acoor ayabe? <sup>33</sup> Nea padh Juog e naa aohr ngo e kwaad gihn be nea rom ke tiihyo.”

<sup>34</sup> Maa abeehr gene ngo kob gene, “Yih beehda ngad adhemuohm kii yi cahng anyuol yihn. Ngaa noono romi ke puohnyo?” Maa ariem gene ngo oogo yi wod amaad. <sup>35</sup> Gihn ayug ree anaa abeehn Jeacuue ne lihngo. Noono naa abeehn Jeacuue uyoade nyin keehdo e apeechny kea, “Lum ngaan adoohng ne dhaano utaahngo ngo ayihi?” <sup>36</sup> Maa abeehr nyine ngo kobe, “Ngo beehda ngaa Ruohdh beere lume yiiha yiiho?”

<sup>37</sup> Maa abeehr Jeacuue kea, “Ngo beehde e ngo aniidi awaahn ni kejea a naa ngaan ngo a e gihn rubo ke yihn awaahn ni.”

<sup>38</sup> Maa akob nyine ngo kea, “Ruohdh! Ayiiha.” Kede a uthube ke rung cunge piny nyum ngo ne wuor ngo.

<sup>39</sup> Kob Jeacuue, “A abeehn wiih piny kan ke nying paahng kiin nyoge, beere yaa kwihy Juog, ge neehn nyoge maa acoor, Juog ngahy gene ngahyo kede a beere yaa kang rog gen kejea Juog ngahy gene ge ubeehdo yi muudho neehn nyoge maa acoor.”

<sup>40</sup> Paarijea mooge me kuu ayiiho maa anaa buud gen, gihn arob Jeacuu alihng gene maa apeehy gene, “Nea mare e wa beehda coohre ne?”

<sup>41</sup> Kob Jeacuue yihr gen, “Nea wu ne nahg coohre, e adhemuohm ne tooro rogu. Abea naa akoohbu kejea wu padh coohre e naa gihn poohd e adhemuohm ne rogu noono.

## 10

### *Ngad Kwaah Ke Diehge*

<sup>1</sup> “A rob athiir yihru yaa ge koara koaro wa gihr ngad kwaah. Ngad kwaah e naa ngaan mon yi roog diehg ke dhe wod, abea ngaan mon yi roog ke dhe yooh moogo ngo beehda ngad kahw wale ngad yaahg. <sup>2</sup> Ngaan mon yi roog ke dhe wod ni e naa ngad kwaah me ne cohg. <sup>3</sup> Ngad kwaah e ne meehg mon wod kede a duone ngahy diehge. Diehg ge cuohne kaa nying gen naa acielo acielo kede a ukoohle gen oogo. <sup>4</sup> Nea diehg ge akoohle oogo cang, e caa wong maalo nyum gen kede a ubuodh diehg batiene bang gihn duone ngahy diehge. <sup>5</sup> Abea ge be kuong pahdh batiene ngaa me kwihj gene. Ge goohd oogo rih ngo bang gihn

duon ngaa maa aley kwihy gene.” <sup>6</sup> Ucaale gihn ni arob Jeacuu yihr gen abea yea ngo kuu angey gene.

*Kob Jeacuu Kea E Naa Ngad Kwaah Me Beer*

<sup>7</sup> Noono e Jeacuu arubo keehdo kea, “A rob athiir yihru: A uroomo wa dhe roog ge mon diehge kii ngo. <sup>8</sup> Kwaad yaa umodho cang naa abeehno e a poohd kuu awahnho ge anahg yaa kahw kedea yaa yaahg kedea gihn arob gene be kuong diehg ke lihngo. <sup>9</sup> A uroomo wa dhe wod. Kwaad ngaa mon wod ke dhe yoohn banga e ubodho yi gihn me raaj. Ngo rom beehn wod kedea urome cidh oogo maa uyoade ka me beer wa gihr diel e yoad lum ulemo. <sup>10</sup> Ngad kahw beehn kaa nying kahw kedea ne naahg maa raahnyo. Abea a abeehno bang uyoad kuowo me ne cohg.

*Ngad Kwaah Me Beer*

<sup>11</sup> \* “A naa ngad kwaah me ne cohg ge gwaay ree yi thoo ke nying diehg. <sup>12</sup> Ngad kwaah me koog, padh ngad kwaah me ne cohg bang gihn cwihnye naa bang ngiihny. Ge niide uthuohn e beehn bang diehg, e diehg wiie ke piny kedea ugoohde ke ngweej. Noono e uthuohn diehg mage mago kedea ukeedh mooge. <sup>13</sup> Ngad kwaah me koog ugoohdo ke nying gihn be dier kedea yihre tooro nhyaahro yi cwihnye ke nying diehg.

<sup>14-15</sup> “A naa ngad kwaah me beer, wa kwaad ke ngahy Wura an ni kedea unghaya Wura, ke dhe yoohn nu acielo nu, diehga ngahya kedea a ngahy gene. Kedea riha gwaaya ke ne thoo ke nying gen. <sup>16</sup> Diehg mooge nud me beehda diehga abea ge poohd tooro yi roog. Ge dhiila kaa mahd yihdh diehg giithiow. Duona udhiil gene ke lihngo

---

10:6 10:6 16:25 10:9 10:9 14:6 \* 10:11 10:11 Ngad kwaah: Mat 18:12-14; Judea 13:20; Any 7:17Thoo: 15:13; Rom 5:8; 1Jon 3:16 10:12 10:12 Tiihy 20:29 10:14-15 10:14 10:27; 2Tim 2:19 10:14-15 10:15 Mat 11:27 10:16 10:16 11:52; 1Pii 2:25

kedeaa umahd gene rog gen bang diehg muu nud, noono udoohng gene ne lwaag acielo kedeaa yihr gen unaa ngad kwaah acielo. <sup>17</sup> Wura, a anhyaare ke nying gihn agwaaya wahya yi thoo beere wahy ge cahga kaa yoado ucahra. <sup>18</sup> Ngaa me rom wahya ke kaabo uthowa tooro. Beehda an ke nguda, an ne gwaay riha yi thoo wa kaa apara ngo. Yihra naa adiehja me gwaaya riha yi thoo kedeaa yihra naa adiehja thiw me duua wahya riha, ucahra. Gihn nu e naa arob Wura kea tiihya ngo.”

<sup>19</sup> Yaa Judea yihdh gen abeehn ne paah ge alihng gene lum nu arob Jeacuue. <sup>20</sup> Nyoge mooge me thoohdh kiin gen kob gene, “Yaage! Dhaano ree naa atiihb ukeehg e naa gihn amuohle. Giih robe ge keá lihngu.”

<sup>21</sup> Abea nyoge mooge kob gene, “Luub ni ge padh luub ngaa me ree naa atiihb ukeehg. Ngaa me ree naa atiihb ukeehg wong ngaa maa acoor yabe yabo ne?”

### *Judea Giih Kuu Ayiiho*

<sup>22</sup> Ngo anahg ruudo kedeaa nyoge anaa yi Yaan Wod Juog<sup>†</sup> yi geen Jeruucalem, <sup>23</sup> kedeaa e Jeacuu anaa yi laaro gihr Wod Juog kedeaa ngo ake caahdho ke thar Aar gihr Caloamon. <sup>24</sup> Kaano e naa acong yaa Judea rog gen buude maa apeechny gene ngo kob gene, “Wa keá meehg koar ke raahyo. Rob lubo maa adiehr yihr wan. Yih naa Ngad Boadh nyoge?”

<sup>25</sup> Maa abeehr Jeacuue ngo yihr gen kobe, “Ngo aroba yihru coon abea wu be daahd uyiihu gihn roba. Giih tiihya ke tee Wura ge nyoadh ngo kejea a naa ngaa. <sup>26</sup> Abea wu kuu ayiiho bang gihn wu padh diehga. <sup>27</sup> Diehg giiha

---

10:17 10:17 3:35; 5:18    10:18 10:18 4:34    10:19 10:19 9:16    10:20  
 10:20 8:48    † 10:22 10:22 Beehda yaay gihr cub Wod Juog yihr Juog    10:23  
 10:23 Tiihy 3:11    10:24 10:24 Luk 22:67    10:25 10:25 5:36    10:26 10:26  
 16:9    10:27 10:27 8:47; 10:3, 14

gihn roba lihng gene lihngo kedea ge ngahya maa batiena buodh gene buodho. <sup>28</sup> A ne cub kuowo me ne cohg yihr jo ayiih luma kedea ge be cahg thoo keehdo maa ngaa me rom gen ke yag oogo yi cinga tooro. <sup>29</sup> Wura ge acub gen yihra ni, e ne duohng rog giih nyepinye cang kedea be ngaa me rom gen ke kaabo oogo yi cing Juog Wura. <sup>30</sup> A kedea Juog Wura wa beehda acielo.”

<sup>31</sup> Kaano e yaa Judea leele acahg gene kaa kwanyo ne bahn Jeacuu. <sup>32</sup> Abea Jeacuu arubo yihr gen kea, “Giih me gaahy nyoge me teeg me thoohdh ge ayuga yihru ke tee gihn acub Wura yihra maa aweehne kiin gen e ne daahdu an ke bahno ke nyinge?”

<sup>33</sup> Maa abeehr gene ngo kob gene, “Wa be daahd ubahn wane yihn kaa nying gihn me beer maa atiihyi. Wa daahd ubahn wane yihn kaa nying gihn adhahli Juog kii yih uroomo keehde. Yih beehda dhaano utaahngo now abea yih daahd uyugi rihi ne Juog?”

<sup>34-36</sup> Maa abeehr Jeacuue ngo yihr gen, “Ngo agweed yi kitaab Juog giihu kejea,  
‘A ge adoohng ne dhaano utaahngo  
a beehda Juog.’

Nea loohnge giihu ge beehda loohnge maa ather ukoohbo kejea ngaa akahl Juoge lume yihr ngo, ngo beehda Juog e gihn ge koohbu kejea Juog adhahla ge aroma riha keehde. Kare tooro ukoohbu kejea Juog adhahla nea a ukoohbo kaa a waahd Juog kedea Juog wiiha amoare naa aohre an wiih piny. <sup>37</sup> Nea padh tiihy Wura e ne tiihya e wu keá yiiho yi luma. <sup>38</sup> Abea nea beehda tiihy Wura e ne tiihya e wu dhiil yiiho yi gihn atiihya. Giih tiihya ge dhiilu kaa yiiho beere ngo ngahyu ngahyo ne cohg kejea Juog Wuur



beehda anweehd ke an kedea an beehda anweehd ke Juog Wuur.”

<sup>39</sup> Keehdo e ge adaahd umag gene Jeacuu, abea Jeacuu ree abeehn ne loay oogo uaaye.

<sup>40</sup> Batiene e Jeacuu abeehn ne dog dieng naam Joohrdoan kaa anaa athub Joone ke muoj nyoge ke luog-wahy yea. <sup>41</sup> Maa abeehn nyoge me thoohdh bange kedea e ge urubo kob gene, “Keehd me bahnge giih me gaahy nyoge maa atiihy Joone tooro, e giih arobe ke nying nyin ge beehda athere.” <sup>42</sup> Maa abeehn nyoge me thoohdh uyihih gene lume.

## 11

### *Thon Laajoruj*

<sup>1</sup> Noono e nyin me nyinge Laajoruj anaa abeehn ne twaany. Ngo anahg ngad geen Bathany. Bathany e naa geen beed Maarya ke Maartha nyemen. <sup>2</sup> Maarya ge anaa abeehn ne loar wihih Jeacuu ke mow kedea uwuunye tien ngo keehd yiehy wihih. Anahg Laajoruj umihih gen e naa atwaany. <sup>3</sup> Noono e ge nyemen lubo aohr gene bang Jeacuu, kob gene, “Ruohdh gomi ge anhyaari ngo atwaany.”

<sup>4</sup> Naa alihng Jeacuue ngo e arobe kea, “Atwaany Laajoruj padh gihih me nahg en. Gihih ni ree atiihye beere wihih Juog ke moaro kedea e nuu unahg dhe yoohn ubeehn Juoge unyoadhe ka moare wihih, a ge Ngad Boadh nyoge.” <sup>5</sup> Maartha maa Maarya kedea Laajoruj umihih gen ge anhyaar Jeacuue keraahyo. <sup>6</sup> Abee keehd maano, naa alihng Jeacuue lum atwaany Laajoruj e nihih ariow mooge ge adoge ke naah ce thube ke cidho.

---

10:39 10:39 7:30; 8:20 10:40 10:40 1:28 10:41 10:41 1:29-34; 3:27-28  
 10:42 10:42 2:23 11:1 11:1-2 12:1-3; Luk 10:38-39 11:3 11:3 11:36  
 11:4 11:4 9:3; 17:1

<sup>7</sup> Kaano e arobe yihr jo waahdhe kea, “Beehn dogo Judea.”

<sup>8</sup> Maa abeehr gene ngo yihre kob gene, “Ngad puohny! Wa yaa Judea ge adaahd ubahn gene yihn ke leele ka me cahng kan. Yih poohd daahd dog caahn bang gen ne?”

<sup>9</sup> Maa abeehr Jeacuue ngo yihr gen kobe, “Ngahda ngahyu kejea bad cahng acielo yea ne caae apaar wonge ariow me romo tiijh yihdh gen ne? Ngaa caahdh ke decahngo kare tooro ucwahnya ke leelo, bang gihn piny cang kedeo giij nyepinye ge uneehno yihre. <sup>10</sup> Abea nea ngaan ngo caahdh kii diehr waahr e kare nud ucwahnya bang gihn piny beehda muudho, gihn me meeny ngo tooro.” <sup>11</sup> Giij ni ge arobe kedeo ubare maalo ke rob yihr gen kobe, “Goma Laajoruj ngo aneno abea adaahd ucaa ne tahnge.”

<sup>12</sup> Maa abeehr jo waahdhe ngo yihre, “Ruohdh! Nea beehda niine e naa anene e atwaanye udoohng beer.”

<sup>13</sup> Abea Jeacuu anaa arubo kaa nying thon Laajoruj, abea jo waahdhe cuohn gene e ngo rubo kaa nying niin Pe'Dihmo now.

<sup>14</sup> Gihn nu e ngo abeehne ne robo yihr gen kejea, “Laajoruj beehde athow. <sup>15</sup> Abea cwihnya med, ke nying gihn toora buude beere wu uyiiho. Kea noono aayo ucidho ne maanye.”

<sup>16</sup> \* Noono e Thoamaj (ge cuohn ne kuoy) ake rubo yihr goan jo waahdh Jeacuu kea, “Cidho thiw, beere wo uthoo keehde tiehd.”

### *Jeacuu E Ne Meehg Nyoge Cahro Kedeo Kuowo*

<sup>17</sup> Ge anaa awahn Jeacuue ni e abeehne ne yoado kejea Laajoruj athow kedeo yihre ne nihn angween naa

---

11:8 11:8 8:59; 10:31 11:9 11:9-10 8:12; 12:35-36 11:11 11:11 Mat 9:24

\* 11:16 11:16 Mak 14:31; Rom 6:8 Thoamaj: 20:24

akoanye. <sup>18</sup> Bathany anahg geew me be baahr ke Jeru-ucalem, ngo anahg kar meale ariow. <sup>19</sup> Kede a yaa Judea me thoohdh ge anaa abeehn bang Maartha kede a Maarya nyemen bang ne ciim cwihny gen ke nying thon umiih gen. <sup>20</sup> Kaa alihng Maarthae ngo kejea Jeacuu nii yooh ne beehno e a'aj maalo ucea ne lor ngo. Abea Maarya adoohng paajo.

<sup>21</sup> Maa akoohb Maartha yih Jeacuu kea, “Ruohdh nea yih ne naa kan e umiiha be ne thow. <sup>22</sup> Abea ngo ngahya keehd awaahn ni kan e Juog gihn kwayi ngo cube cubo yihri.”

<sup>23</sup> Maa abeehr Jeacuu ngo yihre kea, “Umiihu ngo ucahr keehdo.”

<sup>24</sup> Maa abeehr Maarthae ngo yihre kea, “Ngo ngahya kejea ucahr cahng ucahr nyoge yi gug piny.”

<sup>25</sup> Maa abeehr Jeacuu ngo yihre kea, “A naa ngaa meehg nyoge cahro kede a an ne cub kuowo yih gen. Ngaa yiih luma e ngo udoohng ne ngaa me kuow keehd maa athowe <sup>26</sup> Nea ngaa me kuow maa ayiih luma e ngo be kuong thoo. Gihn ni ngo ayiih Maartha.”

<sup>27</sup> Maa abeehr Maarthae ngo kea, “Ayiih Ruohdh. Ngo ayiiha kejea yih naa Ngad Boadh nyoge ge Waahd Juog ge arob naa ubeehn wiih piny kan.”

### *Jeacuu Ayuog*

<sup>28</sup> Naa athum Maarthae ke rob e acidho ne cuohn Maarya nyemen oogo kiin nyoge. Maa amuonge yi yihdh ngo kea, “Ngad puohny abeehno kede a yih daahde daahdo.” <sup>29</sup> Naa alihng Maarya lum nu, e ngo aguo yedh maalo ne ci bang ngo. <sup>30</sup> (Jeacuu apoohd ke kaa anaa ayoad Maarthae ngo yea, e poohd kuu awahn yihdh miehr). <sup>31</sup> Kaano e yaa Judea giim anaa wod ne ciim cwihny

Maarya ge athubo ke buodh batiene naa aniid gene ngo e a'aj maalo ke laahdo ne ci oogo, cuohn gene kejea ngo caa wiih liel ne lalo.

<sup>32</sup> Naa awahn Maaryae kaa anahg Jeacuue yea ni kedea naa aniide Jeacuu, e ree ariedhe piny upahdhe thaahdh tien Jeacuu kedea urube kea, “Ruohdh nea yih ne naa kan e umiiha be ne thow.”

<sup>33</sup> Naa aniid Jeacuue Maarya maa yaa Judea giiah abeehno keehde e ge uyuog e cwihnye ake rahnyo kedea uyuog aduune keraahyo. <sup>34</sup> Maa apeehy Jeacuue kea, “Kuohme akanu kee?”

Maa abeehr gene ngo kejea, “Ruohdh beehn ni uniidi kaa ngo.”

<sup>35</sup> Kaano e Jeacuu piih wonge ake wojo. <sup>36</sup> Maa arub yaa Judea kob gene, “Maahnyu kaa anhyaare ngo kii ngo.”

<sup>37</sup> Abee nyoge mooge kiin gen kob gene, “Wong ngaa maa acoor ayabe, kare anud yihre ubahnge Laajoruj be ne thoo.”

### *Laajoruj Ameerh Jeacuue Cahro*

<sup>38</sup> Jeacuu yea acahg ngeero keehdo ge wahnhe wiih loohro kaa akan kuohm Laajoruj yea. Ngo anahg buur me beehda roony kedea dheeh ciehg kaa leelo. <sup>39</sup> Maa akoohb Jeacuu kea, “Looru leelo oogo dhe liel.”

Maa akoohb Maarthae nyemiiah ngaa athow kea, “Ruohdh kuohm dhaano anahg nihn angween yi buur, awaahn ngo ungwaahyo.”

<sup>40</sup> Maa ataahny Jeacuue rih Maartha kea, “Kaa anaa robo yihri ne kejea nea yih yiho e kaa amoar wiih Juog kii ngo niidi niido?”

<sup>41</sup> Maa akahl gene leelo oogo dhe buur. Noono ubeehn Jeacuue umaahnye maalo maa arube kea, “Abaa Wura

koochri amuoja bang gihn alihngi luma. <sup>42</sup> Ngo ngahya kejea luuba ge beehde e ge yiihi yiiho kedeo ngo roba kaa nying yaa ni cuung kan bang unghy gene ngo kejea yih naa aohr an.”

<sup>43</sup> Ge athume keehd rob e ake cuohdo e duone ne maalo kea, “Laajoruj beehn oogo.” <sup>44</sup> Maa abeehne oogo e cinge kedeo tiene poohd e ge atuohj ke waaro kedeo e wonge abahj ke waaro.

Maa arob Jeacuue ngo yihr gen kea, “Kahlu waay thoo oogo yi kuohme umeehgu ngo ci paajo.”

*Kaa Agweehg Nahg Jeacuu*

*(Mat 26:1-5; Mak 14:1, 2; Luk 22:1, 2)*

<sup>45</sup> Noono e amahr yaa Judea giih anaa abeehno keehd Maarya kedeo naa aniid gene gihn atiihye, e lum Jeacuu ayiih gene. <sup>46</sup> Abea nyoge mooge kiin gen ge abeehn ne ci bang Paarijea urob gene kwaad gihn atiihy Jeacuue ge aniid gene ni. <sup>47</sup> Maa abeehn jo doong yaa lam kedeo Paarijea ucuohn gene amaad gihr Akuud Judea; noono upiih gene ne peehny rog gen, “Maahnyu ka beehn nyine utiihye giih me gaahy nyoge me thooohdh! <sup>48</sup> Nea ngo meehgo ke bar maalo ke yug giih ni, e amahr nyoge giih puohnye ge beehn gene ke ne yiiho noono e apahne giih Roama kar kwaj gihro beehn gene ke ne kaabo kedeo utoar gene ngo piny.”

<sup>49</sup> Noono e dhaano acielo kiin gen me nyinge Kaaypaj ge anahg ngaa duohng yaa lam yi wong nu ake rubo kea, “Wu nyoge me gihn me ngahyu tooro. <sup>50</sup> Ngo kwihyu kejea ngo beer ubeehn dhaano acielo uthowe ke nying nyoge cang yi man beehn paajo ke kare cang uthowe.”

<sup>51</sup> Gihn ni arobe padh lubo me en naa apar ngo ke robo. Abea bang gihn anahg en naa ruohdh duohng yaa lam yi wong nu, e naa ameehg Juoge ngo rob gihn utiihy ree rih Jeacuu: ge uthowe ke nying tien paar yaa Judea. <sup>52</sup> Kede a padh ke nying tien paar Judea keede e nuu uthowe abea beehda ke nying nyethen Juog ge akeedho ke bang wi ih piny cang beere ge kahle ke ka maa acielo kede a umade yihdh gen. <sup>53</sup> Ke wong cahng nu, e ge athubo ke gweehg dhe yooh me dhiil gene Jeacuu ke naah.

<sup>54</sup> Noono e Jeacuu kuu acahg waahdh naa arwaadh ke kiin yaa Judea. Ngo abeehn ne dag paajo me cahng ke dhe ukang. Kaa adag gene ne beehdo yi ngo keehd jo waahdhe anahg geen Eparem.

<sup>55</sup> Ge anaa adoohng Yaan Amono cahng ni, e nyoge me thoohdh ge athubo ke ci yi geen Jeruucalem ne yug gi ih kweehr ne koar cahng yaay. <sup>56</sup> Noono e nyoge ge athubo ke cej ka ne Jeacuu e yea kaa anaa acuong gene yi laaro gi hr Wod Juog kede a e ge upee hyo ke rog gen kob gene, “Ne ngaa me ngahy ngo kejea Jeacuu ubeehn kar Yaan Amono?” <sup>57</sup> Abea ka jo doong yaa lam maa Paarijea amor acub gene kob gene nea ngaa ngahy ka ne Jeacuu yea e kea robe ngo beere ngo mag gene mago.

## 12

### *Jeacuu Awiihr Ke Mow Me Ngwaahy*

*(Mat 26:6-13; Mak 14:3-9)*

<sup>1</sup> Jeacuu awahnh geen Bathany maano e adoohng ni hn abiihjbeciel unahge cahng Yaan Amono. Laajoruj ngaa anaa atahng Jeacuu e ucahre yi thoo ngo abeed Bathany.

<sup>2</sup> Cam anaa agwiir Maarthae yihre paar ge Laajoruj.

Maartha e naa anaa apiih buud gen kaano acahm gene cahmo. Laajoruj anaa apiih tiehd ke gen ne cam. <sup>3</sup> Maa abeehn Maarya ukaabe udhoohmo me yea ne mow me ngwaahy me ngiene teeg keter uwihre tien Jeacuu kede a uwuunye tien ngo keehd yiehj wiihe. Maa abeehn mowe upaahnge yea wod ke ngwahje.

<sup>4</sup> Maa akoohb Juudo Yijkaarid ngad waahdh Jeacuu, ge e nuu ubeehn ne luom ngo kea, <sup>5</sup> “Gihn ge bahnge mown ni be ne ngeew oogo beere amahr ngiihny me thoohdh ge yoad ge ke paahngo yih nyoge maa angoohng? Ngiihny ne yoad ge ne nahg kar koog gihr dhaano yi wong acielo.” <sup>6</sup> Gihn nu kea robo kaa nying gihn anhyaare nyoge maa angoohng, abea ngo anahg ngad kahw me na ukahbo rog ngiihny na cub yihre ne maa. Anahg en ne mag ngiihny yoad yaa waahdh Jeacuue bang nyoge.

<sup>7</sup> Maa abeehr Jeacuue lume kobe, “Wiiu dhaahr ni utiihye gihre ne tiihye. Keá ngaa gied ngo! Ngo beehda gihn maa agwiir ke coon kejea mown ngo akan kaa nying cahng thona. <sup>8</sup> Yaa angoohng ge beehdo e ge nud ke wun ke cahng cahng. Abee a buu kwaay nudo ke wun.”

<sup>9</sup> Naa alihng amahr yaa Judea ngo kejea Jeacuu ngo ne Bathany, e ge acidho ne maany Laajoruj ge atahng Jeacuue maalo yi thoo kede a ge acidh thiow ne maany Jeacuu. <sup>10</sup> Noono e jo doong yaa lam ge athubo ke daahd dhe yooch me nahg gene Laajoruj kede a Jeacuu thiow. <sup>11</sup> Ge adaahd unahg gene Laajoruj bang gihn beehda ke nyinge e naa abeehn yaa Judea me thoohdh udoohng gene ne yaa Jeacuu.

---

12:3 12:3 Luk 7:37-38 12:4 12:4 6:71; 13:2, 27; 18:2 12:5 12:5 Mat 19:21; Jeam 2:15-16 12:7 12:7 19:40 12:9 12:9 11:43-44 12:11 12:11 11:45

*Ngad Boadh Nyoge Awahnh Jeruucalem  
(Mat 21:1-11; Mak 11:1-11; Luk 19:28-40)*

<sup>12</sup> Ruuwow e amahr akuud yaa Judea ge anaa abeehn yi yaay, ngo alihng gene kejea Jeacuu ngo nii yooch ne beehn Jeruucalem. <sup>13</sup> Maa atoochng gene ageehbe kedeaa ucidh gene ne lore e ge ukwaago kob gene,  
“Wuoro Juog.

Dooj Juoge ngade ge abeehno ke yooch Paar Maalo.  
Juog dooj ruohdh yaa Yijarael.”

<sup>14</sup> Maa abeehn Jeacuue uyoade akaja maa apaahre wiich ngo wa kwaad kaa anaa agweede yi kitaab Juog,

<sup>15</sup> “Wu keá tudo,  
wu yaa Jeruucalem,  
maanyu ruohdh ne ca beehn nu  
e ne wiich akaja me poohd thiin.”

<sup>16</sup> Giih nu ayug rog gen yihdh gen kuu anaa aguo jo waahdhe ke deado kejea ge beehda giih maa agweed yi kitaab Juog ke nying Jeacuu. Abea batien kaa acahre ke dhe yooch me gaahy nyoge e naa angey gene ngo kejea giih maa agweed ke nying Jeacuu ge aniid gene e rog gen tiihy gene tiihyo.

<sup>17</sup> Amahr yaa anudo keehd Jeacuu ge anaa atahnge Laajoruj yi thoo gihn atiihy ree anaa abeehn gene ne nyaay piny yihr nyoge. <sup>18</sup> E naa gihn ameehg amahr nyoge beehn ne lor Jeacuu ke nying gihn teeg e anaa ayuge ni. <sup>19</sup> Maa arub Paarijea ke rog gen kob gene, “Gihn me romo ke yugo tooro ne weey weey. Niidu kaa abuodh amahr nyoge me thoohdhe batiene!”

*Yaa Griihg Me Daahd Jeacuu*



<sup>20</sup> Anudo ke yaa Griihg maa anaa kiin yaa anaa acidho yi yaay ne wuor Juog. <sup>21</sup> Noono e ge abeehn bang Pihlihbe. (Pihlihbe anahg ngad Bedhceada ge beehda geen Gaalili). Gihn nu e ge arubo yihre kob gene, “Ruohdh! Wa daahd ucidh wane bang Jeacuu.”

<sup>22</sup> Maa abeehn Pihlihbe urobe lum nu yihre Andrya kede a uay gene tiehd ucidh gene ne rob gihn ateed yaa Griihge yihre Jeacuu.

<sup>23</sup> Abea ngo abeehr Jeacuu yihre gen kea, “Cahng ngo abeehno ge ubeehnu wu yaa padh Judea uromu doohng ne nyoge maa ayih Juoge ne yaae thiw. Gihn nu ree uyuge ge ubeehn Juoge umeehge tee gihre niido ke dhe yoohn gihn utiihy ree riha. <sup>24</sup> A rob gihn maa athiir yihre. Nea a athow e nyoge me thoohdh Juog beehn gene ke ne ngahyo. Thona uroomo ke wong beehlo nea ke piidho e ngo kuong thoo batiene e ngo utuuyo kede a uciege. <sup>25</sup> Kwaad ngaa yug gihn nyaare cog kede a ukoare gihn me pahdh wihe, e ngaan nu kuowo me guge tooro be yoade. Abea kwaad ngaa nyaar buodh batiena keehd me padh ngaan ngo Ujudea kede a ubeehn nyoge cang umahd gene rih ngo, e yihre unaa kuowo me be gug. <sup>26</sup> Kwaad ngaan tiihy yihra dhiile batiena ke buodho beere ngo caa ka nuda yea. Kaano e nuu ubeehn Wura umoare wihi ngaa tiihy yihra keehd me padhe Ujudea.

### *Jeacuu Urubo Ke Nying Thone*

<sup>27</sup> “Awaahn ni cwihnya urahmo, abea roba gihn? Koohba kaa, ‘Abaa Wura kuohma kea meehg raahm wa ka ngahya raahm gihn uyoada ni?’ Abea utiihya ke ne diih keehdo abea anahg ke nying raahm ngo e naa abeehna

---

12:21 12:21 1:44; Luk 19:3; 23:8      12:23 12:23 2:4; 12:16      12:24 12:24-25  
 Mat 10:39; 16:24-25; 1Kor 15:36      12:26 12:26 14:3; 17:24      12:27 12:27  
 12:23; Mat 26:38

wiih piny! <sup>28</sup> Abaa Wura nyoadh teegi yihr nyoge wiih piny kan.”

Kaano e duol ake lihngo ke yoohn Paar Maalo kobe, “Tee ngo beehde e ngo anyoadha kedea ngo udoga ke nyoadho keehdo.” <sup>29</sup> Akuud nyoge giih anudo kaano duol alihng gene ke yoohn Maalo maa akoohb nyoge mooge kejea, “Kodh e naa amaahr.” Abea nyoge mooge kob gene, “Beehda wuohnjuog e naa arubo keehde.”

<sup>30</sup> Maa abeehr Jeacuue ngo yihr gen kea, “Duol gihn nu ngo kuu arubo kaa nying kony an, abea arubo kaa nying kony wun. <sup>31</sup> Awaahn ni e ne beehn Juoge ukihme yaa wiih piny kedea Juog ngad atiihb ukeehg, ge raany wiih ngoom ngo urieme oogo wiih koom. <sup>32</sup> Abea cahng ugur an wiih yaadh maa ariihw ne naah, e nyoge ge umeehga beehn banga.” <sup>33</sup> (Gihn nu arob Jeacuue ne nyoadh dhe yoohn ka unahge kii ngo).

<sup>34</sup> Noono e ngo abeehr nyoge yihre kob gene, “Wa arob loohng Moaje kejea Kriihjto ubeehdo e ngo be thow. Gihn ge rubi kobi, ‘Ngaa adoohng ne dhaano utaahngo ngo uthow utihnge maalo.’ Beehda ngaa e naa adoohng ne dhaano utaahngo?”

<sup>35</sup> Noono e ngo arob Jeacuue yihr gen kea, “Daahr meeny piny ngo poohd ubeehdo ke wun ka me thiin mee. Baru maalo ke waahdhu ka poohde daahr nud ke wun beere muudho wu be moale piny. Bang gihn ngaa caahdh kii yi muudho ka cea yea ngo kwihye. <sup>36</sup> Yiihu luma a ngaa cub daahr yihr nyoge maano e ngo poohd nud ke wun, beere wu udoohng ne nyethen ngaa cub daahr yihr nyoge.”

---

12:28 12:28 17:1; Mat 3:17; 17:5      12:31 12:31 5:22; 14:30; 16:11      12:32  
 12:32-34 3:14      12:33 12:33 18:32      12:34 12:34 Jon 12:23; 3:14      12:35  
 12:35-36 7:33; 8:12      12:36 12:36 5:13

*Judea Ge Abar Maalo Ke Kweer Ke Lum Jeacuu*

Ge athume ke rob luube giih nu e Jeacuu a'aay ucea ne pahno ka me be yoad ree yihr gen. <sup>37</sup> Keehd maano abeehn Jeacuue uyuge amahr giih me thoohdh me gaahy nyoge nyum gen, e poohd e ge ukweer ke lume. <sup>38</sup> Giih nu cang rog ge ayug gene beere luube giih agamloohngjuog ge cuohn ne Yicaaya ge dhiil pahdh kar gen naa athere wa kwaad kaa agweede naa,

“Juog, bekihd ngaa maa anaa alihng giih arob wane kede a utoor dhaano maa adead giih tee ge atiihy Juoge.”

<sup>39</sup> Ge kuu ayiiho bang gihn arob Yicaaye thiw kea,

<sup>40</sup> “Kob Juoge kea,

‘Bang gihn wudh gen aciehg gene

ukweer gene ke yiiho,

udoohng wa an naa aciehg wudh gen

utoor ka maa angey gene yi luma.

Ge naa arom ke thiehdho

nea wudh gen be ne ciehg gene.’ ”

<sup>41</sup> Giih ni ge arob Yicaaye bang gihn kaa amoar wiih Jeacuu kii ngo anyoadh yihre yi laahg e naa gihn arube ke nying ngo.

<sup>42</sup> Abea keehd maano, e Judea me thoohdh maa ruohdh paajo lum Jeacuu ayiih gene. Abea ke nying Paarijea e ge atud ke nyoadh rog gen bang gihn ge beehn gene ke ne riem oogo yi wod amaad. <sup>43</sup> Bang gihn Judea giih nu, nea yihr gen e leej gihn ayoad gene bang nyoge e ne wiihe ne maalo yihr man yoad gene bang Juog.

*Padh Jeacuu E Ne Kihmo*

<sup>44</sup> Kaano e Jeacuu lubo angweele piny ke duol me teeg kobe, “Kwaad ngaa ayiih luma, kuu ayiih lum mara ke nguda abea beehda lum ngaa aohr an e naa ayiihe. <sup>45</sup> Kwaad ngaa alog cwihnye ne maany an, e ngaa aohr an e naa ayiihe. <sup>46</sup> A beehda daahr gihn abeehn ne meeny wiih piny kedea kwaad ngaa ayiih luma be cahg beehdo yi muudho keehdo.

<sup>47</sup> “Abea ngaa alihng luma kedea akweer ke wuor ngo, e ngo be kihma. A abeehn wiih piny kan ne boadh nyoge. A kuu abeehn ne kihm nyoge. <sup>48</sup> Kwaad ngaa kweer ke lihng luma kedea luma be yiihe nud ke gihn muu ukihm en. Gihn ukihm en beehda luuba ge ateeda ni ge nuu ukihm en yi cahng gug piny. <sup>49</sup> Bang gihn, luub roba ge padh luuba abea Wura e aohr an ni e naa acub tee yihra kedea uteede ngo yihra kejea roba gihn teeda. <sup>50</sup> Ngo ngahya kejea tee gihn cube yihra ni e naa dhe yoohn boadh wahy me be gug. Neehn maano kwaad gihn roba e naa gihn arob Wura yihra.”

## 13

### *Jeacuu Tien Jo Waahdhe Aluoge*

<sup>1</sup> Ke wong thiehno, ge ruuwow e naa cahng Yaan Amono, e ngo angahy Jeacuae kejea cahng aaye oogo wiih piny ne dog bang wahn ngo awahnho. Nhyaahro gihre anyoadhe yihr jo waahdhe ke yoohn thone ge uigure ngahy yaadh maa ariihw. <sup>2-3</sup> Kaano anaa apiih Jeacuae maa jo waahdhe ne cam ke thiehno e atiihb ukeehg lubo arobe coon yihr Juudo Yijkaariod waahd Cimoane kejea dewaahy nu e nu uluome Jeacuu. Ngo beehde e ngo

---

12:44 12:44 5:24    12:45 12:45 14:9; 5:18    12:46 12:46 12:35-36    12:47  
 12:47 3:17; 5:22    12:49 12:49 7:16-17    12:50 12:50 4:34    13:1 13:1 2:4  
 13:2-3 13:2 12:4; Luk 22:3    13:2-3 13:3 3:35; 8:14

ngahy Jeacuue kejea tee acub Juoge yihre ne yug kwaad giih nyepinye cang kedea ngo ngahye kejea e abeehno ke yoohn bang Juog kedea udo bang Juog. <sup>4</sup> Noono e Jeacuu a'aj maalo kedea uthube ke kahl waahny athoohr gihn anaa ree oogo kedea uriuwe waaro moogo yi badhe. <sup>5</sup> Ke batien gihn nu e Jeacuu athubo ke woj piih yi wal noono maa athube ke luog tien jo waahdhe kedea uwuunye tien gen keehd waaro gihn anaa ariuwe yi badhe ni. <sup>6</sup> Naa awahn Jeacuue bang Cimoane Piihter, e Piihter arubo yihre kea, “Ruohdh! Tiena romi kaa luogo ne!”

<sup>7</sup> Maa abeehr Jeacuue ngo yihre kea, “Gihn ni tiihya awaahn ni be ngey ree yihru abea ngo unghayu cahng moogo.”

<sup>8</sup> Maa abeehr Piihtere ngo yihre kea, “Bekihde! Tiena be kuongi ke luogo ne weey weey!”

Maa acahg Jeacuue ngo ke beehro kea, “Nea tieni be luoga luogo e yihri utoor gihn me nweehd an ke yihn.”

<sup>9</sup> Maa arub Piihtere yihre kea, “Nea wa maano ruohdh e padh tiena cog ge ne luog abea luog cinga kedea wiiha cang.”

<sup>10</sup> Maa akob Jeacuue ngo yihre, “Kwaad dhaano maa aluog beehda tiene cog ge ne dihd, udoge gen ke luogo. Wu cang, wu aluog udoohngu ne nyoge me nyooro tooro rogu abea dhaano acielo kiinu e ne ree ne nyooro.” <sup>11</sup> Ngo beehde e ngo ngahy Jeacuue e ngaan uluom en. E naa lum yea gihn akoohbe kea, “Dhaano acielo kiinu e ne ree ne nyooro.”

<sup>12</sup> Naa athume ke luog tien gen e waahny athoohr gihre angaabe kedea udoge kare ne piih. Maa apeeध्ये gen kea, “Gihn ayuga rogu ni yea angeyu ne? <sup>13</sup> A cuohnu cuohno

ne ngad puohny kedea ne ruohdh. Beehda gihn maa kare ucuohnu an ne ngad puohny kedea ne ruohdh bang gihn a ngad puohny gihru kedea ruohdhu adiehr muon. <sup>14</sup> Me neehn kaan ni aluoga tienu abea a beehda ruohdhu kedea ngad puohny gihru kea noono beehn dhaane kiinu luoge tien wad gen. <sup>15</sup> Luog tiel anyoadha yihru beere gihn atiihya yugu yugu wa kaano anyoadha ngo yihru. <sup>16</sup> Athiir e ne roba yihru. Baahng aweehne e ne wiihe ne maalo rih ngaa nahge baahng paare? Wale ngaa e ne wiihe ne maalo, ngaan aohr wale ngaa aohr ngo? <sup>17</sup> Awaahn ni adiehj yihdh luub ni ge angeyu. Kea noono tiihyu ke gen beere cwihnyu umihno.

<sup>18</sup> “A be rubo kaa nyingu cang bang gihn yaa anaa akwanya ge ngahya. Abea gihn agweed yi kitaab Juog ngo dhiil pahdh kare ne rihb wa kaa agweede naa, ‘Nгаа anywaag wane amono keehde, e naa adooing ne ngad mahna.’

<sup>19</sup> “Gihn ni ateeda yihru maano e gihn ngo ree poohd keá tiihyo beere nea ree tiihye tiihyo, e ngo uyiihu kejea beehda an e Juog ke nguda, a naa Ngad Boadh nyoge. <sup>20</sup> Athiir e ne roba yihru. Ngaan ayiih lum ngaa aohr an e ngo ayiih luma kedea ngaa ayiih luma ayiih lum ngaa aohr an.”

### *Jeacuu Kea E Uluom*

*(Mat 26:20-25; Mak 14:17-21; Luk 22:21-23)*

<sup>21</sup> Batiene naa athume ke rob gihn ni e aduune ake ngoan maa arube oogo kea, “Athiir e ne roba yihru, dhaano acielo kiinu a uluome.”

---

13:15 13:15 1Jon 2:6; Pihp 2:5; 1Pii 2:21      13:16 13:16 15:20; Mat 10:24  
 13:17 13:17 Jeam 1:25      13:18 13:18 Jon 17:12      13:19 13:19 8:24; 14:29;  
 16:4      13:20 13:20 Mat 10:40

<sup>22</sup> Kaano e jo waahdhe ge agaahy maa athub gene ke maahnyo ke kiin gen ke ngaan robe. <sup>23</sup> Ngaan nhyaar Jeacuue kiin jo waahdhe anaa apiih buud Jeacuu. <sup>24</sup> Gihn nu e ngo amun Cimoane Piihtere maa ateede ngo yihre kejea peehnye ngaa kiin gen e ne rub Jeacuue ke nyinge.

<sup>25</sup> Maa aloge wiih bang Jeacuu maa apeehye kea, “Ruo-hdh beehda ngaa?”

<sup>26</sup> Maa abeehr Jeacuue ngo kea, “Beehda ngaan cuba amono gihn cwinya ke kado yihre.” Noono maa acwinye amono ke kado kedea ucube ngo yihr Juudo waahd Cimoane. <sup>27</sup> Nye wong kaano akaab Juude amono yi cinge nu, e kuohm Juudo abeehn atiihb ukeehg ne yaahngo cang.

Maa arub Jeacuue yihr ngo kea, “Gihn daahdi laar ngo ke tiihyo piow piow.” <sup>28</sup> Yaa anaa anudo wiih cam gihn arub Jeacuue yihre wa gihn nu ngo kuu angey gene. <sup>29</sup> Mar gen cuohn gene kejea ngo caa ne cub ngiihny yihr nyoge maa angoohg bang gihn nahge en naa ngad mag ngiihny.

<sup>30</sup> Maa akaab Juudoe amono gihn acwinye kedea e naa waahdhe noono. Kaano piny anaa adoohng ne dewaahr.

### *Loohng Nyaahn Gihn Awii Jeacuue Piny*

<sup>31</sup> Batien kaa a'aay Juudo e Jeacuu arubo kea, “Awaahn ni, a ge adoohng ne dhaano utaahngo wiha amoar kedea wihi Juog amoar thiow ke nyinga <sup>32</sup> kedea Juog wiha umoare ka me cahng kan.

<sup>33</sup> “Wu jo waahdha, a ubeehdo ke wun ke nihn me noog mee. Kara udaahdu. Abea roba robo yihru wa kaa anaa aroba ngo yihr yaa Judea. Ka caa yea wu be cidh yea.

<sup>34</sup> “Loohng me nyaahn e man cuba yihru: wa kwaad

---

13:23 13:23 19:26; 20:2; 21:7, 20 13:27 13:27 13:2 13:29 13:29 12:6  
13:31 13:31-32 17:1 13:33 13:33 8:14 13:34 13:34 15:12, 17; 1Jon 2:7-8;  
3:11, 23; 4:11; 2Jon 5-6

kaa anhyaara wun, kea dhiilu rogu ke nhyaaro naa acielo acielo. <sup>35</sup> Nea nhyaahro nud kiin nu, e nyoge cang ngo dhiil gene kaa ngeyo kejea wu beehda jo batiena.”

*Jeacuu Dhe Yoohn Ka Upiem Piihtere En Arobe Yihr Jo Waahdhe*

(*Mat 26:31-35; Mak 14:27-31; Luk 22:31-34*)

<sup>36</sup> Maa apeehy Cimoane ge cuohn ne Piihter kea, “Ruohdh yih caa kee?”

Maa abeehr Jeacuue ngo kea, “Ka caa yea wu be rom ci yea awaahn ni. Unahg cahng moogo e nuu ubuodhu batiena.”

<sup>37</sup> Maa apeehy Piihtere kea, “Ruohdh gihn e bahng e batieni be roma ke buodho awaahn ni. Ke nyingi, riha cuba kii thoo.”

<sup>38</sup> Maa abeehr Jeacuue ngo kea, “Kare tooro yihri uthowi ke nyinga. Gihn maa athiir e ne roba yihri. Maano e uthuonjieno poohd kuu akoohg, e yih upeehmo tiel adahg kejea a kwihyi.”

## 14

*Jeacuu Cwihny Jo Waahdhe Aciihme*

<sup>1</sup> Maa akoohb Jeacuue kea, “Wu keá diero. Yiihu lum Juog kedea yiihu luma thiow. <sup>2</sup> Paar Wura yea ne wuude me thoohdh kedea a caa ne gwiir kuohn beehdo giihu. Nea ngo be ne naa wa gihn nu, e gihn be naa arobo yihru. <sup>3</sup> Abea ge aaya ne cidh ne gwiir kuohn nu, e a uduu bangu ne kaab wun beere wu kedha ke ka beeda. <sup>4</sup> Kun caa yea yoohn ngo ngahyu.”

*Jeacuu E Naa Yooh*

<sup>5</sup> \* Maa arub Thoamaje yihre kea, “Ruohdh ka ci yea

---

13:35 13:35 1Jon 3:14      13:36 13:36 8:14; 21:19      13:38 13:38 18:27  
14:1 14:1 14:27      14:3 14:3 12:26      \* 14:5 14:5 Thoamaj: 20:24



kwihiy wane: dhe yoohn cidh bangi ungahy wane ke ne diih?”

<sup>6</sup> Maa abeehr Jeacuue ngo kea, “A naa yooh a naa gihn maa athiir maa a naa kuowo. Ngaa me rom wahdh bang Wura tooro nea ngo be kahnk kaa banga. <sup>7</sup> Nea a nuu ngahyu ne cohg e a beehda ngaa, e Wura nuu ngahyo thiow. Kede a me neehn bad cahng tihn ge ngahyu an ne cohg, e Wura ngo ngahyu thiow.”

<sup>8</sup> Maa akoohb Pihlihbe kea, “Ruohdh meehg wan niid Wuru ke nying wan utoor gihn mooge me daahd wane.”

<sup>9</sup> Maa abeehr Jeacuue ngo kea, “A dhiilu kaa ngahyo bang gihn a abeehdo ke wun ke ka me laaj. Ngaa aniid an e Wura aniide! Gihn ge dogi rob kejea, ‘Nyoadh Wuru yihr wan?’ <sup>10</sup> Ngo be yihi kejea a beehda anweehd ke Wura kede a Wura beehda anweehd ke an ne? Luube gihih ni teeda yihru ni ge padh luub muua keeda. Abee ngo beehda Wura ge anweehd keehd an e ne tiihyo. <sup>11</sup> Dhiilu luma ke yihi nea a urubo yihru kejea Wura anweehd keehd an kede a anweehd keehd Wura. Nea maano be yihi kea yihi ke nying gihih gaahy nyoge ge niidu e ge tiihya tiihyo. <sup>12</sup> Gihn ni roba yihru beehda athiir: kwaad ngaa ayiih luma utiihyo ke kwaad gihih me neehn gihih teeg ge tiihya ni. Gihih me teeg me yoohm wudh muu atiihya ge rome kaa tiihyo, bang gihn a ado bang Wura. <sup>13</sup> Kede a gihn peehnyu ke nyinga ngo tiihya tiihyo yihru bang umeehga nyoge niid ka teeg Wura kii ngo. <sup>14</sup> Nea wu apeehyo yihra ke kwaad nyepiny ke nying gihn nahgu yaa batienna ni, e ngo dhiila kaa yugo yihru.

*Jeacuu Beehn Wahy Juog Acege Piny Yihr Jo Waahdhe*

<sup>15</sup> “Nea a anhyaaru, kea yiihu luma. <sup>16</sup> Noono e a urubo ke Wura beere Wahy Juog e ucwag wun oohre oohro yihru. <sup>17</sup> Ngaan uoohre ne beehda keehd wun beehda Wahy Juog ge nyoadh gihn maa athiir. Ngad cwaahg, yaa reje wiih piny ge ukweer keehde bang gihn ngo be neehn yihr gen kede a ngo kwihy gene. Abea ke kur maru ngo ngahyu ke nying gihn ngo beehd kaa wun.

<sup>18</sup> “Wu buu uwii a piny wa mar kiihye. A uduu bangu. <sup>19</sup> A doohng kaa me thiin ubahng e a buu ucahg yaa wiih pinye ke niido keehdo. Abea ke kur maru a uke neehn yihru bang gihn a ucahr, e wu ucahr thiow. <sup>20</sup> Cahng ucahra, e naa ka ungahyu ngo kejea a beehda anweehd keehd Wura kede a wu anweehd keehd an kede a beehda anweehd ke wun. <sup>21</sup> Kwaad ngaa tiihy loohng e giiha e roba yihre ni, e naa ngaa nhyaar an noono. Kede a kwaad ngaa nhyaar an ngo nhyaar Wura nhyaro kede a ngo nhyara nhyaro maa riha nyoadha nyoadho yihre thiow.”

<sup>22</sup> Maa akoohb Juudo (Padh Juudo Yijkaarid) kea, “Ruohdh gihn ge nahge ke yihr wan cog e ne daahdi rihi ke nyoadho abea padh yihr yaa wiih piny cang?”

<sup>23</sup> Maa abeehr Jeacuue ngo yihre kea, “Ngaa nhyaar an e luube giiha ge umage yi wiihe kede a ngo unhyaar Wura kede a Wura maa an wa ubeehn ne beehd keehde. <sup>24</sup> Yaa be nhyaar an luube giiha ge buu umag gene. Kede a luube giih roba ge padh luube me aay ke banga. Ge beehda luub ngaan aohr an.

<sup>25</sup> “Giih ni cang ge aroba maano e a poohd ubeehdo ke wun. <sup>26</sup> Abea ngad cwaahg ge nyinge cuohn ne Wahy Juog

---

14:15 14:15 14:21, 23; 15:10; 1Jon 5:3; 2Jon 6 14:16 14:16 7:39; 14:26;  
 15:26; 16:7, 13; 20:22; 1Jon 3:24; 4:13; Tiihy 1:4; 2:4 14:17 14:17 1Kor 2:10-16  
 14:19 14:19 16:16; 8:14 14:20 14:20 5:18 14:21 14:21 14:15 14:23  
 14:23 Any 3:20 14:24 14:24 7:16 14:26 14:26 14:16

ni, ge uoohr Wura, wu upuohnye ke giikh nyepinye cang kedea umeehge wun par giikh anaa arob yihru cang. <sup>27</sup> Yoohm rog awiia piny yihru kedea yoohm rog gihra ngo acuba yihru. Ngo kaa acubo yihru wa mar yaa wiikh piny kan, wu keá diero kedea wu keá tud.

<sup>28</sup> “A alihngu e a urubo kaa, ‘A uaay kedea a uduu bangu.’ Nea a nuu nyaaro, e cwihnyu ne mihno bang gihn a caa bang Wura kedea Wura e ne duohng riha. <sup>29</sup> Ngo aroba yihru awaahn ni maan e Wahy Juog poohd kuu abeehno beere cahng yuge ree, e gihn aroba ngo uyiihu kejea ngo athiir. <sup>30</sup> A be cahng rob ke wun keehdo bang gihn ruohdh yaa wiikh piny ngo abeehno. Abea keehd me beehne, e a be rom leehw yihre. <sup>31</sup> Abea yaa wiikh piny dhiil gene ngo ke ngahyo kejea Wura ngo nyaara nyaaro kedea e naa gihn tiihya nyepinye wa kwaad kaa arobe yihra.

“Beeh aayo oogo kan.

## 15

### *Juog Wo Ngahye Kaa Kaahno Udoohngo Beer*

<sup>1</sup> “A uroomo ke yaadh me cuung yea ajeniino, yaadh me wiihe be toohr ke nyethen kedea Wura e naa ngad ajeniino. <sup>2</sup> Bad yaadh me nyethen toor wiihe ngole ke oogo abea bad me wiihe ne nyethen ngo gwiire gwiuro beere unyuol ke nyethen me thoohdh. <sup>3</sup> Abea ke kur maru, wu kwel, rogu toor adhemuohm bang gihn wu aluog luube giikh aroba yihru. <sup>4</sup> Madu rogu banga beere riha mada ke bangu. Bad yaadh keede be rom nyuol ke nyethen nea ngo tooro rih yaadh. Keehd wun thiow gihn

---

14:27 14:27 16:33; 20:19, 21      14:28 14:28 8:14      14:29 14:29 13:19  
 14:30 14:30 12:31      14:31 14:31 15:10; Mat 26:46      15:2 15:2 Mat 3:10  
 15:3 15:3 13:10      15:4 15:4-5 6:56; 15:7, 10, 16; Rom 11:17-18; 2Kor 3:5; 4:7;  
 1Jon 2:6, 28; 3:6, 24

me romu ke tiihy wu keedu tooro nea wu be mahd banga unahgo anweehd.

<sup>5</sup> “A ne room ke yaadh kedea wu neehn baahde. Ngaa beehdo naa anweehd tiehd ke an kedea ubeehda naa anweehd tiehd keehde, e naa ngaa me beer wa mar yaadh me nyuol. Ngaa padh anweehd tiehd ke an gihn me rome ke yoado tooro. <sup>6</sup> Nea ngaa padh anweehd ke an, e ngo uroomo ke bad yaadh maa angol oogo utale. Baahd yen giih ngol oogo ge ne cong uthoohr gen yi maaj ne waang. <sup>7</sup> Nea wu ubeehdo tiehd ke an umagu wudh luube giha, e kwaad gihn kwayu ke nyinga ucub Wura yihru. <sup>8</sup> Kea beehnu udooohngu ne nyoge me beeye wa mar yaadh me nyuol kedea unyoadu ngo ke dhe yoohn nu kejea wu jo'a. Gihn nu thiw beehda nyuudho e naa anyoadhu beey Juog.

<sup>9</sup> “Wa kwaad ka nhyaar Wura an ni, e naa kaa anhyaara wun thiw. Beehdu naa anweehd tiehd ke an beere wu nhyaara nhyaaro. <sup>10</sup> Nea loohnge giha ge amagu beer mee, e wu nhyaara nhyaaro wa kwaad ka nhyaar Wura an bang gihn loohnge gihe ge maga mago. <sup>11</sup> Giih ni ge aroba yihru, beere kwaad mihn cwihny gihn ne yihra ni ngo yoadu yoado kedea utoor gihn me daag yi mihn cwihny gihru. <sup>12</sup> Gihn ni e naa loohng aroba yihru: nhyaaru rogu wa kwaad ka nhyaara wun. <sup>13</sup> Kwaad nhyaaro gihn nu room kaa nhyaaro gihr ngaa maa acub wahye yi thoo ke nying gome. <sup>14</sup> Wu beehda goma nea gihn teeda yihru yugu yugo. <sup>15</sup> Wu be cahga ke cuohno ne baahng giha keehdo, bang gihn baahng me ngahy gihn nii cwihny ruohdhe tooro. Abea wu cuohna e wu goma kaa nying gihn, giih arob Wura yihra ge ateeda yihru

---

15:6 15:6 Mat 7:19    15:7 15:7 15:16    15:8 15:8 14:13; 17:1    15:9  
 15:9 13:1; 5:18    15:10 15:10 14:15    15:11 15:11 16:22, 24; 17:13; 1Jon 1:4  
 15:12 15:12 13:34; 1Jon 4:11    15:13 15:13 10:11

cang ungahyu gen. <sup>16</sup>\* Padh wun naa akwany an, abea a naa akwany wun beere gihn me beer tiihyu tiihyo wa mar yaadh me nyuol me wiihe be toohr ke nyethen. Ke nying tiihyu noono, e gihn kwayu yihr Wura ke nyinga ngo ucube yihru. <sup>17</sup> Loohng gihra ne roba yihru e man: Nhyaaru rogu.

*Gihn Umaan Yaa Wiih Pinye Wun Ke Nyinge*

<sup>18</sup> “Nea yaa wiih pinye wu maan gene maano kea dhiilu ngo ke ngahyo kejea a naa ngaa akuong gene ke maano umodho. <sup>19</sup> Nea giih yug yaa wiih pinye ge nuu ke tiihyo e wu ne nhyaar gene kedea wu ne nahg yaa gen. Abea awaahn ni wu be tiihy giih tiihy yaa wiih pinye ke nying gihn nu e wu amaan gene bang gihn nahgu jo'a maa akwanya. <sup>20</sup> Paru wudhu rog luub anaa ateeda yihru: ne ngad tiihj me wiihe ne maalo rih ngaan tiihye yihre ne? A utaab yi cing gen wa kwaad ka agweede kedea wu utaab thiow yi cing gen. Nea giih apuohnya yihr gen ge ne mag gene e kare ne nudo yihr gen umag gene giih upuohnyu. <sup>21</sup> Giih nu ge utiihy gene rogu ke nying gihn nahgu yaa batiena kedea Juog, ngaa aohr an ngo kwihy gene. <sup>22</sup> Nea a be ne beehno kedea uruba keehd gen, e adhemuohm me ne naa rog gen ne tooro. Abea awaahn ge aruba keehd gen ni, gihn me kony gen tooro ke nying adhemuohme giih gen. <sup>23</sup> Ngaa amaan an, e kea ngahye ngo kejea Wura ge aohr an ngo amaane thiow. <sup>24</sup> Nea giih me teeg me gaahy nyoge ge be naa yugo kiin gen, e adhemuohme me ne naa rog gen ne tooro. Keehd maano aniid gene giih gaahy nyoge ge atiihya e Wura maa an wa poohd maan

---

\* 15:16 15:16 14:13; 15:7; 16:23-24; Mat 18:19; 1Jon 3:22; 5:14-15 Akwany: Jon 6:70; 13:18 15:17 15:17 13:34 15:18 15:18 7:7 15:20 15:20 13:16 15:21 15:21 16:3 15:22 15:22 9:41 15:23 15:23 Luk 10:16; Jon 5:23; 1Jon 2:23 15:24 15:24 5:36

gene maano. <sup>25</sup> Abea gihn ni ngo beehda bang ubeehn gihn anaa agweed yi kitaab Juog giih gen upahdhe kare. Anaa agweed naa,  
'A amaan gene ke dhieny now.'

<sup>26</sup> "Wahy Juog uohra yihru. Wahy Juog ge ngad athiir kede a ge e naa ngaan cwag wun ubeehn bangu ke yoohn bang Wura. E nuu urubo ke nyinga yihru e gihn me kane tooro. <sup>27</sup> Kede a wu thiow wu dhiil rob ke nyinga bang gihn wu anudo ke kaa athuba ke puohny."

## 16

### *Jeacuu Arubo Ke Nying Raahm Gihn Uyoade*

<sup>1</sup> "Gi ih ni ge aroba yihru bang ubange yiiho gi hr u yea be waaru keehd me yug gi ih me reje rogu. <sup>2</sup> Wu riem gene oogo yihdh wuud amaad kejea utooru kiin gen. Cahng ngo adoohng cahng ke beehno. Cahng ukoohb ngaa anahg dhaano kiinu kea e naa ngaa ayiih lum Juog. <sup>3</sup> Kwaad gi ih nu ge utiihy gene bang gi hn Wura kwiihy gene kede a kwiihy gene thiow. <sup>4</sup> Gi ih ni ge aroba yihru beere nea rog gen yug gene yugo e ngo uparu kejea wu anaa atoohna.

### *Gihn Utiihy Wahy Juoge*

"A kuu arubo yihru ke nying gi ih raahm umodho, bang gi hn a anudo ke wun. <sup>5</sup> Awaahn a caa bang Wura ge anaa aohr an. Kede a ngaa maa apeehny an kiinu tooro ke kun caa yea. <sup>6</sup> Abea ngo aniida kejea cwiihnyu arahnyo ke nying gi ih aroba yihru. <sup>7</sup> Abea a rob athiir yihru, waahdha ge aaya oogo bangu, e ne kahl gi hn me beer yihru. Bang gi hn nea a buu ucidho bang Wura e Wahy Juog ge kony wun ni be beehn bangu. Abea nea a ucidho,

---

15:26 15:26 1:15; 5:36; 14:16; 1Joon 5:6-9      15:27 15:27 1:14; Tiihy 1:8; 1Joon  
1:2; 4:14      16:2 16:2 9:22      16:3 16:3 15:21      16:4 16:4 13:19      16:5  
16:5 8:14      16:6 16:6 16:22      16:7 16:7 14:16

e ngo oohra oohro yihru. <sup>8</sup> Ge ubeehn ngaan kony wun, e ngo unyoadhe yihr yaa wiih piny kejea ge rob giih toohd. Ge rob giih toohd ke nying adhemuohm kedea ke nying beehd naa abiohgrwaal ke Juog maa ke nying cahng Lug Juog. <sup>9</sup> Ge rob giih toohd ke nying adhemuohm bang gihn luma be yihih gene. <sup>10</sup> Kedea ge rob giih toohd ke nying beehd naa abiohgrwaal ke Juog bang gihn a caa bang Wura ka me a be niidu yea. <sup>11</sup> Ge rob giih toohd ke nying cahng Lug Juog bang gihn atiihb ukeehg luue amaany Juoge kedea ukihme ngo.

<sup>12</sup> “Yihra ne giih me thoohdh me nii cwihnya me daahda ke robo yihru, abea kar rob gen yihru awaahn ngo tooro bang gihn, yihdh gen be romu ke deedo. <sup>13</sup> Abea nea cahng ubeehn Wahy Juoge, ge urob athiir ni, e nuu umeehg wun ngey athiir kiin nyepinye. Kedea buu urubo kaa teeg mare keede, unahg kwaad gihn alihnge e nuu urobe. Kedea urubo kaa nying kwaad gihn muu uyug ree wong maalo. <sup>14</sup> Wiiha amoar Wahy Juoge bang gihn kwaad gihih urobe yihru cang ge aay ke banga. <sup>15</sup> Gihih ne yihr Wura cang ge beehda gihiha. E naa gihn koohba kejea Wahy Juog ulihng gihn roba batiene e caa ne rob ngo yihru.

### *Raahy Cwihny Kedea Mihn Cwihny*

<sup>16</sup> “Nye ka me cahng kan, e a buu uniidu, abea ke batien ka me thiin e a udogu ke niido keehdo.”

<sup>17</sup> Maa abeehn yaaj mooge kiin jo waahdhe maa apeehny gene rog gen kob gene, “Gihn e rube kejea, ‘Nye ka me cahng kan e a buu uniidu’ maa kea, ‘Batien ka me thiin e a udogu ke niido.’ Maa kea, ‘Bang gihn a caa bang

Wura?” ” <sup>18</sup> Noono ubuohj gene ke piehj kob gene, “Lum yea ka me thiin beehda gihn? Gihn rube ke nying ngo yea kuu adeado ne cohg.”

<sup>19</sup> Aguo Jeacuue ke ngeyo kejea ge daahd upeehny gene ngo ke nying gihn nu, noono maa akoohbe yihr gen kea, “Wu peehny rogu ke nying yea lum gihn aroba naa akoohba kejea, ‘Nye ka me cahng kan e a buu uniidu,’ kede a, ‘Batien ka me thiin e a udogu ke niido?’ ” <sup>20</sup> Gihn maa athiir e ne roba yihru. Wu uyuog ungeer yihdhu maano e yaa wiih piny cwihny ge med. Wu uyuog, abea lanu noono e nuu ukahl med cwihny yihru. <sup>21</sup> Raahm yoad dhaage yoado yi nyoohdo bang gihn nyethiin adoohng cahng ke nyuolo. Abea nea nyethiin apahdh piny, e wihe uwulo rih raahm bang gihn cwihnye med ke nying nyethiin naa anyuole. <sup>22</sup> E ne neehn maru thiow. Awaahn beehda caang lanu. Abea a uduu uniida wun keehdo kede a kaano e cwihnyu umihn kede a ngaa me dog mihn cwihnyu ke raanyo keehdo utooro. <sup>23</sup> Wong cahng nu, gihn muu udogu ke peehnyo yihra tooro. Athiir e ne roba yihru. Wura gihn kwayu yihre ke nyinga ngo ucube yihru. <sup>24</sup> Peehyu yihr Wura beere gihn daahdu yoadu yoado kede a e naa kaa utoor gihn me daag yi med cwihny gihru.

### *Yaa Reje Ge Ataaj*

<sup>25</sup> “Keehd maa aruba yihru kaa ucaale, e nud ke cahng muu ubeehn me a buu urubo yihru ke ucaale. A urub yihru ke dhog me ne kel kel ne rob ke nying Wura. <sup>26</sup> Yi bad cahng nu wu ukwayu ke gihn daahdu yihr Wura ke nyinga bang gihn wu beehda yaa batiena. Kede a be daahd ngo unahe ke an e ne kwahyo yihre ke nyingu. <sup>27</sup> Bekihde! Wura ke ngude, wu nhyaaare nhyaaaro ke nying



gihn nhyaaru an kedea gihn ayiihu ngo kejea a aay ke bange. <sup>28</sup> A aay ke bang Wura kedea ubeehna wiih piny kan. Kedea awaahn a uaay wiih piny kedea udoga bang Wura.”

<sup>29</sup> Maa arub jo waahdhe yihre kob gene, “Awaahn yih rubo yihr wan ne wag wag kedea padh kuu ucaale. <sup>30</sup> Abea awaahn ngo aniid wane kejea nyepinye ge ngahyi cang kedea yih be daahd ngaa me peehny yihn ke gihre me nii cwihtnye. Kedea e naa gihn ayiih wane ngo kejea yih aay ke bang Juog.”

<sup>31</sup> Maa abeehr Jeacuue ngo yihr gen kobe, “Wu ayiiho arumo? <sup>32</sup> Abea cahng moogo muu ubeehn nud kedea ngo abeehno awaahn ni. Wu ugoohd oogo riha cang kedea udooonga a keeda. Kwaad dhaano ngo uci kure keede. A uwiiu piny a keeda. Abea keehd maano e a buu unaa keeda bang gihn Wura unud keehd an.

<sup>33</sup> “Giih ni ge aroba yihru beere wu ubeehdo e wu be dier bang gihn nahgu anweehd keehd an. Giih ajohr me thoohdh ge uyoadu wiih piny kan. Abea deedu cwihtnyu bang gihn tee gihr wiih piny ngo taaya taayo ke dhe yoohn thona ngahy yaadh maa ariihw.”

## 17

### *Jeacuu Akwahyo Ke Nyinge Yihr Juog*

<sup>1</sup> Batien kaa athum Jeacuue ke rob, e ngo amaahny maalo ne kway Juog kea, “Abaa Wura, cahng anaa arobi ngo abeehno arumo. Moar wiha beere wihi moara moaro. <sup>2</sup> Bang gihn yih naa acub an nyum nyoge cang ne ngaa me duohng kedea umuoja yaa akwanyi yihra ne

---

16:28 16:28 8:14 16:32 16:32 Mat 26:31, 56 16:33 16:33 7:7; 14:27;  
1Jon 5:4 17:1 17:1 2:4; 11:4; 12:16, 23, 41; 13:31-32; 14:13; 15:8; 16:14; 17:10,  
22, 24 17:2 17:2 3:35; 5:24; Mat 28:18

jo batiena keehd kuowo me guge tooro. <sup>3</sup> Gihn e naa dhe yoohn yoad kuowo me be gug: ubeehn gene unghahy gene yihn, yih ge beehda Juog acielo cog juog moogo tooro. Kede a ubeehn gene unghahy gene Jeacuu Kriihjto naa aohri. <sup>4</sup> Wihi amoara wihi piny naa athuma ke tihiy gihn anaa acubi yihra ne tihiyo. <sup>5</sup> Abea awaahn ni, yih Abaa nyoadh kaa amoari wihi me neehn ka cuunga nyumi kan. Moar wihi ke moar wihj gihn anaa yihro maano e wihi piny poohd kuu anaa acag.

*Jeacuu Ukwahyo Ke Nying Jo Waahdhe*

<sup>6</sup> “Nyingi anyoadha yih yaa ni acubi yihra wihi piny kan. Ge anahg joi maa acubi gen yihra kede a ubeehn gene uyiih gene lumi. <sup>7</sup> Awaahn, ngo ngahy gene ne cohg kejea kwaad loohnge gihi anaa acubi yihra ge beehn ke bangi. <sup>8</sup> Bang gihn luube gihi arobi yihra ge aroba yih gen kede a uyiih gene gen. Ngo angahy gene ne cohg kejea a aay ke bangi kede a ngo ayiih gene ke cwihny gen cang kejea beehda yih naa aohr an wihi piny kan.

<sup>9</sup> “A kwahyo kaa nying gen. A be kwahyo kaa nying yaa ni wihi piny cang abea a kwahyo kaa nying yaa acubi yihra ge beehda joi. <sup>10</sup> Yaa ne yihri cang ge jo'a kede a yaa ne yihra cang ge joi. Kede a moar wihj gihn ayoada ngo ayoada kaa nying gen. <sup>11</sup>\* Ge poohd ubeehdo wihi piny kan kede a buu udog beehdo keehdo wihi piny, bang gihn a nii yooh ne ci bangi. Abaa Wura yih ge beehda abiohgrwaal kony gen ke tee gihri bang udoohng gene naa acielo wa kwaad maan nahgo acielo ni. <sup>12</sup> Naa abeehda keehd gen wihi piny kan, na nahg an e ne koar gen utoor gihn me raaj me yoad gen. Ge akoara utoor gihn maa

---

17:3 17:3 1Jon 5:20    17:4 17:4 4:34    17:5 17:5 1:1-2; 8:58; 17:24    17:6  
17:6 17:26    17:10 17:10 15:8    \* 17:11 17:11-12 6:39; 13:18Naa acielo:  
10:30; 17:21-23; Gal 3:28

ayoad gen kaa dhe yoohn tee gihri naa acubi yihra. Ge akoara utoor dhaano acielo me wonge arwaahnyo kiin gen nea padh ngaan uluom an ge anaa agweed yi kitaab Juog kejea e nuu urwaahny ucea Paar Maaj.

<sup>13</sup> “Abea awaahn a ubeehno bangi. Giih me thoohdh ge aroba yihr gen e a ubeehdo ke gen wiih piny kan beere med cwihny gihn nud yihro ngo yoad gene yoado. <sup>14</sup> Giih arobi yihra ge aroba yihr gen kedea ubeehn yaa wiih pinye umaan gene gen bang gihn par gihr gen be room keehd mar yaa wiih piny kan wa ka bahnge para be room ke par yaa wiih piny. <sup>15</sup> Yih be kwaya kaa nying ukaabi gen oogo wiih piny kan abea a kwahyo yihri kaa nying ukoari gen ubahnge ge be pahdh yi boon atiihb ukeehg. <sup>16</sup> Koar gen bang gihn luub gen padh acielo keehd yaa wiih piny wa man padh luuba acielo keehd yaa wiih piny thiow. <sup>17</sup> Yug gen ne joi ke dhe yoohn athiir gihn ayoad gene bangi. Gihn robi e naa lubo maa athiir. <sup>18</sup> Ge aoohra wiih piny ne ci ne puohny Ciig Beer wa kwaad kaa anaa aoohri an wiih piny kan. <sup>19</sup> Riha acuba ne tiihj yihri beere ge thiow rog gen cub gene cubo yihri ne tiihy lumi.

*Jeacuu Kwahyo Thiow Kaa Nying Yaa Uyiuh Cang*

<sup>20</sup> “A be kwahyo yihri kaa nying gen keede cog, abea thiow a kwahyo kaa nying yaa uyiuh luma ke nying puohny gihr gen ne puohny gene Ciig Beer. <sup>21</sup> A ukwahyo yihri beere ge meehgi ke tiihj ke tiihy dhaano acielo. Abaa Wura wii gen umahd gene naa acielo tiehd wa kwaad maa anweehdo tiehd naa acielo ni. Wii umahd gene tiehd naa acielo beere yaa wiih piny kan ngo yiuh gene yiho kejea beehda yihn e naa aoohr an wiih piny kan. <sup>22</sup> Leej ayuga ke nying gen wa kwaad kaa ayugi leej ke nyinga

beere ge udoohngo naa acielo wa kwaad ma nahgo acielo ni. <sup>23</sup> Bang udoohngo naa acielo tiehd keehd gen lum yea beehda: a atiihyo yi koohm gen kedea yih utiihyo yi kuohma beere ge umahdo ne cohg naa acielo. Ke nying beere yaa wiih piny ngo ngey gene ngeyo kejea beehda yih naa aohr an kedea ge anhyaari wa kwaad maa anhyaari an ni.

<sup>24</sup> “Abaa Wura! A daahd yaan ni acubi yihra ubeehn gene banga ka nahga yea. Ke nying uniid gene leej gihra ge acubi yihra bang gihn a ngaa maa anhyaari kuu umodho maano e wiih piny poohd kuu acag. <sup>25</sup> Abaa Wura! Yih ngaa maa abiohgrwaal. Yaa wiih piny yih kuu angey gene abea yih beehde yih ngahya ke coon kedea yaan ni ngo abeehn ge ne ngeyo kejea beehda yih naa aohr an wiih piny kan. <sup>26</sup> Anyoadha yih gen kejea yih beehda ngaa kedea nhyaahro gihn anhyaari an dhiil ngo ke cubo yih gen thiow beere a udoohng naa anweehd keehd gen.”

## 18

<sup>1</sup> Ge anaa athum Jeacuu ke kwaj wa gihn nu, e Jeacuu kedea jo waahdhe ge ake aay tiehd kedea ungol gene Oong Kihdron. Piny nu yea anaa puohdho gihr ulihbe. Noono maa abeehn Jeacuu umone yi puohdho keehd jo waahdhe.

<sup>2</sup> Juudo ngaan uluom Jeacuu kaano amon ge Jeacuu yi ngo angahye ke coon bang gihn Jeacuu na kwaay roohmo kaa ngo keehd jo waahdhe. <sup>3</sup> Jo doong yaa lam kedea Paarijea acaakere acub gene yih Juudo me caahdh keehde. Noono maa abeehn gene kaa ane Jeacuu yea e ge kaahn redhe muu uliel kedea toong maa belunge.

---

17:24 17:24 12:26; 17:5 17:25 17:25 1:9-10; 8:55; Mat 11:25-27 17:26  
 17:26 17:6 18:1 18:1 Mat 26:36 18:2 18:2 12:4; Luk 21:37; 22:39 18:3  
 18:3 7:32, 45

<sup>4</sup> Ngo beehd e angahy Jeacuue e gihn ubeehn ne yug ree. Noono maa acuunge nyum gen ce peehye kea, “Wu daahd ngaa?”

<sup>5</sup> Maa abeehr gene ngo kob gene, “Jeacuu ngad Naajaread.”

Maa arube yihr gen kea, “A naa Jeacuu.”

Juudo ngaa aluohmo ake cuungo tiehd keehd gen.

<sup>6</sup> Abea ge arub Jeacuue yihr gen kea, “A naa Jeacuu ni,” e ge anaa angaahj dhe caahn upahdh gene piny ne rub.

<sup>7</sup> Maa apeehy Jeacuue keehdo kea, “Ngaa e ne daahdu?”

Maa akoohb gene kejea, “Wa daahd Jeacuu ngad Naajaread.”

<sup>8</sup> Maa abeehr Jeacuue ngo kea, “Aroba yihru kejea a naa Jeacuu. Nea a ne daahdu kea meehgu yaa ni aay.” <sup>9</sup> Gihn nu ngo arobe bang beere giih anaa arobe umodho dhiil pahdh kar gen. “Abaa Wura gahng ke dhaano acielo maa arwaahnyo kiin yaa anaa acubi yihra.”

<sup>10</sup> Maa abeehn Cimoan Piihtere uyuohdhe pala oogo kede a ungole yihdh ubaahng ngaa duohng yaa lam oogo.

<sup>11</sup> Maa acuow Jeacuue Piihter kea, “Duog pala gihri kare kaa anea yea. Cuohni kii a utudo yi raahm kuohm gihn agwiir Wura ke nyinga ne?”

### *Jeacuu Ne Nyum Anaj*

<sup>12</sup> Batiene e acaakere kede a ngaa duohng gen kede a apahn yaa Judea, Jeacuu amag gene maa utuohj gene ngo

<sup>13</sup> kede a ukedh gene ngo nyum Anaj ngaa anahg ngaa duohng yaa lam umodho, ge beehda wur ciuh Kaaypaj. Kaaypaj e naa anahg ngaa duohng yaa lam yi wong nu. <sup>14</sup>

Anahg Kaaypaj e naa anaa cohng ngo yi cwihny yaa Judea kejea ngo beer ubeehn dhaano acielo uthowe ke nying

nyoge cang yihr man beehn nyoge cang uthow gene ke nying dhaano acielo.

*Piihter Apeehmo Kea Jeacuu Kwihye*

*(Mat 26:69, 70; Mak 14:66-68; Luk 22:55-57)*

<sup>15</sup> Kaano Cimoane maa dhaano acielo kiin jo waahdh Jeacuu ge anaa apahdh ne buodh batien yaa ni kool Jeacuu. Ngaan ake caahdho keehd Piihter ngo amon yi roog gihr ngaa duohng yaa lam bang gihn ngo anahg ngaa me ngahj. <sup>16</sup> Abea Piihter anaa adoohng oogo dhe roog. Maa abeehn ngad waahdh Jeacuue gihn ni uduue oogo kede a urube keehd ngaa koar dhe roog kede a maa akahle Piihter yi diehr roog.

<sup>17</sup> Maa arub nyaakowe yihr Piihter kea, “Ngahda yih beehda ngad batien nyin cuohn ne Jeacuu ne?” Maa abeehr Piihtere ngo kea, “A padh ngad batien Jeacuu.”

<sup>18</sup> Gihn nu e koohyo anudo maa abeehn kadaahme maa apahne upiih gene buud maaj ne oohyo. Maa amad Piihtere ree bang gen ne oohyo thiw.

*Jeacuu Apeehny Ruohdh Yaa Lame*

*(Mat 26:59-66; Mak 14:55-64; Luk 22:66-71)*

<sup>19</sup> Maa apeehny ruohdh yaa lame Jeacuu kobe, “Jo waahdhi ge beehda jo kee? Kede a gihn e ne puohnyi?”

<sup>20</sup> E abeehr Jeacuue yihre kejea, “Wa a na upuohnyo ke cahng cahngo kiin nyoge yi wod amaad kede a yi laaro gihr Wod Juog kuohn na kwaay yaa Judea ke roohmo yea. A na upuohnyo yihdh kuohn me neehn ne dahr e gihn me kana tooro. <sup>21</sup> Gihn e peehnyi an? Peehnyi ke yaa alihng puohnya. Giih aroba ge dhiil gene kaa ngahyo.”

<sup>22</sup> Naa arob Jeacuue giikh ni, e dhaano acielo kiin yaa koar giikh yaa lam athubo ke dhoohng Jeacuu kobe, “Ngaa e naa arobe yihri kejea rubi yihri ngad duohng yaa lam neehn maano?”

<sup>23</sup> Maa abeehr Jeacuue ngo yihre kea, “Nea a rob giikh me raaj e kea rob ngo yihri yaa ni kan e giikh raaj naa aroba, abea ne beehda giikh maa adiehr e ne roba, e giikh ge oohri dhaano acielo kiin yaa koar riha udhoohng e an ni?” <sup>24</sup> Noono e Jeacuu abeehn Anaje ne oohri nyum Kaaypaj e ngo poohd e atuohj.

*Piihter Acahg Peehm Keehdo Kea Jeacuu Kwihye*

*(Mat 26:71-75; Mak 14:69-72; Luk 22:58-62)*

<sup>25</sup> Abea kaano e Piihter anaa apoohd e ngo uoohyo buud maaj maa apeeध्ये, “Ngahda yih beehda ngad batiene ngaan ni cuohn ne Jeacuu ne?”

Maa acahg Piihtere kweer kea, “Bekihde! A padh ngad batiene.”

<sup>26</sup> E dhaano acielo kiin kadaahme giikh ngad duohng yaa lam ngo anudo kaano. Ngo anahg waahde keehd ngaan yihdhe anaa angol Piihtere oogo ke pala. Noono maa anyoadhe wong Piihter kobe, “Yih anaa aniida yi puohdho giikh ulihbe keehd Jeacuu tiehd.” <sup>27</sup> Maa acahg Piihtere ngo ke jaahyo kea, “Bekihde!” Kede a ke wong kaano e uthuonjieno ake thubo ke koohg.

*Jeacuu Akedh Nyum Pilaato Yi Lug*

*(Mat 27:1, 2, 11-14; Mak 15:1-5; Luk 23:1-6)*

<sup>28</sup> Batiene e Jeacuu abeehn Judea ne kaabo oogo nyum Kaaypaj kede a ukedh gene ngo paar muudiihr giikh Roama ge nyinge Pilaato. Ngo anahg kaa akaahg piny, noono e ge akweer ke mono yi wod Lug beere Juog ge be niide

ne nyoge me reje utoor ka me cam gene cam gihr Yaan Amono. <sup>29</sup> Noono e Pilaato abeehn oogo bang gen kede a upeehnye gen kobe, “Gihn noono raaj ge ayug ngaan ni?”

<sup>30</sup> Maa abeehr gene ngo kob gene, “Nea gihn me raaj me nea yugo ne tooro e ngo ne kahl wane nyumi ne?”

<sup>31</sup> Maa arub Pilaate kea, “Kaabu ngo ucidhu ne maany luwe ke dhe yoohn loohnge giihu.”

Maa akweer yaa Judea kob gene, “Yihdh luue giih wan yihr wan tooro tee me kihm wane dhaano ke thoo.” <sup>32</sup> Gihn nu arob gene beere luub arob Jeacuue ke nying dhe yoohn ka uthowe ge pahdh kar gen.

<sup>33</sup> Maa abeehn Pilaate udoe wod kede a urube yihr acaakere kejea kahl Jeacuu yihre. Naa akahl Jeacuu e ngo apeehnye kea, “Yih naa ruohdh gihr yaa Judea?”

<sup>34</sup> Kob Jeacuue kea, “Beehda lubo me aay ke bangi wale beehda ngaa moogo e naa awaahny yihn?”

<sup>35</sup> Maa abeehr Pilaate ngo kea, “Wihi apari kejea a beehda Ujudea ne? Wa beehda yaa paaru kede a ruohdhe giihu ge naa akahl yihn nyuma. Gihn e naa atiihyi ne cohg?”

<sup>36</sup> Maa akoohbe kea, “A padh ruohdh wiih piny kan, bang gihn nea ruohdha ne nahg ruohdh wiih piny kan e yaa dhaahra ge ne kag ubahnge a be mag Judea.”

<sup>37</sup> Noono e acahg Pilaate ke peehnyo kobe, “Yih ka beehda ruohdh boh?” Maa akoohb Jeacuue kea, “Lumi adiehr naa akoohbi kejea a beehda ruohdh kede a e naa ke nying gihn anyuol an wiih piny kan. Kede a ne rob athiir yihr nyoge. Kwaad ngaa nhyaar gihn maa athiir, gihn roba pahdh yi cwihnye.”



<sup>38</sup> Maa akoohb Pilaate kea, “Gihn maa adiehr beehda gihn me ngihde?”

*Jeacuu Akihm Ke Thoo*

(*Mat 27:15-31; Mak 15:6-20; Luk 23:13-25*)

Noono e Pilaato ado oogo bang yaa Judea urube yihr gen kea, “Ngaan gihn maa ayoada ree tooro me meehg ngo kihmo ke thoo. <sup>39</sup> Abea beehda gihn me nud ke nying run yi Yaan Amono, e dhaano acielo na luny oogo yi karkoohn yihru. Awaahn ni lonya ruohdh gihr yaa Judea oogo yihru ne?”

<sup>40</sup> Kaano e ge athubo ke rob e ge ukwaago kob gene, “Padh ngaan nu! Wa daahd ulonyi Barabaj.” (Barabaj ngo anahg ngad kahw).

## 19

*Pilaato Jeacuu Acube Ne Naah*

<sup>1</sup> Batiene e Pilaato acaakere ge alonye ne puohd Jeacuu.

<sup>2</sup> Maa abeehn acaakere uriw gene koadhe wa thaaj ucub gene ngo wiihe naa atahny ruohdh. Thiow ngo angaab gene wa ruohdh ke waaro me wa ukwaaro kedeo ngo ne mihl mihl ne ngier kuohme. <sup>3</sup> Noono ucidh gene ke ne cuung nyume e ge urubo kob gene, “Maahdh ya Ruohdh yaa Judea!” Kedeo e ngo dhohng gene dhohngo.

<sup>4</sup> Maa abeehn Pilaate oogo keehdo urube yihr Judea kea, “E ge akahla oogo yihru beere ngo ngahyu ngahyo kejea awuohj maa ayoada ree tooro me kihme ke nyinge.”

<sup>5</sup> Naa akahl Jeacuu oogo e atahny koadho nii wiihe kedeo waaro angaab ree e Pilaate arubo yihr gen kea, “Ngaan ngo e man. Ngo akahla oogo yihru.”

<sup>6</sup> Ge anaa aniid jo doong yaa lame kedea apahne giijh gen Jeacuu, e ge amaahr piny ke kwaago kob gene, “Gure rih yaadh, gure rih yaadh.”

Maa abeehr Pilaate ngo yihr gen kobe, “Noono kaabu ngo uguru ngo maalo rih yaadh. Nea ke kur mara e awuohj maa ayuge tooro me kihme ke thoo.”

<sup>7</sup> Maa ateel yaa Judea yi lubo teeg mee kob gene, “Yihr wan ne loohng kedea ke nying loohng nu e ngo dhiil kaa gur rih yaadh bang giijh kea e Waahd Juog.”

<sup>8</sup> Abea ge anaa alihng Pilaate giijh arob gene, e atud keraahyo ke ka ukihme Jeacuu. <sup>9</sup> Noono ucahge do wod keehdo maa arube yihr Jeacuu kea, “Yih beehda nyethiin paan aweehne?”

Abea Jeacuu giijh maa abeehre tooro. <sup>10</sup> Maa akoohb Pilaate kea, “Yih be daahd urubi yihra ne? Kwihyi e yihra ne tee me lonya yihn oogo kedea me roma yihn ke cubo yihr acaakere uci gene ne gur yihn rih yaadh ne?”

<sup>11</sup> Maa abeehr Jeacuu ngo kea, “Tee mar ngudi tooro nea padh Juog e ne cub ngo yihri. Abea awuohj me duohng me wiihe ne maalo naa rog yaa akahl an nyumi ne kihmo.”

<sup>12</sup> Abea ke nying giijh nu, e Pilaato ake thubo ke daahd dhe yooh me lonye Jeacuu abea yaa Judea ge athubo ke kwaago kob gene, “Nea ngo lonyi lonyo e yih padh gom keehd Jaah Roama. Kwaad ngaa koohbo kea e beehda jaah e ngo apaahr oogo rih Jaah giijh nud Roama.”

<sup>13</sup> Ge alihng Pilaate luube giijh ni, e Jeacuu akahle oogo ke yoohn wod. Noono maa acidh Pilaate ne piijh wiijh koom Ruohdh giijh lug giijh e cuohn ne Gabadha. <sup>14</sup> Ngo anahg ke nyango cahng gwiihro giijh Yaan Amono.

---

19:6 19:6 18:31    19:7 19:7 Mat 26:63-65; Jon 1:34; 5:18    19:9 19:9 Mat 26:62-63; 27:12, 14    19:11 19:11 10:18    19:12 19:12 18:37; Luk 23:2; Tiijh 17:7

Kaano e Pilaato arubo yihr yaa Judea kea, “Ruohdh gihru e man!”

<sup>15</sup> E ge athubo ke kwaago kob gene, “Nahg ngo, nahg ngo, gure rih yaadh.”

Maa apeechny Pilaate gen keehdo kobe, “Wu daahd ruohdh gihru ke gur rih yaadh ne?”

Maa abeehr ngad duohng yaa lame ngo kobe, “Yihr wan ne ruohdh acielo cog ge beehda Jaah Roama.”

<sup>16</sup> Maa abeehn Pilaate ucube ngo yihr acaakere giikh Roama bang uci gene ngo ne gur rih yaadh.

*Jeacuu Agur Rih Yaadh Maa Ariihw*

*(Mat 27:32-44; Mak 15:21-32; Luk 23:26-43)*

Batiene e acaakere Jeacuu akool gene ke oogo, <sup>17</sup> yi diehr yi geew maano e bien yaadh gihre ge ucea ne gur rih ngo. Kede a ubeehne ne wahn ka me cuohn ne Golgotha\*

<sup>18</sup> Maa agur gene ngo rih yaadh kede a ugur gene nyoge ariow buude kun ke kun kede a Jeacuu nii diehr kiin gen.

<sup>19</sup> Batiene e Pilaato arubo kea, “Gweed luube me noog kede a ugur gen te wiikh Jeacuu.” Maa agweed luube giikh, “RUOHDH YAA JUDEA”. <sup>20</sup> Gihn ni agweed ngo akwaan yaa Judea me thoohdh ke nying gihn kaa anaa agur Jeacuu yea kuu abaahro ke geew. Gihn anaa agweed, agweed ke dhoy adahg. Agweed ke dhog Judea kede a dhe Laatiihn maa dhe Griihg. <sup>21</sup> Jo doong yaa lam gihn nu amaan gene maa aweehr gene ngo yihr Pilaato kob gene, “Ngo keá gweedi ne ‘Ruohdh yaa Judea’ abea gweed ngo kii, Ateede kea e beehda Ruohdh yaa Judea.”

<sup>22</sup> Maa abeehr Pilaate ngo yihr gen kea, “Gihn agweeda be dog ke waaro.”

<sup>23</sup> Batiene kaa athum acaakere ke gur Jeacuu rih yaadh e ge apiih ne paahng waare giixe ne akuude angween,

\* 19:17 19:17 Golgotha ke dhog Judea lum yea paan wihj.

acielo yihr goan akuud acaakere acielo kede a ukaab gene waahnye acielo maa aloaj.

<sup>24</sup> Maa arub gene ke rog gen kob gene, “Ngo keá yiejo. Gooye ke thalo umaanyo ngaa upahdhe yihre.” Gihn ni ree ayuge bang ubeehn gihn anaa agweed yi kitaab Juog uyuge ree wa kaa agweede,

“Waaya apaahng gene ke kiin gen

kede a ugooj gene waahnya oogo ke thalo.”

<sup>25</sup> Miih Jeacuu kede a mahy kede a Maarya ciih Klewpaj kede a Maarya Madaleana ge anaa anudo thar yaadh gihn agur Jeacuu rih ngo. <sup>26</sup> Naa aniid Jeacuu e men kede a ngaan nhyaare kiin jo waahdhe e ge acuungo, e Jeacuu arubo yihr men kea, “Gihn ni e naa waahdi.” <sup>27</sup> Kede a ucahge rob yihr ngaan anhyaare kea, “Gihn e naa miihu.” Ke bad cahng nu e miih Jeacuu abeehn ngaan nu ke ne daag paare ne beehdo yea.

<sup>28</sup> Batiene e ngo abeehn Jeacuu e ne ngeyo kejea giih anaa arob ke nyinge ge atiihy rog gen cang beere giih agweed yi kitaab Juog ge pahdh kar gen ne rihb e ngo arubo kea, “A anahg riowe.” <sup>29</sup> E koongo me waj anaa anudu. Maa abihle ke bur waaro maa atuohje wiih boohl kede a ucube dhe e cwiiyo. <sup>30</sup> Naa acwiiye piih koongo e arubo kea, “Tiihya athum keehdo.” Kaano e naa kaa anahg ngude nag kede a e naa thone noono.

### *Jeacuu Acob Ke Tong*

<sup>31</sup> Yaa Judea Pilaato apeechny gene kejea meehg gen toy tien jo agur rih yaadh kede a ukahl koohm gen piny rog yen. Ge adaahd utiihy giih nu bang gihn ngo anahg cahng gwiihro gihr Yaan Amono kede a ge be daahd uriih koohm jo ni rog yen uwahdhe cahng Cabadh, ke nying gihn ngo beehda cahng Cabadh me ke wuoro. <sup>32</sup> Batiene e acaakere

ge aci ne toy tien jo ni anaa agur rog yen ni. Ge athubo ke toy tien ngad umodho ge anaa buud Jeacuu kedea ucahg gene tien ngaa man ke toy thiow. <sup>33</sup> Abea ge abeehn gene bang Jeacuu ni, e ge niid ngo e thow, maa abahnge tiene kuu atoy gene. <sup>34</sup> Maa abeehn wa acaakere acielo ucobe Jeacuu te bad ngo ke tong, kaano e remo kedea piih ge athubo ke woj oogo yi kuohme. <sup>35</sup> Kedea ngaa aniid giij ni cahng ayug gene rog gen e naa cuud. Kedea gihn aniide ngo arobe beere ngo yiihu yiho thiow. <sup>36</sup> Gihn ni ree ayuge beere giij anaa agweed yi kitaab Juog dhiil pahdh kar gen wa kaa ngo,  
 “Bekihd coohnge acielo maa atoar.”

<sup>37</sup> Kedea nud ke moogo maa agweed thiow naa,  
 “Ngaan acob gene bang ngo umaany gene maanyo.”

*Jeacuu Kuohme Akan*

(*Mat 27:57-61; Mak 15:42-47; Luk 23:50-56*)

<sup>38</sup> Abea ke batien giij nu cang e ngaa me nyinge Jocebe ge ngad geen Arihmathea, abeehno upeehnye Pilaato kejea, “Kare nud uroma kuohm Jeacuu ke kano ne?” Jocebe anahg ngad batien Jeacuu me ree keá robo oogo bang gihn ngo na utudo yihr yaa Judea. Naa acub Pilaate kuohm Jeacuu yihre e ngo akaabe. <sup>39</sup> Ge anaa ake caahdho tiehd ke Nikoadiijmuj. Nikoadiijmuj ge naa akuong weehn bang Jeacuu yi diehr waahr. Nikoadiijmuj akaahn mow me ngwaahy maa alyaahb ke gihn me cuohn ne mihr kedea ke mow moogo me cuohn ne aloay. Ge beehda mahdhe me yor kuohm ngaan athow ke gen. Mow anahg kar kiihe jiehadahg wonge apaar wonge abiihj. <sup>40</sup> Maa akaab gene kuohm Jeacuu kedea ubahj gene ngo ke waaro kedea uyor gene ngo keehd mahdhe me ngwaahy

wa ka yug yaa Judea ngaa maa athow. <sup>41</sup> Kaa agur Jeacuu rih yaadh yea anaa buud puohdho kedea loohro† me beehda liel me dhaano kuu akuong ke koanyo yea anudo buud puohdho. <sup>42</sup> Bang gihn ngo anahg cahng gwiihro gihr Judea ge beehn cahng Cabadhe ke batiene ni kedea ke nying gihn nud loohro me cahng mee ke kaano, e kuohm Jeacuu akan gene kano.

## 20

### *Liel Yea Apuogo*

*(Mat 28:1-8; Mak 16:1-8; Luk 24:1-12)*

<sup>1</sup> Ke nyango coon ke batiene cahng Cabadh, maano e piny poohd kuu aruu, e Maarya Madaleana abeehn ne ci ne maany loohro. Naa abeehne kar loohro e yuud leelo gihn anaa aciehg dhe loohro keehde, e ngo aloor oogo.

<sup>2</sup> Maa a'aaye ke ngweej ne beehn bang Cimoan Piihter kedea ngaan nhyaar Jeacuu kiin jo waahdhe. Maa arube yih gen kea, "Kuohm ruohdh akaab gene kedea kaa adaag gene ngo yea kwihya."

<sup>3</sup> Kaano e Piihter kedea ngad waahdh Jeacuu ge na nhyare ge athubo ke goohd kar loohro. <sup>4</sup> Ge agoohdo tiehd ke kar ge ariow abea Piihter anaa ayoohme unahge ngaan anhyaar Jeacuu e naa akuong wahdho kar loohro.

<sup>5</sup> Maa agonge piny ulwaahnge wonge maa aniide waanhy thoo yi loohro abea kuu amon yi loohro. <sup>6</sup> E Piihter ge naa batiene ni ake beehno kedea ubare kii wod loohro maa aniide waay thoo giih anaa akan kuohm Jeacuu keehd gen. <sup>7</sup> Thiw maa aniide waaro gihn anaa ariiw wiihe keehde e ngo adol ucube kar keede yi loohro buud waay thoo. <sup>8</sup> Batiene e ngad waahdh Jeacuu gihn anaa akuong wahnho wiih loohro umodho ni abeehn ne mono thiw yi

---

† 19:41 19:41 Loohro me beehda liel. 20:2 20:2 13:23 20:6 20:6-7 11:44

wod loohro maa aniide waay thoo giih akan kuohm Jeacuu keehd gen e ge ne piny kedea uyiihe ngo kejea Jeacuu acahr. <sup>9</sup> Abea poohd e gihn anaa agweede yi kitaab Juog ngo kuu adead gene, ge agweede naa, “Ngo udhiil cahro ke batién thoo.”

<sup>10</sup> Noono e jo waahdhe giih ni ariow ge adog ka beed gene.

*Jeacuu Ree Anyoadhe Yih Maarya Madaleana*

*(Mat 28:9, 10; Mak 16:9-11)*

<sup>11</sup> Abea Maarya anaa adoohng buud loohro e ngo uyuog. Batiene naa amaahnye yi wod loohro, <sup>12</sup> e niid wuohdjuog ariow maa angaab waare me tar ne yim e ge apiih kaa anaa apiehl kuohm Jeacuu yea. Wuohnjuog acielo ne te wiihe kedea moogo ne kur tiene.

<sup>13</sup> Maa apeehy gene kob gene, “Yih dhaar ni, gihn e ne yuogi?”

Maa arube yih gen kobe, “Kuohm ruohdha atihng gene oogo yi loohro kedea kwihya kaa adaag gene ngo yea.”

<sup>14</sup> Naa alihnge gihn arob Wuohnjuoge e ngo amaahny ngahye maa aniide Jeacuu acuungo abea ngo keá ngeyo.

<sup>15</sup> E apeehny Jeacuu peehnyo kobe, “Yih yuog gihn? Kedea beehda ngaa e ne daahdi?”

Mar Maarya cuohne kea beehda ngad ajeniino e ne peehny en, gihn nu e akob Maarya kea, “Nea yih naa atihng kuohme ne daa ka moogo kea nyoadh kaa ngo yihra beere a caa ne kaab ngo.”

<sup>16</sup> Maa acuohn Jeacuue ngo ke nyinge kea, “Maarya.” Maa aloge wonge bang ngo maa amaahre piny ke rob ke dhog yaa Judea kea, “Raboani.” (Lum yea ngad puohny).

<sup>17</sup> \* Maa akoohb Jeacuue yihre kea, “Yih keá baahb riha bang gihn a poohd kuu awahdh bang Wura. Abea aayi ucidhi bang jo paar wura ne teed ngo yih gen kejea a caa bang Wura ge beehda Wuru kedeá bang Juog gihra ge beehda Juog gihru thiw.”

<sup>18</sup> Noono ubeehn Maarya Madaleana ucea ke bang jo waahdh maa arobe ngo yih gen kea, “Ruohdh aniida.” Kedeá gihn arob Jeacuue ngo arobe thiw yih gen.

*Jeacuu Ree Anyoadhe Yih Jo Waahdhe*

(*Mat 28:16-20; Mak 16:14-18; Luk 24:36-49*)

<sup>19</sup> Yi bad cahng nu ke thiehno, e jo waahdh Jeacuu ge anaa amahdo yi wod kedeá dhog wuude ge anaa atoag cang bang gihn ge abeehdo e ge atud yih yaa Judea. Noono ubeehn Jeacuu ucuunge kiin gen kobe, “Maahdhu rogu ya.” <sup>20</sup> Batién naa amaahdhe jo waahdhe, e athubo ke nyoadh cinge naa agur kedeá koohre naa acob ke tong yih gen. Gihn nu e cwihny gen amihno keter naa aniid gene ruohdh gen.

<sup>21</sup> Maa acahg Jeacuue rob yih gen keehdo kea, “Beehdu ke yoohm rogu. Wa kwaad kaa anaa aohr Wura an e a thiw wu oohra oohro.” <sup>22</sup> Ge arobe giin nu, e athubo kaa koadh Wahy Juog yi wudh gen kobe, “Beehn Wahy Juoge wudhu. <sup>23</sup> Nea adhemuohme giin dhaano ge awiüü piny e ge wiia ke piny thiw. Tooro, ne ge kuu awiüü piny e ge be wiia piny thiw.”

*Jeacuu Ree Anyoadhe Yih Thoamaj*

<sup>24</sup> † Ngad waahdh Jeacuu acielo me nyinge Thoamaj ge beehda goan kuoy anaa atooro cahng anaa

---

\* 20:17 20:17 Jo paar wura: Rom 8:29; Judea 2:11-12 20:19 20:19 9:22; 14:27; 20:1 20:20 20:20 19:34; 20:25, 27 20:21 20:21 17:18 20:22 20:22 14:16 20:23 20:23 Mat 18:18 † 20:24 20:24 Thoamaj: 11:16; 14:5; 20:27; 21:2



anyoadh Jeacuue ree yihr jo waahdhe. <sup>25</sup> Noono naa arob jo waahdhe ngo yihre kejea Jeacuu aniid gene e ngo apeehmo ukuohnge ree kea, “Nea padh cinge ge anaa agur kedea koohre ge acob ge ne niida kedea ucuba cinga yihdh kuohn ledh, e ngo be kuonga ke yiiho naa adiehr.”

<sup>26</sup> Batién nihn abiihj beriow, e jo waahdh Jeacuu ge anaa amahdo cang ka maa acielo kedea Thoamaj anaa anudo tiehd ke gen kedea dhog wuude ge anaa atoag. Kaano e Jeacuu abeehn ne cuungo kiin gen kobe, “Beehdu ke yoohm rogu.” <sup>27</sup> Maa arube yihr Thoamaj kea, “Kahl cingi ucubi ngo kuohn anaa agur yi cinga kedea dog cingi ke cub yi koohra kaa anaa acob. Wii piem gihn maa adiehr.”

<sup>28</sup> Maa abeehr Thoamaje ngo yihre kea, “Yih naa ruohdha kedea yih naa Juog wuora.”

<sup>29</sup> Kob Jeacuue kea, “Adiehr muon! Yih ayiiho ke nying gihn aniidi an: Mihn cwiwny yihr yaa ayiiho e gihn maa aniid gene tooro.”

### *Gihn Agweed Kitaab Gihn Ke Nyinge*

<sup>30</sup> Jeacuu naa acahre e giin mooge me gaahy nyoge me thoohdh ge ayuge nyum jo waahdhe, abea ge kuu agweed yi kitaab gihn. <sup>31</sup> Abea muu ge agweed piny beere yiihu yiiho kejea Jeacuu e naa Ngad Boadh nyoge kedea e naa Waahd Juog kedea ge agweed thiw beere boadh wahy yoadu yoado ke nyinge.

## 21

### *Jeacuu Gihn Me Gaahy Nyoge Ayuge Yihr Jo Waahdhe Kar Maay*

<sup>1</sup> Ke batiene nihn mooge e Jeacuu ree acahge ke nyoadhho yihr jo waahdhe dieng naam duohng gihr Tiberya. Ree anaa anyoadhe ke wa gihn: <sup>2</sup> Jo waahdhe giijh anaa anudo anahg: Cimoane Piihter, Thoamaj goan kuoy, Nathaneel ngad Kana ge nii piny Gaalili kedea waahd Jebeade maa jo waahdh ariow mooge. <sup>3</sup> Kaano e Cimoane Piihter ake rubo kea, “A caa ne maay.” Maa akoohb gene, “Wa ucidho tiehd ke yihn ne maay.” Noono maa atihng gene rog gen uyedh gene yi baabuur ne maay. Ge abuhj ke waahr ke maay duug abea reehyo maa amag gene tooro.

<sup>4</sup> Abee ge athub cahnge ke moohlo ni, e Jeacuu ake cuungo dieng naam wiijh agala, abea ngo kuu angey jo waahdhe kejea beehda e naa acuungo wiijh agala.

<sup>5</sup> Maa arube yihr gen kea, “Goma maa anhyaara! Ne rej maa amagu ne?”

Maa abeehr gene ngo kob gene, “Kihd wong acielo maa amag wane tooro.”

<sup>6</sup> Maa akoohbe kea, “Kea thoohru booy gihru ukwiijh baabuur, nea wu buu umaah ke rej.” Noono ge anaa athoohr gene booy, e ngo kuu arom gene ke teehl yi baabuur bang gihn booy ane kahn kahn ke rej.

<sup>7</sup> E ngaan nhyaar Jeacuae kiin jo waahdhe ake rubo yihr Piihter kea, “Wa ruohdho e gihn ca!” Ge anaa alihng Piihtere ngo kejea beehda ruohdh gen e ne rubo, e waaro gihre e anaa akahle oogo, angaabe ke ree. Noono upaahre yea naam duohng. <sup>8</sup> Jo waahdh giijh anaa adoohng yi baabuur, ge alahbo ke batiene e ge kiiw baabuur kedea ge ywaay booy wiijh agala. Agala anahg kar akaahdhe jiehabiihj ke kaa anahg baabuure yea. <sup>9</sup> Naa awahn gene wiijh agala e ge yuud rej wiijh cug kedea amune ge anudo thiw.

---

21:3 21:3 Luk 5:5      21:4 21:4 20:14; Luk 24:16      21:6 21:6 Luk 5:5-7  
21:7 21:7 13:23; Mat 14:29

<sup>10</sup> Maa arub Jeacuue yihr gen kea, “Kahlu rej giih amagu awaahn kan.”

<sup>11</sup> Maa abeehn Cimoane Piihter uyedhe yi baabuur ne kony yaa nii baabuur ke teel booy. Booy yea anaa apahng ke rej. Maa akwaan gen unahg gene jiehabiihj wonge jiehariow wonge apaar wonge adahg. Keehd maano amahg booye keehd rej me thoohdh mee nu, e kihd wong booy acielo maa acoohd tooro. <sup>12</sup> Maa arub Jeacuue yihr gen kobe, “Beehnu ne cam.” Ngaa maa arom piehj kiin jo waahdh kejea, “Yih naa ngaa?” tooro bang gihn ngo angey gene e beehda ruohdh gen. <sup>13</sup> Noono e Jeacuu ake beehno ukaabe amono kedea ucube ngo yihr gen kedea ucahge reehyo ke kaabo ucube ngo yihr gen thiw. <sup>14</sup> Gihn ni anahg yi dahg gen ge anyoadhe ree yihr jo waahdhe batien cahre yi thoo.

*Jeacuu Piihter Ayuge Ne Ngad Kwaah*

<sup>15</sup> \* Batien naa athum gene ke cam, e Jeacuu Piihter apeehnye peehnyo kobe, “Cimoane waahd Joon! A anhyaari ne cohg ukaale kaa nhyaar yaa ni an ne?”

Maa abeehr Piihtere ngo kobe, “Ayiihi Ruohdh! Keehd yihn e ngo ngahyi kejea yih anhyaara.”

Maa akoohb Jeacuue kea, “Kwaag roohme giiha noono.”

<sup>16</sup> Maa acahge piehj kea, “Cimoane waahd Joon, a anhyaari ne cohg ukaale wiih kaa anhyaar yaa ni an ne?”

E ngo acahg Piihtere ke beehro kea, “Ayiihi ruohdh! Keehd yihn e ngo ngahyi kejea yih anhyaara.” Maa akoohb Jeacuue kea, “Kwaag roohme giiha noono.”

<sup>17</sup> Maa acahge piehj kea, “Cimoane waahd Joon, a anhyaari ne cohg ukaale wiih kaa anhyaar yaa ni an ne?”

---

21:11 21:11 Luk 5:6      21:13 21:13 6:11; Mat 14:19; 15:36      21:14 21:14  
20:19, 26      \*      21:15 21:15-17 Roohme giiha: 10:14-16; Tiijh 20:28; 1Pii 5:2

E Piihter cwihtnye arahnyo ke nying gihn apeehtnye tiel adahg ke piehj acielo, e ber, “A anhyaari ne cohg ukaale wiih kaa anhyaar yaa ni an ne?” E arobe yihr ngo kea, “Ruohdh! Yih ne ngahy giuh nyepinye cang. Kedeo ngo ngahyi kejea yih nhyaara nhyaaro.”

Maa akoohb Jeacuue kea, “Kwaag roohme giuha noono. <sup>18</sup> Athiir e ne roba yihri, ge anaa apoothde e yih beehda rihj ni kwaad gihri ne pari e ne na tihiyi cog. Yih unghabo kedeo uci kwaad ka daahdi. Abee ge doongi, e baahdi ge utihngi maalo kedeo nyoge yih utuohj gene ukedh gene yihn ka me cwihtnyi toor cidh yea.” <sup>19</sup> Gihn ni ngo rob Jeacuue bang ne nyoadh kwaad thoo gihn ubeehn Piihtere umoare wiih Juog keehde. Noono urube kea, “Buodh batiena.”

### *Jeacuu Maa Ngad Waahde Ge Anhyaare*

<sup>20</sup> Ge alog Piihtere wonge ni e niid ngaan nhyaar Jeacuue kiin jo waahdhe e buodh batien gen. (Ngo beehda nyin anaa anyiig buud Jeacuu cahng acam gene amono Yaan Amono, upeehtye kea, “Ruohdh ngaa e nuu uluom yihn?”) <sup>21</sup> Ge anaa aniid Piihtere ngo, e Jeacuu apeehtnye kea, “Ruohdh ngaan ni mare unahg gihn?”

<sup>22</sup> Maa abeehr Jeacuue ngo yihre kea, “Nea a daahd ngo ubeehde e kuow, uwahdhe cahng uduua, e lum mari gihn? Dhiil batiena ke buodho.” <sup>23</sup> Rob gihn ni ngo abeehn ne nyaay kiin jo waahdhe kejea ngaan anhyaar Jeacuue kiin jo waahdhe ngo buu uthow. Abee padh e naa gihn arob Jeacuue. Jeacuu arubo kea, “Nea a daahd ubeehde e kuow uwahdhe cahng uduua e lum mari gihn?”

<sup>24</sup> Ngad waahdh Jeacuu gihn nu, e naa cuud kede a ugweede gi ih aniide piny. Ngo ngahyo kejea gi ih agweede ge beehda gi ih maa adiehr bang gihn ngo beehda cuud.

*Gug Luube*

<sup>25</sup> Gi ih me thoohdh mooge ge ayug Jeacuue. Nea ge ne gweed piny cang wi iha para paro kejea piny ne pahng keehd wargag agweed utoor ka me laahw.

## Anwehd Me Nyaahn

Luwo: Anwehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62